

WANTOK

NIUSPEPA BILONG YUMI OL PAPUA NIUGINI STRETI 27 YIA NAU

32 pes

Namba 1,299 98

Wik i stat long Fonde Mei 13, 1999

60t

INSAIT

**Ombudsmen
bai holim ol
membra**

pes 2

**Ami i no
inap pretim
gavman**

pes 3

**Tupela ileksen
long lsten
Hailans**

pes 7



pes 20

**Husat
bai
senisim
gavman?**

Pundari bai kamap PM

**...Sapos
Oposisen i gat
hevi long
lidasip**

YAKAM KELO i raitim

GRUP bilong palamen Spika John Pundari i wok long kisim sapot bilong planti memba bilong palamen long senisim dispela Gavman bilong Bill Skate long Julai taim vot i nogat bilip i kamap.

Lain bilong Pundari i tokaut pinis olsem namba bilong ol i olsem 26 long tupela sait bilong Gavman na Oposisen wantaim. Dispela em ol memba husat i laikim senis i mas kamap long dispela Gavman bihainim ol kain kain hevi we i bungim kantri tude.

Sampela memba bilong Gavman olsem Simeon Wai, Jim Kas, Ginson Saonu, Tom Tomiape, Robert Sakias, Opis Papo, Bitan Kuok na Charlie Benjamin i bin tokaut klia pinis long soim olsem sapot bilong ol i stap wantaim John Pundari long senisim Gavman.

Ripot bilong ol i tok John Pundari i kamapim wanpela namel graun bilong Gavman i ken senis antap long en. Dispela i olsem namel graun we ol memba bilong Oposisen na Gavman i ken kam bung na kamapim senis long Gavman bikos Spika bilong palamen em namel man bilong olgeta memba bilong palamen.

Ripot bilong ol i tok grup bilong Spika John Pundari i no lukluk long winim bikpela sia bilong Gavman (Praisin Minista). Ol i laik bungim ol lida tasol long ol i ken senisim Gavman.

Ol i tok, grup bilong ol long kisim sia bilong Praisin Minista i no astingting bilong ol. Tasol ol i laikim ol lida wantaim bikpela tingting na wari long stretim ol hevi i kamap nau long kantri long bung wantaim na kamapim nupela Gavman long stretim ol hevi i kamap wantaim ol olpela Gavman.

Bai grup bilong John Pundari i kamapim wanpela politikel pati bilong ol liklik taim bihain we ol bai wanpela grup husat bai i go pas long mekim senis long Gavman. Grup bilong John Pundari i wok long join wantaim ol lain bilong Oposisen nau long strongim ol toktok na plen bilong kamapim dispela senis long mun Julai. Long las wiken John

Pundari i bin stap wantaim Oposisen lida Bernard Narokobi long Lae long toktok wantaim ol pipel bilong Lae long pasin na rot bilong gutpela Gavman. Planti pipel long Lae i tok klia long ol lida ya olsem ol i laikim Skate Gavman i mas klia na nupela Gavman i mas kamap.

Tasol ol lain bilong Pundari husat i bin stap long Gavman sait i tok ol i bin luksave longtaim olsem Oposisen sait i gat kros bilong ol yet long husat bai kamap lida bilong Oposisen. Na sapos Oposisen i senisim Gavman bai husat i gat Praisin Minista na husat bai namaba tu na ol arapela sinia Minista wok.

Olsem na ol i tok, long luksave bilong ol, Oposisen i nogat klia luksave long husat bai lida taim Gavman i senis. Gavana bilong Morobe Luther Wenge i bin mekim wankain toktok tu long Lae las wiken taim em i bungim ol Oposisen memba long toktok long ol pipel long pasin bilong gutpela Gavman.

Ol i tok sapos Oposisen i no inap stretim dispela hevi bilong lidasip, narapela man i mas go pas long ol.


Grup bilong John Pundari i tokaut olsem namba bilong ol i sanap long 26 na dispela namba bai kam long Gavman na Oposisen memba wantaim.

Long nau yet, Oposisen i gat 35 memba long sait bilong em. Na sapos Oposisen i lusim sampela namba bilong em bikos ol i joinim lain bilong Pundari, ol i mas gat moa long 53 long senisim Gavman.


Long sait bilong Gavman, Praisin Minista Bill Skate i tokaut olsem grup bilong em PNG First Pati i gat 30 memba. Olsem na sapos dispela namba i bung wantaim 25 namba bilong Pipels Demokretik Muvmen (PDM), bai ol i gat 55 o moa long holim Gavman i stap yet.

Ol dispela 7-pela memba bilong John Pundari i bin tokim Praisin Minista olsem ol pipel bilong Papua Niugini i laikim vot i nogat bilip mas kamap egensim Praisin Minista na i no long John Pundari olsem Spika. Ol i tok tu olsem Praisin Minista i no ken kolim John Pundari olsem liklik boi bikos olgeta memba bilong palamen i gat wankain pawa na vot bilong pipel, maski husat lida em bisnisan, saveman wantaim eksperiens o olpela man long palamen.


Ol i mekim dispela toktok long bekim ripot we bai vot i nogat bilip kamap long rausim Spika na ripot we Praisin Minista Bill Skate i kolim John Pundari olsem liklik boi long nius ripot long las wik.



• John Pundari.



• Bernard Narokobi.



• Praisin Minista Bill Skate.

Wai les long Skate

**PETER MAIME
i raitim**

GAVANA bilong Simbu, Simeon Wai aste i bin tokaut stret olsem em i lusim PNG Fes Pati na Gavman bilong Praisin Minista, Bill Skate.

Em i tok nau em i stap insait long grup bilong Spika bilong Palamen, John Pundari.


"Mi no inap lukluk i go bek, mipela i go long gavman o oposisen, mi bai stap wantaim Spika," Mista Wai i tok.

Em i bin mekim ol dispela toktok taim *Wantok* i ringim em (Wai) long opis bilong em long Kundiawa.

Mista Pundari i bin tok olsem em i gat wanpela grup na bai autim nem bilong ol memba na pati bipo long pinis bilong dispela mun.

Mista Skate i bin kolim Mista Pundari wanpela "liklik manki" taim em i harim olsem em (Pundari) i bruk lus long gavman.

Gavman bilong Mista Skate i votim Mista Pundari olsem Spika bilong Palamen long 1997.



• Simbu Gavana Simeon Wai.

Nupela pati bilong Mista Pundari bai kamap bipo long palamen i bung long Julai. I gat bikpela tokwin i raun long kantri olsem ol oposisen bai putim wanpela vot i nogat bilip na rausim gavman bilong Mista Skate.

Dispela toktok bilong Mista Pundari i laik kirapim nupela pati mekim gavman i surik na i bungim olgeta memba bilong em long Mosbi long dispela wik.

Mista Wai i tok dispela grup bilong Mista Pundari i no kamap long aste tasol. Em i tok ol i bin plenim dispela samting klostu long wanpela yia.

Em i tok, i gat sampela samting wantaim Praisin Minista em i no laikim, tasol em i les long autim wanem ol dispela samting. Em i tok i nogat gutpela lidasip na dispela kantri i no ron gut.

Long 1997 ileksen, Mista Wai i bin resis na

winim sia bilong Karamui Nomane long tiket bilong pati bilong Mista Skate bipo, Pipels Nesenel Kongres. Em i bin nambawan man long hailans long joinim pati wantaim ol narapela memba bilong nambis olsem Dibara Yagabo, Simon Kaumi, Philip Taku na William Ebenosi.

Bihain long Mista Skate i kamap Praisin Minista, Pipels Kongres Pati i bin bung wantaim ol narapela memba na fomim PNG Fes Pati.

Mista Wai i bin kamap Komyunikesen Minista taim gavman i skelim ol ministri. Tasol em i no bin stap longpela taim long dispela wok na Mista Skate i bin rausim em.

Mista Wai i tok, em i namba wan Gavman Minista Mista Skate i bin kikim em aut long wok.

Long dispela taim, Mista Skate i no bin tokim em long wanem as na em i rausim em long dispela ministri.

"Em (Skate) i no bin toktok long mi long maus o long pas. Mi save olsem em i rausim mi long wok taim mi harim long radio na lukim long ol niuspepa," Mista Wai i tok.

PLIS RIPOT

Mosbi, Nesenel Kapitel:

Plis long NCD i ripotim olsem namel long Fonde Me 7 inap long Sande Me 9, ol stil lain i bin stilim 10-pela ka, foapela stilpasin, wanpela pasin bilong bagarapim meri na foapela pasin bilong brukim haus na go insait na stil i bin kamap, bos bilong NCD na Sentrel provins plis, Geoffrey Vaki i tok.

Mista Vaki i tok long Fonde, wanpela saspek i bin papaitim wanpela meri taim em i wokabout wantaim narapela meri long Friwe rot long Hohola. Dispela em long 11.00 kilok biknait. Ripot i tok bihqin long dispela, 12 pela man i bin bung na bagarapim meri ya.

Mista Vaki tok dispela pasin we ol man i bung na bagarapim meri i nogut tru winim pasin bilong ol animel naol lain i wokim dispela pasin i no inap long kolim ol pikinini bilong man.

Mista Vaki i apil long ol meri long noken wok-about raun long siti long nait. Na tingim sefti na sekyuriti bilong ol long olgeta taim.

Mosbi:

Plis i holim pasin na sasim tupela man Goilala long stap insait long birua bilong kilim dai wanpela wokman bilong Galley R'lestron long Mosbi. Birua ya i bin kamap long las Fraide, Me 7.

Bosman bilong ol plis long NCD na Sentrel provins Geoffrey Vaki i tokaut long nem bilong ol olsem Francis Aia husat i gat 18 krismas. Em i bilong ples Yeme long Waitape insait long Tapini eria, Sentrel provins. narapela, Benedick Yaura Mikeri husat i gat 20 krismas i bilong Waitape insait long Sentrel provins.

Mista Vaki i tok wokman ya i bin kam bek tasol long beng taim tripela raskol i hensapim em ausait long kapak eria. Ol raskol husat i bin holim gan i tokim man ya long givim ka ki long ol tasol em i les na ol raskol ya i sutim em long het wantaim gan. Em bin dai kwiktaim tasol.

Ol raskol i bin rausim daiman na i ronawe long ka tasoli no longtaim na ka i bungim hevi. Na ol i laik ronawe long lek tasol. Plis i bin kisim tok-save hariap long dispela birua na ol i bihaim ol raskol. Ol bin holim pasim tupela bilong ol, wanpela gan ol i wokim long haus na faivpela katres.

Mista vaki i tok em i nogutpela pasin tru long kilim dai nating man na dispela pasin i mas pinis.

Long wankain taim tu, sevenpela saspek wantaim ol hom med gan i bin hensapim wanpela ol duti plis konstebol long Badili. Kikbek bilong en em plisman ya i bin paia bek na sutim wanpela raskol ya long lek. Saspek ya i wok long kamap orait long Mosbi jenerel haus sik. Plis bai putim ol sas long en taim em i orait.

Korobosea, NCD:

Plis i holim pasim na sasim tripela raskol long karimaut holap pasin long wanpela famili long Korobosea long dispela wik. Faivpela saspek i bin holimap disepla famili taim ol i laik draiv aut long get long 5.45 pm apinun. Laki na tupela plis foks yunit ka i bin stap sambai karimaut wok patrol long eria. Plis i bin go kwiktaim long helpim famili na holim pasim na sasim tripela bilong ol raskol man ya. Tupela i bin ronawe. Plis i bin kisim tu hom med gan we ol raskol i bin yusim long dispela holap.

Mista Vaki i toklong dispela wik, plis i bin kisim bek nainpela ka we ol raskol i bin stilim.

Ol memba bai painim hat long haitim mani

PETER MAIME i raitim

KLOSTU ol pipel bai save sapos ol memba bilong palamen i save mekim stretpela ripot long mani bilong ilektoret.

Was dok bilong PNG, Ombudsman Komisni i tok i gat plen pinis long putim ol dispela ripot bilong ol memba i go aut bai olgeta pipel i ken luksave.

Dispela toktok em Sief Ombudsman Komisni, Simon Pentanu i bin mekim taim em i go givim toktok long ol nius manmeri long wanpela kibung long Mosbi long las wik.

Sapos tru Ombudsman Komisni i karim aut dispela plen, em bai givim hat taim long ol memba sapos ol i laik haitim sampela mani long mekim wok bilong ol yet.

Long olgeta yia ol memba bilong palamen i save kisim klostu K500 tausen long mekim wok long develop-

im ilektoret bilong ol.

Long pinis bilong yia, ol i save givim ripot i go long Ombudsman Komisni long ol wok na prosek ol i bin kirapim wantaim dispela K500 tausen. Dispela mani i save kam aninit long Rurel Eksen Program (RAP) bilong ol memba. Pastaim ol i save kolim dispela mani olsem ilektoret Developmen Fan.

Mista Pentanu i tok "bai yu bilip" taim yu lukim ol ripot i kam aut long pablik long RAP mani wan wan memba i yusim long mekim wok long ilektoret.

Em i tok opis bilong em i putim sampela tingting i go pinis long dispela samting na Ombudsman Ila Geno i putim "lewa bilong em" long kirapim dispela wok. Tasol em i no tok wanem taim bai wanpela bilong kain ripot bai kam aut.

Aninit long mama lo bilong kantri, Ombudsman Komisni olsem wanpela gavman opis i save was na sekap long ol lida husat i holim ol bikpela opis bilong

stet bai ol i karim aut gut wok long sevim ol pipel.


Taim Ombudsman Komisni i harim olsem i gat sampela krangi pasin i bin kamap wantaim wanpela lida, em i save mekim wok painim aut, na sapos em i tru, komisni i save kisim ol i go long kot.

Sapos kot i painim aut olsem ol i asua, ol i ken pinis long wok olsem memba bilong palamen.

Sampela ol memba bipo i bin lusim sia long palamen taim kot i painim aut olsem ol i no bin yusim gut mani bilong ilektoret o bilong gavman.

Planti pipel long PNG i no save long mani bilong ilektoret em memba i save yusim olsem wanem. Ripot i save go tasol long Ombudsman Komisni na Pablik Akauens Komiti long palamen.

Long taim bilong independens i kam inap nau, ol pipel i bin stap long tudak bikos dispela kain ripot em ol i no save lukim.



• Plis Komisina Peter Aigilo i sainim nem long nupela niuspepa bilong Plis Dipatmen. Dispela niuspepa bai tokaut long ol wok na opersen bilong plis insait long komyuniti.

Ol lo sumatin bai kisim poket mani

OL sumatin husat i tren long kamap loya long Legal Trening Institut bai kisim poket mani long dispela yia.

Nesenel Kapitel Distrik i bin givim klostu long K140 tausen i go long dispela institut.

Legal Trening Institut em wanpela bilong ol gavman dipatmen nesenel gavman i bin rausim long 1999 baset.

Dispela skul em gavman i pasim na trensefa i go long Yuniversiti ov PNG. Tasol yuniversiti kaunsil i no tok orait bikos ol tu i sot long mani.

Legal Trening Institut i stap long mak bilong pas tasol aninit long wanpela tok orait namel long skul na nesenel gavman, em i op yet.

Nesenel Gavman i promis long givim K300 tausen tasol mani i no go yet long akauen bilong skul.

Ol mani skul i gat nau long mekim wok em ol seavings bilong las yia. Tasol ol mani ya i no inap long peim poket mani bilong ol sumatin.

Taim Gavana bilong Nesenel Kapitel Distrik, Philip Taku i givim dispela mani, em i tok gavman bilong em i amamas long sapotim ol sumatin.

Em i tok man pawa em bikpela samting long kantri. Em i tok PNG i mas gat inap save manmeri long developim kantri.

Dairekta bilong institut, Dixion Kombagle i mekim bikpela tok tenkyu i go long Mista Taku na gavman bilong NCD. Em i tok planti pipel i gat krangi tingting olsem, taim ol sumatin i pinism skul na kisim digri, ol i mas wok mani na sapotim ol yet.

Em i tok maski ol sumatin bilong em i gat digri long yuniversiti, ol i mas tren wan yia long Legal Trening Institut bipo long ol i ken kamap loya. Sapos nogat bai ol i no inap kamap wanpela loya.

Em i tok dispela mani em inap long peim poket mani bilong 46 sumatin husat i go skul long dispela yia.

Lo i orait long rausim kaunsil presiden

PETER MAIME i raitim

OL Lokol Levul Gavman i ken putim wanpela vot i nogat bilip long kaunsil presiden na rausim em sapos ol i gat Standing Odas long bihainim.

Aninit long nupela Ogenik Lo bilong Provinsal na Lokol Levul Gavman, gres pried o taim wanpela gavman i ken stap long pawa em 18 mun. Bihain long dispela, sapos ol memba long LLG i no amamas long presiden, ol i ken putim vot i nogat bilip na rausim em long wok.

Dispela 18 mun i stat long taim ol LLG i votim presiden bilong ol. Planti ol LLG, taim bilong gavman bilong ol i pinis long April 15, 1999.

Tasol ol i no inap long putim wanpela vot i nogat bilip long presiden sapos ol i

nogat wanpela Standing Odas o rot bilong karim aut vot i nogat bilip long LLG asembli. Sapos ol i go het na mekim, em bai ol i brukim lo.

Dipatmen bilong Provinsal na Lokol Levul Gavman i putim aut pinis dispela yia wanpela model o eksampel Standing Odas long ol LLG long bihainim.

Deputi Sekreteri bilong Dipatmen, Monitorin na Teknikol, Con Ikoirere i tok, em i orait long ol LLG long yusim dispela model Standing Odas o ol i ken senisim o putim sampela tingting bilong ol yet insait na yusim.

Em i tok dipatmen i redim dispela model Standing Odas bikos planti ol LLG long kantri i nogat inap man pawa na risosis long mekim kain samting, olsem na ol i givim han.

Wantok i save olsem planti ol LLG long provins i no bin kisim dispela model Stendin Odas we dipatmen i redim.

Mista Ikoirere i tok sapos ol LLG i nogat dispela model Standing Odas, ol i ken yusim olpela Standing Odas ol i save yusim long en o Standing Odas bilong Provinsal Gavman long putim vot i nogat bilip long kaunsil presiden.

Insait long dispela model Standing Odas bilong dipatmen, sapos wanpela memba bilong LLG i laik putim vot i nogat bilip long presiden, em i mas raitim dispela notis, sainim nem bilong em na givim i go long menesa o kaunsil eksekutiv opisa. Narapela ward kaunsila mas tu sapotim na sainim nem bilong em long dispela notis.

Eksekutiv opisa bilong kaunsil mas givim wan wan kopi bilong dispela notis i go long olgeta memba bilong LLG. Ol memba i mas kisim dispela notis 10-pela de bipo long LLG i ken lukluk long dispela vot i nogat bilip long asembli.

WANTOK
 All departments. Phone: 325 2500 - Fax: 325 2579
 P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group Editor in Chief: Anna Solomon. Advertising Manager: Mike Kanin.	Papers distributed by air throughout PNC. Available by air mail subscription within Papua New Guinea and overseas. Email address: word@global.net.pg
--	--

Editor of Wantok:
Yakam Kelo.

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

PNG Difens Fos i no inap tekova long Gavman

WENCESLAUS MAGUN i raitim

PAPUA Niugini Difens Fos i no inap tekova long Gavman na tu i no inap sapatim sampela politisen long vot i no gat bilip sapos kain pasin olsem i kamap insait long Julai Palamen kibung, Brigedia Jeneral bilong PNG Difens Fos, Jerry Singirok i tok.

Mista Singirok i tok, sampela paul toktok i bin kamap long nius olsem ol ami bai sapatim sampela politisen long Julai Palamen kibung sapos i gat vot i no gat bilip i kamap. Em i tok dispela tok em i no tru.

Mista Singirok i tok aninit long Mamo Lo bilong PNG, PNGDF i gat wok bilong lukautim Gavman na tu ol pipel bilong PNG na kantri olsem wanpela indipenden kantri. Long dispela as, PNGDF bai i no inap long tekova long Gavman.

Em i tok tu olsem PNGDF i gat strongpela bilip long Demokrasi bilong kantri na ol bai lukim olsem dispela i mas stap oltaim. Em i tok PNGDF i laikim pasin bel isi, na indipendens bilong kantri i mas stap oltaim.

Mista Singirok i tokim ol niusman long Mari Bareks dispela wankein tok, em i tokim lida bilong Oposisen, Bernard Narokobi, ol memba bilong Oposisen na sampela lida bilong Niugini Ailan (G17) long Palamen aste.

Long wankein taim em i tok PNGDF i save tu olsem i gat sampela ol ami i no amaras long sampela samting insait long PNG Difens Fos. Ol dispela ami i save pas wantaim sampela politisen bilong kirapim ol paul tingting long ol pipel bilong PNG na kirapim tingting

bilong mekim hevi.

Mista Singirok i tok, opis bilong em, Seketeri bilong Difens, Siv Eksekutyut Opisa na ol sinia opisa bilong PNGDF i save pinis long husat ol dispela ami i gat kain paul tingting na pasin na ol bai askim ol long kam aut na autim wari bilong ol.

Em i go het na askim husat ol ami lain i no laik long kam aut na autim hevi bilong ol long lusim PNGDF na go aut na pilai politik.

Em i tok planti pipel bilong PNG inap pret long PNGDF na inap kisim kranks tingting kwiktaim olsem PNGDF bai tekova long Gavman long Julai Palamen kibung bihain long hevi bilong Sandline Intanesenel i bin kamap long Mas 1997.

Olsem na em i no laik ol paul toktok i kamap long media we inap kamapim kain pret pasin long Gavman na ol pipel bilong PNG. Em i askim ol pipel bilong PNG long noken pret, o guria nating long dispela tingting.

Em i tok, pasin bilong kisim ol Sandline Intanesenel i kam na go pait long Bogenvil em i no samting bilong PNGDF.

"Mipela bai i no inap larim ol ausait lain i kam na mekim ol wok bilong mipela," Em i tok.

Mista Singirok i no tambuim ol ami long go toktok wantaim ol wantok bilong ol husat i stap olsem memba long Palamen. Em i tok dispela em pasin melanesia we ol pipel bilong PNG i save mekim. Tasol em i no laikim ol ami i yusim nem bilong PNGDF long pilai politik o paulim toktok olsem PNGDF bai tekova long Gavman.



• Ami komanda Jerry Singirok i tok ol i no inap pretim gavman na kantri bikos ol i gat wok long lukautim kantri na ol pipel.

Gavman na Spika brukim ol memba

YAKAM KELO i raitim

SAPOS Spika bilong nesenel palamen i no sanap wanbel wantaim Gavman, dispela i soim olsem i gat asua long Gavman, lida bilong Oposisen Bernard Narokobi i tok.

Mista Narokobi i tok Spika bilong palamen i mas oltaim sanap olsem namel man long lukautim ol wok na hevi bilong palamen na ol memba insait long palamen. Na sapos em i no amaras long Gavman na mekim samting arere long interes bilong Gavman, dispela i soim olsem sampela asua i kamap long Gavman.

Mista Narokobi i tok ol lida na ol pipel bilong Papua Niugini i ken luksave long dispela pasin na save olsem i gat hevi i kamap insait long Gavman.

Ol toktok i kamap olsem Spika bilong palamen John Pundari i laik kamapim nupela politikel pati. Na dispela pati bai brukim strong bilong Gavman bilong Bill Skate nau we nupela Gavman bai kamap na senisim dispela Gavman tude.

Long las wik, i gat luksave olsem John Pundari i bin raun wantaim ol lain bilong Oposisen i go long Lae long mekim toktok long ol manmeri long pasin bilong kamapim gutpela Gavman bilong lukautim kantri gut.

Ol ripot i kamap tu olsem sampela memba long hailans na Momase rijon i bung wantaim John Pundari long sapatim em long dispela muv bilong kamapim

nupela pati long senisim Gavman bilong Bill Skate.

Oposisen lida Bernard Narokobi i tok long raun bilong Oposisen las wiken long Lae siti, ol i luksave stret olsem olgeta manmeri i laikim dispela Gavman bilong Bill Skate i mas senis. Ol i laikim Gavman i mas senis bikos long ol kain kain hevi nau i wok long kamap insait long kantri.

Mista Narokobi i tok wanpela pasin bilong Praim Minista we em i wok long makim ol lain bilong em yet long kisim ol bikpela wok insait long ol Gavman opis. Planti senis i wok long kamap we ol arapela bikman bilong arapela rijon olsem Momase na Niugini Ailan i wok long raus na ol Papua rijon tasol i wok long kisim olgeta wok insait long ol opis bilong Gavman.

Lida i tok dispela Gavman i daunim tru ol lain Sepik pipel we em i wok long rausim olgeta Sepik long ol wok bilong Gavman. Sampela i kisim pepa long ol bai pinis long wok na sampela i nogat promosen tasol ol i wok long go daun long posisen bilong ol.

Mista Narokobi i tok nau hevi bilong mani (Kina) insait long kantri i go daun olgeta .39 cents long K1.00, dispela i soim olsem mani bilong kantri i stap long bikpela hevi. Olsem na prais bilong ol kaikai na kago bai i go antap moa, planti bisnis na kampani bai bungim hevi long wok bilong ol na ol bai stat rausim ol wokman o stapim wok bilong ol.

Em i tok dispela i soim olsem strong bilong Gavman i wok long pundaun nau long ronim gut kantri na taim Gavman i nogat strong

moa long lukautim kantri, ol kain kain hevi inap kamap.

Lida bilong Oposisen i askim Praim Minista long soim tru kala bilong em olsem em i wanpela lida husat inap holim tru demokresi na fridom bilong dispela kantri.

Em i askim Praim Minista long singautim palamen i kam bek gut na em (Skate) i mas risain olsem Praim Minista long dispela taim. Orait em i ken traim gen long winim vot bilong ol memba bilong palamen long kisim bek sia bilong Praim Minista.

Mista Narokobi i tok dispela em bilong soim sapos Bill Skate i gat sapat na bilip bilong ol lida na pipel bilong Papua Niugini long stap yet olsem Praim Minista bilong kantri.

Bernard Narokobi i no tokaut long em i gat laik long sanap resis long sia bilong Praim Minista. Em i tok em i nogat tingting long kamap Praim Minista long dispela taim bikos planti samting i bagarap pinis long kantri na bai i hat olgeta long wanpela Praim Minista long stretim gen ol dispela hevi na bagarap.

Tasol em i tok, sapos husat lida i laik kamap Praim Minista long senisim dispela Gavman, dispela lida i mas gat gutpela na strongpela tim bilong karim Gavman i go het long stretim olgeta hevi nau i kamap. Lida i tok em i no rausim nem bilong em olgeta long resis bilong kamap Praim Minista bilong kantri, bikos em i samting bilong ol memba bilong palamen long bungim yet gut na kamapim wanpela gutpela tim bilong kamapim nupela Gavman.

Pipel laikim Skate i mas go, Napo i tok

Ekting Pangu lida Samson Napo i tok Praim Minista Bill Skate i ken gat mani long baim ol memba tasol God bai rausim em bikos ol pipel bilong Papua Niugini i wok long prea long Gavman i mas senis.

Em i askim Bill Skate long tingim wok bilong lukautim kantri na i no ken westim taim long Lamana Hotel na kaunim namba bilong em na tu tromoi mani nabaut long holim ol memba long sapatim em egensim vot i nogat bilip long mun Julai.

Mista Napo i tok tu olsem Pangu Pati i no inap joinim lain bilong Praim Minista Bill Skate long mun Julai taim vot i nogat bilip i kamap long senisim Gavman.

Mista Napo i mekim dispela toktok long rausim ol tok win olsem Pangu bai join wantaim Bill Skate long strongim Gavman long winim vot i nogat bilip we inap kamap egensim Gavman.

Mista Napo i tok Pangu Pati wantaim 12-pela memba bilong em bai joinim arapela politikel pati tasol i no lain bilong Bill Skate.

Pangu i bin mekim Bill Skate i kamap Praim Minista long 1997 bihain tasol long ileksen olsem na Pangu i no inap larim Bill Skate i tromoi em i go aut namba tu taim gen, Mista Napo i tok.

Em i tok pasin Bill Skate i mekim em long traim bagarapim olgeta politikel

sistem bilong Papua Niugini na kamapim wanpela pati sistem we i egensim tru demokresi (fridom) bilong kantri. Memba bilong Bulolo i min long pasin Mista Skate i mekim taim em i rausim Pangu long Gavman, em i kwiktaim pulim bek sampela memba bilong Pangu long traim brukim strong bilong Pangu. Taim Skate i bin rausim tu Pipel Progres Pati (PPP) long Gavman, em i pulim tu sampela memba bilong PPP i stap long Gavman long traim brukim strong bilong PPP.

Mista Napo i tok Pangu i no bilip long senis nating tasol. I mas gat bikpela as tru long mekim senis na senis i mas sanap wantaim developmen polisi na plen we i sut stret long ol pipel bilong dispela kantri. Dispela em ol samting we dispela Gavman i no bihainim, em i tok.

Memba bilong Bulolo i kolim Mista Skate olsem man husat i nogat polisi na plen long kisim kantri igo het abrusim yia 2000 na i go.

Em i tok ol gutpela wokman bilong pablik sevans i wok long pinis olgeta de na Gavman i wok long putim ol pren na wantlain bilong ol long kisim wok.

Em i askim Praim Minista long tokaut wanem as na em i givim olgeta wok i go long ol lain bilong em long Papua rijon tasol na i wok long pinisim ol wokman bilong arapela rijon bilong kantri.

TOFO

TORO BAIM NUPELA PRAIMUS NA KARIM IGO LONG HAUS...

MI KATIM PAIAWUT NA LES PINIS...

LONG NAIT MISIS KUKIM GUTPELA KAIKAI NA OLGETA KAIKAI...

UMMI! SMEL GUT!

TASOL OL I LUS TINGTING KARIM IGO INSAIT LONG HAUS... LONG NAIT OL RASKOL IKAM NA STILIM PRAIMUS IGO...

LE!

MONING NAU TORO KIRAP LONG BOILIM TI NA PAIIM PRAIMUS BILONG EM... G*?!

EM BELHAT NA MISIS KISIM TAIM...

WANTOK

NIUSPEPA BILONG YUMI OL PAPA NIUGINI STRET

Ami luksave long mama lo bilong kantri

TOKTOK bilong komanda bilong PNG Difens Fos Jerry Singirok olsem ami i sanap strong long putim was long mama lo i gupela tru.

Long wanem taim toktok bilong ol G17 lida Niugini ailen rijen i tok olsem ami bai kamap strong long taim bilong vot i nogat bilip, planti man i suruk long wanem ol i ting bai gat militeri birua i kamap.

Long Tunde Minista bilong Difens Peter Weieng i tok olsem ol memba i save yusim ami long strongim opis bilong ol na i nogat luksave long wok bilong ol ami i gupela. Na General Singirok i tok olsem ami i sambai olgeta taim long strongim mama lo bilong kantri i gupela long wanem dispela kain tingting em bai sanapim wanpela ami we i fri long ol politisen i kam na yusim ol long larim ol yet i holim pawa longpela taim.

Ol memba tu mas sekim gut ol tok win long wanem sampela taim ol lain husat i save givim kain ol toktok olsem i no save skelim gut sindaun bilong planti ol manmeri.

Sindaun orait tasol helt na edukesen sevis no go gut long Bogenvil

VERONICA HATUTASI i raitim

HELT na edukesen sevis i no go gut tumas long olgeta hap bilong Bogenvil.

I gat singaut tu long foapela Bogenvil nesenel memba long go lukluk raun na toktok wantaim ol pipel bilong ol long ol ples na maski long stap long taun tasol.

Ol ripot i tok tru sampela hap i kisim ol sevis tasol taim yu go long ol ples longwe olsem long wes kos Bogenvil na ol ples insait long saut na sentrel distrik, em i hat tru na ol pipel i no kisim gut ol helt na edukesen sevis. Em i hat tru long kisim mani na dispela i mekim hat moa long peim ol skul na medikol fi long ol pikinini na taim ol i sik.

Ripot we Wantok i kisim long Bogenvil i tok i moabeta long ol memba long go raun lukim ol pipel bilong ol na luksave long hatpela taim na ol hevi we ol famili, ol mama, ol pikinini na komyuniti i bungim na ol i ken mekim sampela samting long helpim ol.

Ripot i tok sindaun nau long olgeta hap bilong ailan i kwait na nogat meknais i kamap. Ol manmeri long ples i wok hat long traim stretim laip na sindaun bilong ol bihain long 10-pela yia hevi. Na ol i hatwok tru, maski i nogat mani tumas long helpim ol wantaim.

Ripot i tok long Buka, sentrel na wes kos, ol pipel i hatwok long katim kopra tasol ol mas wetim sip long karim ol dispela samting. Long saut, Tinputz, sentrel na ol arapela hap moa, ol pipel i taitim bun long wokim kakau.

Ripot i tok ol yangpela long Siwai eria insait long saut Bogenvil i bisi nau long wokim kakau. Wanpela bisnis man long Siwai nau i gat 40 ton kakau i wetim tasol sip long karim i go long Buka, ripot i tok.

Ripot i tok situesen long olgeta hap long ailan i orait na long Siwai we long sampela mun i go pinis ol bikhet pasin i save kamap em i pinis. Long dispela, ol manki i save hensem ol bisnis man na tu ol wokman long ol liklik stua na stilim ol mani na ol arapela samting.

Ripot i tok nau ol BRA na resistens i wok bung wantaim long lukautim lo na oda insait long ol ples na komyuniti. Na ol i givim mekimsave long ol lain husat i wokim ol bikhet pasin na olsem ol (bikhet lain) i pret na i givap long karimaut ol raskol pasin.

Moa Bogenvil meri mas go insait long politiks

OL MERI long Bogenvil i laikim moa meri na strongpela nek long makim ol' long politikel eria. Dispela em tingting we presiden bilong Bogenvil Intasios Wimens grup, Sista Lorraine Garasu i bin autim taim Wantok i toktok long en long dispela wik.

Wantok i bin askim Sista Lorraine wanem wok ol meri long ailan i mekim nau taim i no moa gat bikpela hevi na paat i stap na ol yangpela man husat i bin stap insait long paat i kamaut long bus na ol i sindaun insait long ol wan wan komyuniti bilong ol

Bogenvil Intasios Wimen em wanpela Non Gavman Ogenaisesen (NGO) grup we i go pas long ol meri husat i kam long ol wan wan sios long provins. Em ol sios olsem Katolik, Yunaitet, Seven De na ol arapela Kristen sios we i karimaut ol wok bilong em long ailan.

Sista Lorraine i tok insait long wanpela bung bilong BTG Asembli long stat bilong dispela yia, ol bin pasim toktok long nominetim o makim 12-pela meri insait long 12-pela distrik long gavman we i ranim provins (provinsel gavman).

Ol bin givim ol rekomendesen long dispela samting long wanpela Woking komiti long glasim na skelim tasol sampela lain insait long Asembli i no bin sapotim na olsem (Asembli) i no tok orait long en.

Long Bogenvil ileksen we i wok long kamap nau, tupela meri tasol i bin sanap long resis long ol sia we ol man tasol i holim. Wanpela i sanap makim wanpela konstituensi long Bui na narapela long Bana eria. Insait long Bogenvil gavman, wanpela meri tasol, Agnes Titus i stap. Sista Lorraine i tok i gupela moa sapos Bogenvil i ken gat moa meri long politikel level bikos long pasin kastam bilong ailan, ol meri i gat pawa long bosim graun na ol arapela samting bilong famili na wanpisan.

Bogenvil meri bun long helpim kamapim gupela sindaun

OL BOGENVIL meri i strong yet long karimaut ol wok program we bai strongim gupela sindaun na tu kamapim developmen namel long ol meri na ol yangpela long ailan.

Presiden bilong Bogenvil Intasios Wimens grup, Sista Lorraine i tok nau ples i wok long kamap orait na wok bilong ol meri i kamap isi liklik bikos long taim bilong hevi, ol meri i bin hatwok tru long go insait long bus long toktok long ol pikinini na ol yangpela man long lusim paat na go sindaun wantaim ol famili na komyuniti bilong ol long ples.

Tru ol meri i bin mekim bikpela wok long taim bilong hevi, i nogat gupela luksave i go long ol. Planti i bin lusim ol famili na ol pikinini long go insait long ol eria we ol BRA paitman husat i holim gan i stap na givim ol gupela toktok long traim senisim laip na pasin bilong ol. Bikos long hatwok bilong ol mama grup, planti ol yangpela BRA i bin lusim bus, ol samting bilong paat na pasin bilong paat na go bek long ol famili, hauslain na komyuniti long ples.

Sista Lorraine i tok, nau taim Bogenvil i wok long kamap orait ol meri i go het long karimaut ol wok bilong ol insait long ol wanwan komyuniti bilong ol. Bikpela eria we ol NGO meri grup long Bogenvil i wok long mekim nau em long karimaut ol literesi na developmen program long helpim ol meri na ol arapela yangpela manmeri long sindaun gut na stap insait long ol wok bilong stretim na go hetim gut Bogenvil, kari-

maut ol aweanes program i sut long jastis na pis na ol program na trening long karimaut ol liklik wok bisnis.

Sista Lorraine i tok Bogenvil Intasios Wimens grup i karimaut ol literesi program long Keriaka eria insait long wes kos Bogenvil na planti yanpela manmeri i wok long kisim gupela skul long en. Program long dispela hap i bin stat long 1997. Program i redim gut ol yangpela long go insait long komyuniti na praimer skul we i wok long op bek nau. Em i tok antap long ol literesi program, grup bilong em i save trenim ol trena husat i karimaut tu ol aweanes program long tok klia long ol pipel long ol bikpela samting we i kamap long Bogenvil, moa yet long saut bilong jastis na pis, ol samting we i sut long politiks olsem ol agrimen na ol samting we ol lida i save kamap wantaim insait long ol bikpela bung ovasis na long PNG we i sut long Bogenvil na long ol wok bilong painim gupela sindaun.

Em i tok Provinsel Kaunsil bilong ol meri long Bogenvil i kirapim tu wanpela maikro kredit skim bilong helpim ol meri i kirapim ol liklik bisnis projek bilong ol. Ol Intasios grup i gat Smol Bisnis Developmen program we i givim sans long ol meri na ol yangpela i kisim trening long ranim ol liklik bisnis, menesmen na buk kiping.

Sista Lorraine i tok wanpela opiosa long BEST, em NGO grup long Madang i helpim ol long karimaut ol trening long ol dispela samting.

Bialla bungim bikpela guria tasol nogat bagarap

OL PIPEL bilong Wes Nu Briten provins i bin pilim wanpela bikpela guria long dispela wik tasol nogat man o samting i bagarap. Ripot i kam long ol otoriti long provins i tok tru ol pipel i bin pilim bikpela guria tasol i nogat ripot i kamap long sampela lain o ol samting i kisim bagarap.

Guria i bin kamap long 6.30 Tunde moning na Rikta skel masin bilong Jiofisikel Obseveteri we i save makim hevi bilong guria i bin rekotim 7.4. Na asples we guria i bin kamap strong tru long en em long Bialla insait long Wes Nu Briten. Ol arapela ples olsem Mosbi i bin pilim tu strong bilong dispela guria.

Long las mun, wanpela guria i bin kamap tu long Wes Nu Briten tasol em no kamapim wanpela bikpela bagarap. Na dispela em namba tu bikpela guria provins i gat long dispela yia. Ol ripot we Wantok i kisim long Wes Nu Briten i tok guria bilong dispela wik i strong moa long narapela.

"Mipela i pilim olsem dispela guria i bikpela moa long narapela we i bin kamap long las mun. Taim em i kamap, mipela i holim pas long ol pos, ol diwai samting na em bin go het long longpela

taim liklik. Mipela i bin pret bikos dispela guria i bin kamap strong moa yet long ol arapela we mipela i bin gat lomng

"Mipela i no kisim yet ripot i kam long ol liklik ples ausait long taun sapos ol i bungim sampela hevi na bagarap long dispela guria. Tasol i luk olsem nogat bikpela bagarap o birua i kamap, "wanpela opisa long Bialla plis stesen i tok.

Narapela ripot i tok Provinsal Disasta Komiti i wok long karimaut ol aweanes long ol kain birua olsem guria na maunten pairap na ol pipel i wok long klia gut na ol i no soim bikpela pret taim samting ya i kamap. I gat ol toktok olsem narapela hevi long bikpela solwara olsem dispela we i bin kamap long Aitape las yia na planti tausen pipel i bin dai long en i ken kamap gen long kantri long dispela yia.

Ripot i tok ol aweanes lain i mekim gupela wok long daunim ol pret pasin na redim gut ol pipel long taim birua na hevi i kamap. Wes Nu Is Nu Briten na tu Niugini Ailans rijen i stap insait long eria we ol kain birua olsem guria, bikpela solwara na maunten paia i save kamap strong.

WANTOK

NIUSPEPA BILONG YUMI OL PAPA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Biabia

BIABIA LAIK KAMAP PRAIM MINISTA NA EM FOMIM GRUP BILONG EM...



EM SALENSIM PRAIM MINISTA LONG SAMPELA OL HAT TOKTOK...



MI I LES PINIS LONG YU! OL PIPOL BILONG MI I LES PINIS!! YU GODFADA, WE?!



PRAIM MINISTA I LAP LONG EN NA BEKIM TOK IGO LONG BIABIA...



MOMASE nius WENCESLAUS MAGUN i raitim

20 provins i gat sia long Nesenel Ges Koporesen

GAVANA bilong Is Sepik Provins na Ekting Siaman bilong Kaunsel bilong ol Gavana, Sir Michael Somare i tok em i amamas tru long ol toktok ol i pasim insait long Nesenel Ges Koporesen miting las wik.

Sir Michael i tok, insait long dispela miting ol i pasim tok olsem olgeta 20 provins insait long Papua Niugini i papa bilong Nesenel Ges Koporesen.

"Mi amamas tru long kaikai bilong miting. Long wanem mipela i pasim tok olsem ol papa bilong Nesenel Ges Koporesen nau em bai olgeta 20 provinsel gavman. Ol bai i gat wankain sia aninit long seksen 179 bilong Oil na Ges Ekt," Sir Michael i tok.

Em i tok ol i rejisterim pinis

Nesenel Ges Koporesen, na long Tunde 5 Me, ol gavena i bung na makim wanpela interim bod bilong ol dairekta bilong Nesenel Ges Koporesen.

Ol memba bilong dispela interim bod em:

- Siaman - Memba bilong Komo/Magarima, Alfred Kaiabe;
- Deputi Siaman - Memba bilong Angoram, Arthur Somare;
- Memba - Gavana bilong Sandaun, John Tekwie;
- Memba - Gavana bilong Galf, Riddler Kimave;
- Memba - Seketeri bilong Dipatmen bilong Petroleum na Eneji; na
- Independen Dairekta - Alexander Palai, LLB. LLM.


Sir Michael i tok, "Bod bai redim ol pepa wok bilong kamapim kampani na bai oltaim givim ripot i go long ol gavena husat em ol sia holda insait long 6-pela mun taim."

Em i tok Nesenel Ges Koporesen bai gat 14.5 pesen bilong Papua Niugini Kwinslen (Queensland) Ges projek.

"Nesenel Gavman i askim Nesenel Ges Koporesen long baim na kisim narapela 10 pesen bilong paipain i go long kwinslen. Wantaim dispela mi amamas bikos ol provins bai kisim gutpela sevis insait long dispela bikpela infrastraksa," Sir Michael i tok.

Em i tok nau yet interim bod bilong Nesenel Ges Koporesen i redim wanpela sabmisen i go long Ministri bilong Petroleum na Eneji bilong kisim sampela helpim mani long statim wok bilong ol.

Sir Michael i tok ol 20 provins bai go het nau na givim K50,000 we ol bai putim i go insait long Nesenel Ges Koporesen olsem sia bilong ol.



• Wanpela opisa bilong PNG Difens Fos i kisim nem na krismas bilong ol mama na pikinini long Pou Kea Senta bihain tasol long bikpela solwara i bagarapim ples bilong lain long Aitape, Sandaun Provins long 17 Julai, las yia. Poto: Francis Uliua.

Is Sepik nogat gutpela gavman

IS SEPIK Provinsel Gavman i nogat gutpela edministresen na long dispela as i givim piksa olsem provins i nogat gutpela gavman. Dispela em pablik tingting ol pipel bilong Is Sepik i gat, Kaunsel bilong Wod 10 long Wewak Taun Lokol Level Gavman, Lemech Sui i tok.

Mista Sui i tok ol pipel bilong Is Sepik i save pinis olsem planti tok salens i sut i go olsem Edministreta bilong Is Sepik, Peter Maginde i no ronim o mekim gut wok bilong em.

Em i tok planti ol sevis i no go aut long provins na ol pipel i no amamas. Asua i stap long provinsel edministresen. Ol pipel i mas save long wanem asua i stap na ol i no kisim sevis. Husat i asua na bilong wanem. Long dispela as, Is Sepik Edministresen i mas kam aut na tokaut long ol pipel wanem hevi i stap.

Mista Sui i askim ol pipel bilong Is Sepik long holim planti kibung na paitim toktok long glasim dispela hevi, na kamapim wanpela askim pepa we ol i ken askim Gavana bilong Is Sepik, Sir Michael Somare long rausim Mista Maginde olsem

Edministreta bilong Is Sepik.

"Yumi mas ekt nau na stapim

wanem samting inap kamap taim ol lida i no yusim gut pawa bilong ol. Dispela provins em i no bilong sampela ol bikman, saveman o politisen tasol," Mista Sui i tok.

Em i tok i luk olsem Is Sepik i nogat politikel dairektiv o ol politisen bilong Is Sepik i no givim gutpela stia long ronim gut provins.

"Ol nesenel memba bilong palamen wantaim ol provinsel asembli memba i stap isi longpela taim. Sapos mipela i bung wantaim na toktok long stretim dispela hevi long namba wan taim, taim ol hevi i stat na ol sevis i wok long bagarap, mipela inap long stretim ol hevi," em i tok.

Mista Sui i tok dispela pasin i no bin kamap na olsem ol pablik sevans i go het long mekim wanem samting ol i laik mekim.

Em i tok nau yet i nogat gutpela pasin bilong wok bung namel long ol pablik sevans i holim ol bikpela opis na ol pablik sevans i holim ol opis daunbilo na tu i nogat wok bung namel long ol arapela operesen yunit bilong provinsel gavman.

"Long dispela as ol pablik sevans i no soim laik long mekim gut wok na i no mekim gutpela wok," Mista Sui i tok.

Wewak Taun Kaunsel wetim Nesenel Grent

WEWAK Taun Kaunsel i wet long kisim Nesenel grant mani bilong ol yet inap long 8-pela mun olgeta, Deputi Taun Meya, Terence Kori i tok.

Mista Kori husat i holim opis olsem kaunsel bilong Wod tu insait long Wewak Taun Kaunsel i tok, ol i no inap long pinisim ol olupela projek na tu kirapim ol nupela projek insait long eria bilong ol biko, ol i nogat mani. Na em i sutim tok i go long Nesenel Gavman long holim pas mani na i no givim kwik i go long Is Sepik provins.

Mista Kori i tok, Wewak Taun Kaunsel i gat 16-pela Wod kaunsel na olgeta dispela kaunsel eria i gat bikpela hevi.

Long Wod tu we em i kam long en, Mista Kori i tokaut long sampela bikpela projek we em i no inap long pinisim o statim ol projek bikos ol i nogat mani. Wanpela bilong ol dispela projek em i no inap long pinisim em bilong ol elementeri skul.

Mista Kori i tok ol i statim pinis ol elementeri skul las yia, tasol nau ol

i no inap long pinisim. Ol i wokim bun bilong haus, na i nogat mani bilong baim kapa na ol arapela samting. Olsem na nau san, ren, na win i wok long bagarapim bun bilong haus.

Em i go het na i tok, em i gat tingting bilong stretim ol hul ol ami bilong Japan i bin digim i go insait long graun na hait long taim bilong namba tu wol wo, na mekim sampela gutpela samting long ol bilong bringim moa turis i go long Wewak. Tasol dispela gutpela tingting bilong em i no inap karim kaikai bikos i nogat mani.

Mista Kori i tok ol ami bilong Papua Niugini long Moem bareks i soim laik long helpim em wantaim tingting bilong glasim ol hul na stretim tasol ol i no inap go het wantaim sampela wok. Em i gat tingting bilong askim sampela saveman o meri bilong givim em sampela moa gutpela tingting bilong stretim ol hul tasol olgeta dispela tingting i no inap karim kaikai.

Narapela bikpela tingting Mista Kori i gat long kamapim long bihain

taim, em tingting bilong mekim wanpela bikpela pilai haus na ples bilong pilai olsem stedium we ol pipel bilong Is Sepik na moa yet long Wewak taun i ken yusim bilong pilai.

Em i tok pasin bilong pilai inap bungim ol yangpela wantaim na mekim ol i amamas bai ol i no inap joinim ol bikhet lain bilong kamapim ol bikhet pasin na bagarapim laip bilong ol yet, famili bilong ol, komyuniti, taun na provins.

Olsem na em i askim ol mani man, ol bisnis haus, ol bikpela koporet kampani, na ol politisen long skelim dispela tingting bilong em na givim em mani bai em inap yusim long mekim dispela stedium long Wewak taun.

Nau yet Mista Kori i no tokaut long amamas mani em i tingting long yusim bilong kamapim dispela stedium na wantaim dispela projek bai go het. Em i tok i gat sampela bikpela hevi long provins we ol i mas stretim pastaim bipo long em i autim tingting bilong em long ol dispela projek.

Sista Aloisa MSC mekim las promis

SISTA Aloisa Waisman i bin mekim las promis bilong em long kamap olsem wanpela misinari sista bilong Sekred Hat bilong Jisas (MSC) long Fraide 30 Epril long Dagua peris Wewak, Is Sepik provins.

Ol pipel i redim ol samting bilong dispela bikpela de long Fonde yet. Ol famili, pren na wantok i bin bringim ol presen olsem pik, basket, mani na ol kaikai samting long helpim dispela bikpela de bilong Sista Aloisa.

Planti wok i bin kamap long ples Dogur. Ol pipel i redim mumu, ol bilas bilong singsing na progrem bilong bikpela Misa long Fonde abinun i go inap Fraide moning. Ples i bin pulap tu long ol manmeri husat i bin kamap long lukim Sista Aloisa long dispela bikpela de.

Bikpela Misa i bin kamap long Fraide long 9:30 moning wantaim proseso bilong kisim Sista Aloisa, famili bilong em na ol pater i go insait long haus lotu.

Pater Cherobim Dambui i bin go pas long Misa na i bin welkamim ol pipel husat i bin kamap.

Ol bikpela manmeri husat i kamap em long bos meri bilong ol



• Papa na mama bilong Sista Aloisa i sanap long sait sait bilong Sista Aloisa long bringim em i go insait long Misa bilong mekim las promis bilong em olsem wanpela MSC Sista.

MSC Sista, Sista Xavier, na Pater Francis, Pater Peter, Pater Alphonses, Pater Lawrence, na Oposisen lida Bernard Narokobi.

Insait long toktok bilong Pater Dambui, em i tok: "Yumi nau i witesim singaut bilong God. Jisas i

singautim yumi olsem ol disaipel long go aut na telemautim Gutnius.

Insait long Sios, em i singautim yumi long bung olsem wanpela famili olsem diwai wain."

Bihain long dispela toktok, pro-

grem i bin i go insait long las prosesen wantaim Pater Dambui i opim long beten.

Bihain Sista Aloisa i mekim las promis bilong em.

Bihain long promis, Sista Aloisa i kisim ring na las tru em i sainim

pepa long soim olsem em bai i stap olsem wanpela Sista inap em i dai.

Sista Aloisa i gat 36 krismas nau na mama i bin karim em long 1963 long Waisman famili. Em i bin joinim MSC long 1988.

Long dispela taim i kam inap 1993, em i bin stap aninit long skul bilong kamap Sista.

Em i mekim namba wan promis bilong em long 1994, bihain em i go aninit gen long skul bilong kamap Sista long 1999.

Na em i mekim las promis bilong em long 30 Epril 1999.

Sista Aloisa em i namba tri meri insait long Wes kos eria long joinim MSC. Dispela grup bilong ol Sista i gat het opis long Rabaul we ol i wok na tu long Kavieng, Vanimo, Mosbi, Mendi, na Wes Niu Briten.

MSC i bin stat long 1900 long kantri Jemeni (Hilltrob).

Man husat i kamapim dispela kongrigesen em wanpela Dats (Dutch) pater, Pater Hurbert Linconz. Namba wan misinari i bin kamap long nambis bilong PNG long 1902 long Niu Briten.

Media fridom em bilong olgeta pipel, Pater Henk i tok

JENEREL Seketeri bilong Katolik Bisop Konferens, Pater Henk Kronenberg husat Pop John Paul II i makim olsem bisop bilong Bogenvil bai kisim odinesen bilong bisop long 14 Julai long Bogenvil. Nau yet em i holim opis olsem Jenerel Seketeri bilong CBC long Mosbi.

Las Wik Sande, Pater Henk i tokaut klia long ol Katolik pipel long Mosbi olsem Media Fridom we ol nius manmeri bilong redio, televisen, na niuspepa i selebretim long wik i go pinis em i no bilong ol media lain tasol. Nogat. Media Fridom em fridom bilong olgeta manmeri na pikinini.

Em i tok astingting bilong Media Fridom i sut long fridom bilong media long toktok. Long wankain taim media i gat wok bilong tok tru. Em i tok long

Sande ol Katolik i tingim ol media lain tasol tru tumas media em bilong olgeta pipel.

Pater Henk i tok olgeta manmeri na pikinini i save autim tingting long het na bel bilong ol long toktok na long pasin bilong bodi olsem long pes, han, lek, het, ai, nos na ol arapela hap bilong bodi. Insait long dispela pasin, sampela i gutpela, sampela i nogut. Sampela bilong lap na amamas, sampela tok baksait, giaman, na sampela em ol tok tru.

Long komyunikesen Sande Pater Henk i strongim ol Katolik pipel long tingim Jisas Krai olsem wanpela man husat i bin tok tru tasol. Sampela toktok bilong em i isi, sampela tok i sori, taim em i save toktok long ol sik manmeri na pikinini. Sampela taim em i save kros taim em i toktok wantaim ol


parisi. Tasol oltaim Krai i save tok tru. Em i save helpim ol pipel long painim God.

Pater i tok ol media lain na olgeta pipel i mas helpim narapela narapela long painim God. Olgeta pipel i mas karim hevi bilong narapela narapela na helpim narapela narapela.

Em i tok tu olsem long dispela taim Pop John Paul II i askim olgeta manmeri bilong graun long painim amamas bilong oltaim. Na dispela amamas bilong oltaim em bilong painim God. Em i tok long dispela Media Fridom de ol pipel bilong olgeta hap bilong graun i mas rispektim laip, fridom, narapela narapela, marimari na sori, helpim arapela na tok tru.

"Yumi olgeta em media tu. Yumi olgeta i stap long rot i go long Papa God," Pater Henk i tok.

Tu minit tingting



wantaim

FRANK MALIC

WANPELA bikpela saveman i lapun pinis nau. Em i lukluk i go bek long laip bilong em, na em i tok olsem, "Long taim mi yangpela yet, mi laik pait bilong stretim olkain rong i stap nabaut long graun. Long dispela taim mi save beten olsem long God, 'God Papa, givim bikpela strong long mi, bai mi inap long senisim olgeta samting nogut long dispela graun na mekim em i gutpela olgeta.'"

"Long taim mi winim 50 yia pinis, mi lukluk i go bek gen long laip bilong

Sensim yu yet pastaim

mi, na mi lukim, bikpela hap bilong laip bilong mi i no bin senisim wanpela man o meri yet. Mi sem. Nau beten 'bilong mi i go olsem: 'God, givim strong long mi long senisim na helpim laip bilong famili bilong mi na bilong ol pren. Em bai inap.'


"Tasol nau mi lapun pinis na mi no inap stap longpela taim moa long dispela graun. Mi tingting bek nau long ol yia bilong mi na nau mi kisim save pinis: ol bikpela aidia bilong mi bilong bipo ol i longlong tasol. Tude mi gat wanpela liklik sotpela beten tasol. Em i go olsem: 'God, givim strong long mi, bai mi inap long senisim mi yet. Em bai inap.'

"Sapos pastaim tru mi bin stat wantaim dispela kain beten, ating nau laip bilong mi i narakain na mi gutpela man.."

Man husat i laik stretim ol arapela man, em i mas stretim em yet pastaim.

God i gat ansa bilong ol hevi, Soni tok

WENCESLAUS MAGUN i raitim



• Victor Soni i holim wanpela Baibel na tokaut olsem ansa i stap long Baibel.

bilong stilim ol bikpela mani. Eks geng lida, Mista Soni i tok astingting bilong geng 585 em bilong stil long stap laip.

Mista Soni i stat long stil long 1992. Long 1993 em i bin stil long

GOD i gat ansa bilong ol hevi, wanpela eks raskol man, Victor Soni i tok. Soni husat i gat 33 krismas na em miks Braim long Amele insait long Madang Provins na Garara insait long Midel Waria veli long Morobe Provins em wanpela eks geng lida bilong 585.

Geng 585 em ol raskol mangi bilong Goilala, Bubu na Garaina. Dispela geng em wanpela bikniem geng long kantri na ol i gat ol memba long olgeta hap kona bilong kantri.

Tude ol saveman bilong lo, ol teknikel man, ol bisnis manmeri, ol yunivesiti manmeri, sampela politisen tu i save yusim geng 585

Gerehu Sevis stesin. Long 1994 em i go kalabus long Budara na wetim kot we em i winim na i kam ausait. Em i mekim planti ol stil pasin long benk, haus bekeri, stoa na ol arapela hap na planti taim em i save go long kalabus.

Long haus kalabus em i save askim ol arapela kalabus man ol i pilim olsem wanem taim ol i stap long haus kalabus.

Na planti taim ol i save tokim em olsem haus kalabus em namba wan hel long graun. Olsem na oltaim dispela hap tok i save sutim bel bilong em. Em i no klia em i mas lusim ol bikhet pasin o nogat, long wanem as bilong em i save stil em bilong kisim mani na lukautim laip bilong em.

Long 1998 ol plis i holim pas em na sasim em long stilim ol gan na ol samting long Goldie Bareks.

Jas Don Sawong i sasim em 5-

pela yia long haus kalabus wantaim strongpela mekim save. Tasol wanpela bikpela mirakel i bin kamap. Mama bilong em i karim Baibel i go long kot haus na Mista Soni i ridim Matiu 5:25 "Sapos wanpela man i laik kotim yu, na yutupela i wokabaut yet long rot, orait kwiktai yu mas stretim tok wantaim em.

Nogut dispela man i putim yu long han bilong jas, na jas i putim yu long han bilong plisman, na plisman i putim yu long kalabus."

Bihain long em i ridim dispela hap rit bilong Baibel em i pre na i wetim Jas Sawong long mekim disisen. Insait long kot, Jas Sawong i tok olsem em i no painim wanpela asua long Mista Soni na i larim em i go fri.


Long dispela taim i kam inap tude, Mista Soni i senisim bikhet pasin bilong em na i bungim ol

mangi i nogat wok na helpim ol long mekim wok insait long Nesenekel Kapitell Distrik bilong kisim mani na lukautim laip bilong ol.

Mista Soni na ol arapela raskol mangi na ol lain yut bilong Mosbi husat i nogat wok i kamapim wanpela grup we ol i gat bikpela tingting bilong go insait long bisnis. Tasol ol i askim Gavman long helpim ol.

Mista Soni i tok, sapos Gavmani no laikim hevi bilong lo na oda, orait Gavman i mas sapotim grup bilong em bikos em ol mangi i nogat wok na ol mangi husat i painim hat long kisim mani bilong lukautim ol yet long ol taun na siti.

Em i tok tu olsem antap long olgeta samting, God i gat ansa bilong olgeta hevi na olsem ol raskol mangi i mas tanim bel nau na bihainim laik bilong God.



Hailans Nius

Tupela bai ileksen long Isten Hailans

PETER MAIME i raitim

Isten Hailans nau i gat tupela bai ileksen.

Ileksen kempen i stat pinis long Isten Hailans rijionel taim nominesen i op long las mun.

Nominesen long Kainantu bai ileksen i bin op aste na bai pas tude long apinun.

Tasol de bilong vot i narakain. Long rijionel sia, ol pipel bai stat vot long 19 Jun, 1999 na pinis long Julai 3, 1999. Bihain long dispela bai ol ileksen opisal i kaunim vot long painim

wanpela wina. Sia bilong Isten Hailans rijionel i stap nating bihain long olpela Gavana, Peti Lafanama i lus long Suprim Kot.

Long Kainantu bai ileksen, vot bai stat long Julai 10 na pinis long 24, 1999. Ilektoel Komisin i toksave pinis olsem bai ol kendidet i gat wanpela de tasol long givim nem long resis long Kainantu bai ileksen. Nominisen pe em i K1000.

Kainantu i nogat memba long nesanel palamen bikos olpela memba, Baki Reipa tu i lus long Suprim Kot. Frank Gabi long Goroka Ilektoel Opis i tok,

kempen long Isten Hailans rijionel sia i go isi na i no gat wanpela bikpela trabel i kamap.

Provinsal Plis Komanda, Sief Inspekta, Edward Kinamun i tok wan kain olsem ol pipel i kempen long gutpela pasin na provins i no bungim wanpela hevi long taim bilong kempen.

Ilektoel Opis long Goroka nau i stretim nem bilong ol ileksen opisal, de na ples bilong vot na stretim ol ka na helikopta long ron long taim bilong ileksen.

Ol balot pepa em ol i prinim long Mosbi.



• Ol meri Hagen i danis na kirapim das taim ol i bin stap long wanpela bikpela bung long dispela yia. Foto: Pius Mon.

Westen Hailans meri kisim nupela ka

MARIA TAI i raitim

WIMENS Kaunsel long Westen Hailans i bin kisim wanpela nupela ka na K250,000 long Provinsal Gavman las wik.

Dispela ka em wanpela Toyota Hilux dabol keb. Tupela presen i bin kam taim Gavana Pater Robert Lak i bin opim Wimens Kredit Skim bilong provins.

Pater Lak i tokim ol meri long dispela taim olsem dispela K250,000 em hap bilong K500,000 Provinsal Gavman i bin putim bilong ol meri long 1999 baset.

Em i tok narapela hap mani bai em i givim long ol meri long sampela taim bihain.

Pater Lak i tok hap mani bai go long ol wimens grup husat i kam aninit long Westen Hailans Provinsal Kaunsel ov Wimen olsem dinau mani bilong mekim ol liklik prosek long ples.

Dispela mani ol meri i no inap yusim na lus tingting tasol ol i mas kisim olsem dinau na bihain bekim bek long Provinsal Gavman.

Sapos ol mama i lukautim gut ol prosek ol i mekim long ples bai dispela i ken helpim laip na sindaun bilong ol long ples, Pater Lak i tok.

Presiden bilong Provinsal Wimens Kaunsel, Paula Mek i bin mekim bikpela tok amamas i go long Provinsal Gavman na Pater Lak long baim nupela ka na givim dispela K250,000.

Misis Mek i tok ol meri i kirapim nogut taim ol i kisim ol dispela samting bikos ol i no bin tingting long en.

Plis askim ol meri long was gut

PLIS long Isten Hailans i mekim strongpela toktok long ol meri long noken raun ol yet long nait.

Plis i bin mekim dispela toktok bihain long wanpela meri i dai long han bilong ol raskol man long Goroka taim em i wokabout i go bek long haus bihain long wanpela danis. Plis i luksave long dispela meri olsem Maria Teine bilong Simbu.

Meri ya i pinis long danis long wanpela klab long taun na i bin

wokabout i go long haus wantaim wanpela boi pren taim em i bungim dispela birua. Provinsal Plis Komanda, Edward Kinamun i tok ol meri i noken go long danis ol yet long nait.

Em i tok long ples bilong danis, planti ol man i save spak na taim ol i spak, planti bilong ol i save gat krangi tingting. Em i tok plis i no stapim ol meri long go na amamas tasol ol tu i mas tingtim laip bilong ol. Em i tok ol meri i mas go wantaim

sampela lain ol inap long trastim ol na i no long ol pren nambaut.

Inspekta Kinamun i tok ol man i gat ai na taim ol plis i raun ol i no save wokim trabel, tasol taim ol i go pinis, ol i save kamapim biket pasin bilong ol. Em i tok ol plis manmeri i no inap long stap long olgeta hap long wanpela taim.

Plis i holim pasim pinis tupela man husat ol i ting i kamapim indai long dispela meri Simbu.

Pater Lak nau stap long Nesanel Kot

KOT bilong Gavana bilong Westen Hailans, Pater Robert Lak nau i stap long han bilong Nesanel Kot.

Plis i bin sasim em long slip wantaim wanpela meri husat 'krismas bilong em i aninit long 16.

Komital Kot long Waigani i tok i gat inap evidens na salim Pater Lak i go long Nesanel Kot long las mun.

Narapela sas bilong Pater Lak long kamapim wanpela pamuk video tep em Nesanel Kot i bin rausim long sampela taim i go pinis. Nau em i gat wanpela sas, em plis i tok em i bin slip

wantaim wanpela yangpela meri, lo i tambuim.

Pater Lak wantaim loya bilong em, Moses Murray i bin go long kot long dispela wik Mande tasol kot i surikim de i go long Jun 7, 1999.

Tasol Mista Murray i tok autsait long kot haus olsem em bai traim long aplai long Judisial riviui long hari-apim dispela kot.

Em i gat strongpela bilip olsem i nogat evidens long dispela sas bilong Pater Lak na kot i wok long kisim longpela taim long harim dispela kes.



COFFEE INDUSTRY CORPORATION LTD INDUSTRY AFFAIRS DIVISION

PRAIS BROADCAST WAN WAN WIK

SUMMARY		Average prices (t/kg) as at:		10-05-99	Range	03-05-99	April
ARABICA:							
Green Bean	Y1	392	370 to 420	373	352		
(DIS LAE)	Y2	NQ	NQ	NQ	NQ		
	X	438	400 to 500	423	385		
	A	472	410 to 580	445	410		
PARCHMENT:							
	Class 1	245	160 to 280	238	237		
(Factory Door)	Class 2	240	160 to 270	230	216		
	Class 3	223	180 to 246	230	216		
CHERRY: (Factory Door)		60		58	62		
ROBUSTA:							
Green Bean		NQ	NQ	NQ	261		
Parchment		NQ	NQ	NQ	160		
Cherry Indicative		N/A	N/A	N/A	N/A		
NEW YORK "C" CLOSING		07-05-99					
Other Mild Arabicas							
US cents/lb		102.85		104	101.8		
One Kina=US\$		0.4085		0.406	0.426		
Toea/Kg:-							
	Without discount/premium	555.07		564.73	526.46		
	With discount of 10 cents/lb	495.70		510.43	474.74		
Y-grade (Gross F.O.B. Lae)*	(1)	495.70		510.43	474.74		
Levy on (1)	(2)	26.00		26.00	40.00		
Y-grade (Net F.O.B. Lae)*	(1-2)	469.70		484.43	434.74		
Indicative							

MEKET TOKTOK

Long las wik prais bilong kopi fiusa long Niu Yok i bin go daun 1.1% long wanem i gat sampela wari olsem ol stok i wok long kamap bikpela olsem long 3pela wik i go pinis i gat 289,000 na i gat 352,000 bek i stap. Wantaim dispela sampela kopi ejensi i gat tinktink olsem bai kopi krop bilong Brazil bai i bikpela long dispela yia.

Insait long PNG, prais bilong Y-Gret FOB i go daun 3% long wik. Tasol prais bilong parsmen kopi long faktori doa i bin go antap 3% na asua bilong dispela ol i bin katim Stebilaisesen levi liklik na ol groa i kisim helpim long dispela.

Ol i bungim fiusa prais na eksens ret na damapim FOB prais. Tasol prais bilong wan wan ekspota tu i no wankain.

Prais long dua bilong fektori (t/kg)

04-12-99


02-07-98/99

Wik i stat: 10-05-99

AREA	PARCHMENT RANGE			ROBUSTA	CHERRY RANGE
	CLASS 1	CLASS 2	CLASS 3		
NATIONAL	160 to 280	160 to 270	180 to 246		-to 60
KAINANTU	260 to 280	NQ	NQ		-to 60
GOROKA	268 to 272	230 to 260	243 to 246		NQ
KUNDIAWA	NQ	NQ	NQ		NQ
MINJ/BANZ	260 to 280	245 to 270	NQ		-to 60
MT. HAGEN	NQ	NQ	NQ		NQ
WAPENAMANDA	NQ	NQ	NQ		NQ
LAE	220 to 230	-to 210	NQ	NQ	
ASEKI	-to 200	NQ	NQ	NQ	
MUMENG	NQ	NQ	NQ	NQ	NQ
WAUBULOLO	-to 220	-to 210	NQ	NQ	
WASU	NQ	NQ	NQ	NQ	
MADANG	-to 160	NQ	NQ	NQ	
EAST SEPIK				NQ	
Robusta Cherry-Indicative					N/A

- CIC Ltd-Industri Afeas Divisen i save bihainim dispela mak long putim aut Maket Prais olgeta wik.
- Eksens Reit: Mande US Dola T/T mak bilong mani egens Kina long PNGBC.
- 1kg = 220462 lb.
- Prais bilong kopi long dispela wik ikam long prais bilong olgeta espota na prosesa long Mande wantaim prais bilong ol fiusa prais long las Fraide.
- Long kisim moa toksave long dispela, askim Industri Afeas bilong CIC long telepon namba 732 1266.

Madang Nius



Ol NGO no laikim Gavman givim tok orait long Ramu main

WENCESLAUS MAGUN i raitim

OL Non Gavman Ogenaisesen insait long Papua Niugini i no laikim Gavman i givim tok orait long Highlands Pacific Limited bilong kirapim Kurumbukari main insait long Madang Provins, inap ol saveman bilong ol i glasim Envairnemental Plen bilong HPL.

Mausman bilong ol NGO long kantri, Wep Kanawi i tokaut long dispela insait long wanpela pas em i raitim na salim i go long Minista bilong Maining, Masket langalio long 29 Epril long dispela yia.

Dispela pas i tokaut long tingting bilong ol NGO husat i bin kamap long wanpela kibung long Mosbi long wankain taim. Ol NGO i

kamap em long Foundation for People's Community Development (FPCD), Conservation Melanesia (CM), Conservation International (CI), National Volunteer Service (NVS), National Council of Churches (CI), Melanesia Environment Foundation (MEF), National Alliance of Non Government Ogenaisesen (NANGO), Research and Conservation Foundation of PNG (RCF) na The Nature Conservancy (TNC). Ol arapela NGO bilong Madang na ol arapela provins i no bin kamap bikos ol i kisim sotpela toksave. Tasol ol i givim bikipela sapot long dispela tingting.

Ol dispela NGO i pasim tok olsem:

- Ol bai kamapim wanpela envairnemental was dok grup bilong glasim envairnemental plen bilong ol bikipela risos developmen

long PNG na sekim olgeta wok bilong ol developa. Dispela grup bai wok aninit long nem bilong Nesenel Alaiens ov Non Gavman Ogenaisesen (NANGO);

- Wanem wok painim ol i painim aut ol bai salim i go long opis bilong ministri bilong Envairnmen na Konsevesen na Dipatmen na ol arapela opis i gat wankain wok. Ol i laikim pasin bilong toktok na painim gutpela rot bilong helpim ol pipel bilong PNG;

- NANGO bai go pas long askim wanpela bikipela kampani i kam insait long PNG long kisim risos long paitim toktok wantaim na larim ol memba bilong NANGO long askim ol long envairnemental plen bilong ol. Ol i luksave olsem dispela toktok i mas kamap kwik insait long tu o tri wik taim bikos HPL i laikim Gavman i mas givim ol tok orait kwik bai ol i ken go het na kirapim Kurumbukari main;

- Grup i laikim ol developa i mas givim olgeta ripot bilong developmen na rot bilong kisim mani bai ol i ken glasim pasin kampani i kisim mani bilong wok long main;

- Ol bikipela risos kampani i mas givim envairnemental plen bilong ol i go long ol indipenden intanesenel grup husat i gat save bilong sekim na tok i gutpela o nogat. Na wok painim bilong ol i mas go aut long olgeta papa o siaholda bilong kampani olsem ol papagraun;

- Larim grup bilong mipela na ol NGO i karim aut awenes progrem wantaim ol papagraun na larim risos kampani i putim mani i go insait long karim aut dispela awenes;

- Givim ripot bilong mipela i go long ol arapela NGO, Dipatmen, Komisen, PNG Kaunsel ov Sios na Melanesian Institute, Ombudmen, Dipatmen bilong Attorney Jenerel bai ol i ken yusim;

- AusAID na ol arapela grup i givim sapot long mipela bilong mekim gut awenes wok. Dispela bai helpim mipela long teknikel save we mipela i sot tru;

- Mipela i mas save long wanwan ol papagraun na givim ol awenes long wanem ol bagarap inap kamap o wanem ol gutpela sevis ol inap kisim long taim main i kamap; na

- Larim ol envairnmen na konsevesen NGO na wanwan man o meri husat i gat laik long mekim awenes wok i gat sans bilong kamap memba bilong dispela grup bilong mekim dispela wok.

Mista Kanawi i tok em i askim pinis sampela saveman bilong grup bilong em, The Nature Conservancy bilong kam na glasim envairnemental plen bilong HPL. Sampela bilong ol dispela grup bai kamap long PNG long dispela mun.

Madang i gat I-Dodo tiata grup

SAPE METTA i raitim

OL pipel bilong Madang i mas hamamas nau bikos wanpela nupela ats tiata grup bilong provins yet i kamap pinis. Dispela grup i redi nau long kisim askim bilong go putim pilai, mekim musik, danis na soim pasin tumbuna bilong Madang wantaim musik bilong tumbuna na waitman. Ol i redi long go long ol ples na tu long ol ges haus, hotel, provinsel gavman, ol binis ples na ol arapela ples insait long taun.

I-Dodo ats tiata grup em dispela nupela grup bilong Riwo ples, we bai kamapim ol pilai, musik, singsing na danis long stail bilong tumbuna na kalsa bilong Madang yet na sem taim hapim nem bilong Mosbi olsem susa siti bilong Madang long sait bilong kisim moa turis. Dispela lokol grup i bin opim ats tiata grup bilong ol long Pal-Lang long hapsait bilong Nagada long 24 Epril. Long taim bilong opim grup, sampela lida bilong provins i bin go lukim ol na ol i bin hamamas tru long luksave olsem Madang nau i gat kain grup we i ken soim pasin tumbuna bilong Madang provins insait long pasin



• Ol lain memba bilong I-Dodo ats tiata grup bilong ples Riwo insait long Madang provins i redi long putim pilai, musik, na danis long pasin tumbuna bilong Madang. Foto: Sape Metta.

bilong ats tiata. Man husat i go pas long I-Dodo ats tiata grup, Alois Bilas i tok, ol yangpela man na meri husat i stap insait long dispela grup i gat planti yia laip save long pilai musik, danis na ekt long pasin tumbuna na waitman.

Em i askim nau ol komyuniti bilong Madang, provinsel gavman, ol binis haus na lokol level gavman long kamap na sapotim I-Dodo ats tiata grup. Em i kamap wantaim tingting long kamapim dispela nupela grup bikos em i laik ol yut long ples i stap insait long kain

pasin na lus tingting long mekim trabel.

Mista Bilas i helpim ol yut long Madang inap klostu 20 yia olgeta. Long sait bilong pilai, em i bin kamapim wanpela ragbi lig klab ol i kolim North Raiders husat i bin pilai insait long Madang ragbi lig lokol pilai stat long 1998. Na long dispela sem yia, sinia gred sait bilong dispela klab i bin winim primiasip taitel.

"Sapos askim i kamap, I-Dodo ats tiata grup i redi long kamapim stail na pilai o mekim musik long ol

Madang pipel welkamim Gavana Jim Kas

MOA long 100 pipel bilong Madang, ol sapota bilong Gavana bilong Madang provins Jim Kas, ol pablik sevan na ol provinsel asembli memba i welkamim Mista Kas long Fonde las wik long Madang ples balus.

Ol bikman i go wantaim Mista Kas em Spika bilong Nesenel Palimen, John Pundari, Gavana bilong Sandaun John Tekwie, Memba bilong Aitape, Eddie Saweni, Memba bilong Telefomin Robert Sakias, Memba bilong Goroka Open, Henry Smith, na Memba bilong Karimui Nomane, Simeon Wai. Planti ol pipel i kraï taim ol i welkamim Mista Kas na deligesen bilong em long wanem insait long 6-pela mun olgeta Madang provins i no bin gat gavena husat i stap fri na inap wokim ol wok bilong provins. Sampela lain i bin mekim toktok tu long rausim Mista Kas olsem gavena taim em i bin stap long haus kalabus.

Dispela olgeta hevi i no liklik samting long Mista Kas, ol famili memba bilong em, ol sapota na ol gavman wokman. Olsem na long soim bikipela hamamas, Mista Kas i tenkim ol pipel bilong Madang long beten long em we i lukim kot i rausim em long kalabus. Em i tenkim tu komada na ol opisa bilong Beon haus kalabus husat i save larim meri bilong em na ol

wokman bilong em i go long givim em sampela toksave long kot bilong em na tu long wok bilong Madang provinsel gavman.

Em i givim bikipela tok tenkyu i go long meri bilong em bilong sanap long sait bilong em long taim bilong dispela bikipela hevi na strongim em oltaim i kam inap long taim em i winim kot na i kam ausait.

Mista Kas i go bek long Madang olsem wanpela fri man bihain long em i stap long haus kalabus long 6-pela mun olgeta. Nesenel Kot Jas Jastis Don Sawong i bin salim Mista Kas na ol plis opisa, Frank Faibison, Michael Jim na Rodney Tongau, i go kalabus long Novemba 5, 1998.

Jas Sawong i painim olsem ol i brukim mama lo bilong kantri long wanem ol i bin traim long bagarapim gutpela ron bilong wanpela Airlink balus long Madang. Dispela hevi i bin kamap taim Mista Kas i no bin go long ples balus long taim long Februari 21, 1998 bilong kisim balus na go long Hagen. Tasol Suprim Kot long Fraide Epril 30 i bekim bek sas bilong ol, na i tok olsem Nesenel Kot i mekim asua long painim olsem dispela foapela man i bin gat tingting long bagarapim wanpela balus, we wok painim i soim olsem dispela em i no bin tru.

HPL laikim Gavman givim tok orait long Ramu main

HIGHLANDS Pacific Limited i redi long kirapim Ramu nikel na kobalt main long Madang Provins tasol ol i wetim Nesenel Gavman long givim ol tok orait.

Insait long bikipela kibung bilong HPL long Mosbi las wik, Menesing Dairekta bilong HPL, Ian Holzberger i tok olgeta plen bilong kirapim namba wan hap wok bilong Ramu main i pinis tasol ol i wok long wetim Gavman long givim ol tok orait.

Em i tok nau yet olgeta pepa wok bilong kisim tok orait bilong Gavman long kirapim dispela bikipela main long wol i go het gut olsem ripot bilong 31 Mas, bilong

dispela yia i soim.

Mista Holzberger i tok insait long las kwata bilong HPL ol i bin glasim wanem ol samting ol i mas mekim bilong kisim tok orait bilong Gavman long kirapim Ramu main, wanem kain wok ol bai mekim taim main i stat, olsem: enjiniering, wanem ol gutpela samting inap kamap long dispela main, digim graun na painim moa nikel na kobalt long ol eria we i gat bikipela nikel na kobalt we ol i kolim Ramu Wes.

Mista Holzberger i tok tu olsem HPL i givim pinis Ramu nikel projek envairnmen plen i go long Dipatmen bilong Envairnmen na

Konsevesen bilong PNG, Madang Provinsel Gavman na ol papagraun.

Em i tok i kam inap nau HPL i kisim gutpela bekim long Nesenel na Provinsel Gavman wantaim na ol i soim bikipela laik na sapot long dispela projek.

Mista Holzberger i tok dispela i kamap ples klia long taim bilong toktok wantaim Gavman bilong PNG long kisim tok orait bilong wanpela Maining Developmen Kontrak (MDC) na wanpela Spesel Maining Lis.

Em i tok HPL i mekim wanpela draft MDC na givim i go long PNG

Gavman long Februari. Dispela MDC i soim wanem kain ol wok bai kamap long developmen bilong projek.

Nau yet HPL i wok long pinisim olgeta wok bilong MDC na Spesel Maining Lis we ol i ting ol bai pinisim long las kwata.

Mista Holzberger i tok tu olsem ol toktok bilong painim mani bilong kirapim dispela projek na tu painim maket bilong salim ol prodak bilong Ramu main i wok long go het gut tu.

Em i tok planti toktok i wok long kamap namel long ol intanesenel benk na ol bikipela kampani long

givim mani bilong kirapim Ramu main.

Em i tok sampela intanesel kampani HPL i wok long paitim toktok wantaim ol i redi long baim olgeta 100 pesen nikel na kobalt prodak long Ramu main. HPL i wok long glasim olgeta toktok ol lain i laik baim nikel na kobalt prodak i mekim.

Nau yet Dipatmen bilong Envairnmen na Konsevesen i wok long glasim olgeta toktok i kam long ol non-gavman ogenaisesen, Fiseris Sekta, na ol arapela gavman dipatmen bipo long em i ken tok orait o nogat long Ramu main i ken go het na mekim wok.

Porgera helpim ol famili husat i bungim hevi

KENNEDY EDENE i raitim



• PLANTI lain insait long kantri i lukim mama na kis long ol. Tasol tupela susa ya, Kau Omaro na Barbara Omaro bilong Baimuru i painim mama bilong tupela. Wantok i bin bungim tupela long susa ya long Mothers Day stret long Sande long 9-mail matmat taim tupela wantaim papa bilong ol Ipai Omaro i kamap long matmat long putim sampela plaua.

Mama bilong tupela Kirisi Evo'o i dai las yia, tasol lewa bilong tupela susa ya Kau na Barbara i sore stret bikos mama i stap long amamasim de wantaim tupela. Mothers Day i ken bringim gutpela sindaun na sampela i ken bringim sindaun sore, we Kau na Barbara ya i pilim stret long las wik Sande long Pot Mosbi.

OL pipel husat kisim bagarap long hai wara long Midel Flai eria insait long Westen Provins kisim pinis balus wantaim kaikai na ol saplai.

Pes lod bilong balus em pundaun long Aiambak na Wangawanga, tupela ples we i bin kisim bagarap tru.

Totol olsem 974 ol famili i gat bikipela hevi long kaikai long dispela tupela hap na long ripot bilong North Flai Disasta Komiti na provinsel inspekta, Saibo Ako.

Em i tok, em i no bin muvim ol kaikai pastaim bikos em i nogat balus.

Tupela twin-ota balus Ok Tedi bin baim long trenspot 3,000 kilogrem rais, flawa na kuing oil long Kiunga i go long Aiembak.

Wangawanga ples na ol arapela viles ol stap klostu long Aimbak, ol pipel yet bin go long ding i na bungim ol kaikai saplai bilong ol.

Foapela plisman go long balus olsem sekyuriti long ol kaikai saplais na ol i bin setim ap Redio komunikesen long Aiembak long yusim VHF Redio. Taim ol balus ol i wokim ol raun o sip bilong wara, MV Silvan Iodim, 15 tons ol kaikai long Kiunga bris long kisim i go long Manda, Bosset, Komovai, Obo na Kavianga.

Mista Ako tok 10-pela plisman na tupela soldia ol i was long ol sip.

Porgera Joint Venture kampani tok, insait long wanpela ripot, ol i wok long skelim wok na bai ol i givim han we ol i ting i ken givim.

Kampani tok i gat bikipela wari long welfea bilong ol pipel insait long lowa Strickland na Lake Murray eria na ol i wok long wetim ripot na ripot bilong disasta komiti long skelim ol i ken wokim wok bilong ol long eria i gat hevi.

Placer Niugini Mensesen Dairekta Mist Russel Barwick em askim long traim tu long dispela hevi.

Em i tok PJV bai rivium wok bilong em hariap taim disasta komiti givim ripot bilong ol.

Ol olupela kiap laikim mani

OL olupela kiap o ol distrik komisina i givim wanpela strongpela tok lukaut i go long Nesenel Gavman long luksave long wok ol i bin mekim long kirapim kantri na long peim ol kompensesen long wok ol i bin mekim.

Man husat i makim maus bilong olupela kiap na tu olupela edministreta bilong Lae Tony Bais i bin tokaut long las wik Fraide olsem em i bin putim wanpela sabmisen i go long ol minista husat i go pas na tu Praim Minista Bill Skate i long lukluk na peim kompensesen i go long 19 distrik komisina husat em ol i rausim ol long wok bilong ol bihain long taim bilong Independens na tu long taim bilong Provinsal Gavman.

"Aninit long nupela rifom na pablik sevis ritrensmen rot, olgeta wokman husat ol bai ritrensim ol, em bai ol i kompensetim ol. Na mi pilim olsem olupela kiap, em i moa gutpela long mipela tu i mas kisim kompensesen," Mista Bias i tok.

Em i tok ol i save tu olsem pol olupela politisen na provinsel gavman memba i bin kisim sampel kain luksave long wok ol i mekim.

Em i tok tu olsem em i kisim sapot bilong ol dispela 19 olupela distrik komisina long raitim dispela hap stori i go long gavman.



VAT

VALUE ADDED TAX

VAT BAI STAT LONG
JULY 1ST 1999



VAT INO NAP APIM PRAIS
LONG OL SAMTING
YU BAIM

TAKIS LONG KAKO IKAM INSAIT LONG
KANTRI BAI IGO DAUN NA SALES
TAKIS BAI PINIS.

LONG MOA TOKSAVE, LUKIM:
INTERNAL REVENUE COMMISSION,
P. O. BOX 777, PORT MORESBY
PHONE: 322 6655, FAX: 321 7962

AUTHORISED BY DAVID SODE, COMMISSIONER GENERAL OF INTERNAL REVENUE

PNG I NO REDI LONG VAT TAKIS VAT EM I NOGUT



*Kam harim na givim han long halvim Morobe Gavana, Hon. Son-Gan Luther Wenge long baim loya long kisim Nesenel Gavman i go long kot.
Yu yet kam na lukim, harim na givim ol sapot na bilip bilong yu long dispela det na ples long ol taun/sitis blong PNG*

PROGRAM

Taun/Siti	Provins	Date	Ples
Lae	Morobe	23rd April, 99	Eriku Oval
Pot Mosbi	NCD	15th May, 99	Sir John Guise Stadium
Mt Hagen	Westen Hailens	21st May, 99	Pope John Oval
Kundiawa	Simbu	22nd May, 99	Dicson Oval
Goroka	Isten Hailens	28th May, 99	National Park
Madang	Madang	29th May, 99	Laiwaden Oval
Kimbe	Wes Niu Briten	12th June, 99	Independence Park
Kavieng	Niu Ailan	19th June, 99	Kopkop Show Ground
Popondetta	Oro	26th June, 99	Independence Oval
Lae	Morobe	3rd July, 99	Eriku Oval

Sapos yu laik halvim dispela bung blong bungim moni bilong baim loya, hia ol Adres na Account No: 324-0061591 PNGBC, Lae.

Vat Fundraising Committee


P.O. Box 1834, LAE

Ph: 473 1501/472 6042 - Fax: 472 4745


Authorised by

HON. LUTHER WENGE, LLB MP
GOVERNOR
MOROBE PROVINSSEL GAVMAN

ROY MIRINGKE
NATIONAL CHAIRMAN



Lae Nius



Lae pipel laikim Skate Gavman long go

FRANCO NEBAS i raitim

OL pipel bilong Lae i laikim gavman bilong Bill Skate long go.

Long wanpela pablik forum (bung) long Eriku oval long Lae we oposisen membas i bin holim i soim memba planti manmeri na pikinini i laikim gavman long seniso

Dispela pablik bung em ol oposisen memba i wok long raun long kantri long toktok long ol pipel long kamapim gutpela gavman long ronim kantri.

Ol lain husat i bin kamap long dispela bung em, oposisen lida Bernard Narokobi, Ledi Carol Kidu, Sir Pita Lus, Bart Philemon, John Tekwei, Michael Nali, Sentral

Gavana Ted Diro, Andrew Baing na Micah Wes.

Long wankain taim yet long Fraide, ol i holim wanpela bung wantaim ol sumatin bilong Yunitek, Martin Luther Seminari na Balob Tisa Koles.

Dispela bung bilong ol i bin kamap long Balob Tisa Koles we moa long 2000 sumatin i bin kamap.

Gavana bilong Sandaun John Tekwie husat i bin stap wantaim Spika John Pundari long Madang na kamap joinim ol arapela opisels long Lae i tok olsem, nupela pati bilong spika John Pundari bai jonim oposisen long rausim gavman. Em i tokim ol sumatin olsem em i gat wanpela nupela singsing taitel, "Skate" mas go.

"Mi bin wok hat long senisim gavman yumi mas singim dispela

singsing kolim Skate mas go.

Mista Tekwie i tok olsem Praim Minsita i no wari long ol pipel long rurel eria na nogat gutpela tingting long ronim kantri.

Em i nogat sori long ol pipel husat i stap long rurel eria. Yumi gat lida we husat i no save long ronim o lidim kantri i go we.

I nogat gutpela plen na em no wari long wanpela samting. Yumi i no nidim em moa, em mas go Tekwei i tok.

Ol studen i singaut bek na givim bikpela sapot long ol oposisen.

Long wankain bung tu long Eriku oval ol pablik tu i givim bikpela sapot i go long oposisen taim Tekwie i tokim ol long larim dispela singsing ol kolim "Skate mas go."

Ol pablik long Eriku i givim bikpela sapot stret taim oposisen

lida askim ol husat i laikim Skate gavman long go mas putim han i go antap.

Olgeta han i bin go antap na bekim olsem Skate mas go wantaim edvaisa bilong en Dokta Hamidian Rad.

Ol pablik i bin askim taim long givim askim bilong ol i go long oposisen long ron bilong kantri nupela VAT takis lo we bai kamap long Julai.

Morobe Gavana Luther Wenge na Lod Meya bilong Lae siti Toffamo Mionzing i bin stap long dispela pablik bung bilong oposisen tu.

Gavana Wenge husat i go pas long kot bilong VAT lo i kisim taim tu long toktok long dispela bung.

Wenge i tok, em i amamas long dispela bung we opo-

sisen i holim na laikim tu gavman mas mekim wankain.

Em i tok, bipo long oposisen long fomim gavman, ol i mas stretim beksait bilong ol pastaim, long wanem mi no laikim wankain hevi i kamap long ol pipel bai kamap gen.

Em i tok "bihain long 23 yia i no gat rot i bin kamap na ol pipel i kisim taim inap pinis, "inap em inap."

Dispela em namba tri provins ol oposisen i raun mekim dispela pablik bung. Ol hap ol i go pinis em, Madang na Goroka na ol i kisim wankain sapot. Ol bai holim wanpela long Sauten rijen bipo long palamen stat long Julai. Long dispela taim tu ol i givim bikpela sapot long Gavana Wenge long stapim VAT lo.

MELSOL sapotim oposisen long senisim gavman

WANPELA Non-Gavman Ogenaisesen (NGO) grup long Lae Melanesia Solidarity (MELSOL) i givim bikpela sapot i go long oposisen long senisim gavman long Julai.

Siaman na man husat i go pas long MELSOL politikel wing Mista Kiri Mala i tok dispela Skate gavman i mas i go long wanem em i no givim ol sevis i go long pipel bilong Papua Niugini.

Mista Mala i mekim dispela toktok long wokbung wantaim ol niusman long las Sande bihain long raun bilong ol oposisen long Lae.

Dispela raun bilong oposisen em long toksave long ol pipel long gutpela gavman long ronim kantri.

Mista Mala i sapotim mov bilong Spika John Pundari long fomim nupela pati na i askim em long joinim han wantaim oposisen lida gavman long Julai.

"Ol prais bilong samting i go antap long 22 pesen na taim VAT i kamap long Julai bikpela hevi bilong mani bai kisim ol pipel, lo na oda i bagarap na gavman i makim na rausim ol man nabaut long dipatmen. Dispela olgeta samting i wokim we kantri bai go bagarap olgeta," Mista Mala i tok.

Long dispela as em MELSOL i kamapim woa long gavman," em i tok.

Mista Mala i tok MELSOL i pilaim bikpela wok ong fomim gavman bilong Skate long sevim PNG long Wol Benk, tasol gavman i salim kantri i go long han bilong Wol Benk.

Em i tok, foma Gavana bilong Isten Hailens Peti Lafanama na Westen Hailens Gavana Fr Robert Lak i bin giaman na winim ileksen long Anti-Wol Benk na Intanesenel Monitori (IMF) Fan 44 metriks bilong Papua Niugini."

Mista Mala i tok em bai bungim ol memba bilong MELSOL na pipel bilong PNG long pait strong long rausim Gavman bilong Bill Skate long mun Julai.



• Morobe Gavana Luther Wenge wantaim Sentral provins Gavana Ted Diro i sanap bungim ol pipel bilong Watarais long Makam long las mun. Mista Wenge i strongim dispela kempen bilong salensim lo bilong nupela takis (VAT) long kot.

Fan reising long stapim VAT lo i stat

MOROBE provins i statim pinis fan reising long stapim VAT (takis) lo i kamap long Papua Niugini long Julai.

Dispela fan reising kempen em long mekim mani long kotim dispela VAT lo gavman i laik kamapim long mun Julai.

Gavana bilong Morobe provins Luther Wenge na Morobe Provinsal Gavman i go pait long kisim stet i go long bikpela kot bilong kantri long stapim dispela VAT lo i kamap.

Long kisim dispela hevi i go long kot bai lukim ol loya bilong

Gavana Wenge, Pato loya bilong Pot Mosbi bai nidim mani olsem K1 milien olgeta.

Long painim dispela kain mani, Mista Wenge i mekim awenes kempen long reising mani long olgeta hap long provins bilong em.

Long las Fraide, em i lonsim fan reisin kempen bilong em long Watarais viles ausait long Lae.

Gavman bilong em i putim K440,000 long statim dispela fan reising we bai i go long olgeta hap long provins. Dispela mov bilong mekim fan reisin i lukim planti sapot i kam long ol pipel bilong

Menyamy, Wau, Bulolo na Watarais taim em i statim dispela fan reising tupela wik i go pinis.

Long taim em i lonsim dispela fan reising long Watarais viles insait long Makam Veli, Mista Wenge i tokim ol pipel olsem dispela VAT i kamap bai bringim bikpela hevi bilong mani stret i go long ol pipel na bisnis haus long kantri. Mista Wenge i tok, "taim dispela VAT lo i kamap long mun Julai, en bai bagarapim yumi stret long ol liklik mani yumi gat long en o mekim we bai yumi peim 10 pesen takis i go long gavman long

olgeta samting na sevis.

"Yumi kisim inap bagarap long han bilong gavman, nau ol pipel mas sanap wantaim na kisim nesanel gavman i go long kot long stapim dispela VAT lo," em i tok.

Em i tok olsem 28 lokol level gavman kaunsel presiden long 9-pela distrik long Morobe provins bai ol wanwan i givim K10,000 i go long helpim dispela fan reising.

Long wankain taim tu, Gavana Wenge bai i go long ol arapela provins long mekim dispela fan reisin kempen na tokaut long hevi bilong VAT Lo.

Lae mog i op gen

ANGAU memoriel haus sik Mog i op gen bihain long em i pas taim ol masin bilong putim ol dai manmeri i bagarap long las mun.

Bosmeri bilong Angau Haus sik Margaret Samei i tok olsem ol masin i bin bagarap na ol wokman i piksim pinis. Olsem na ol manmeri dai ol i ken putim insait long frisa bokis.

Dispela wok bilong stretim ol frisa i bin kisim 3-pela wik long stretim ol dispela masin.

Morobe edministresen i bin luksave long dispela hevi na givim pinis K20,000 long stretim wari bilong ol lain long haus sik.

Dispela mog em ol i bin wokim long putim 12-pela dai bodi tasol wei ol lain long mog i save putim satming olsem 36 long wanwan taim. Dispela em abrusim mak bilong mog. Dispela tasol i givim hevi long ol frisa bokis i bagarap.

Moa bodi tasol i mekim na ol masin i bagarap long las mun. Olsem na mipela i bin planim long las mun yet." Misis Samei i tok.

"I gat ple nau i stap long karim namba bilong ol dai lain i go antap long samting olsem 40 dad bodi long ol wanwan taim long mog." Wapela ripot i kam long haus sik i tok olsem.

Misis Samei i tok ol i bin putim wapela singaut i go long ol lain AusAid bilong Australia na ol i bekim tok olsem ol i kisim dispela pas pinis na wok long lukluk long en. Sapos dispela luksave i kamap ples kliia orait ol bai traim long wokim sampela samting bilong mog.

Gavman bilong Japan i bin harim singaut bilong ol na salim wapela kontena long stat bilong dispela yia. Nau yet ol i yusim dispela na wetim dispela ol samting we ol wokman i wok long stretim.

Ukata bai lusim Kote distrik

WOK bung namel long ol sios na ol gavman lida long sevim ol pipel em gutpela pasin na gutpela marasin tru bilong stretim tingting na save bilong wanwan manmeri long sindaun gut. Dispela em toktok bilong memba bilong Kabwum Ginson Saonu.

Stat long Mei 10 inap 16, wapela bikpela kos bilong olgeta pasto bilong ELC-PNG Ukata distrik i bin kamap long Saune ples long Kabwum ilektoret long Morobe provins. Dispela em namba wan kos bilong ol pasto bihain long ELC-PNG Ukata distrik i kamapim bilong lusim ELC-PNG Kote distrik. Bai Ukata distrik i sanap bilong em yet.

Memba bilong Kabwum Ginson Saonu i bin mekim wapela raun i go long dispela bung insait long ilektoret las wik we em i givim sampela helpim long sapotim kos ya wantaim ol kaikai, T siot, ekse-sais buk na pen long mekim wok wantaim.

Mista Saonu i tok em olsem



• Memba Ginson Saonu i sanap wantaim ol sios lida bilong Langa paris na em i givim long kos bilong pasto.

lida insait long wok bilong gavman i amamas long sapotim wok bilong ol pasto long go aut na telimautim gutnius bilong Bikpela long ol pipel bilong yumi. Dispela pasin bilong ol sios lida na gavman i wok bung wantaim i gutpela piksa na mak bilong wok bung i ken kamap gut bihainim we tupela

grup wantaim i mas wok bung long sevim ol pipel bilong yumi, Mista Saonu i tok.

Tude i gat ol nupela tingting na nupela aidia olsem na ol pasto i mas i gat moa kos olsem long skulim ol manmeri bilong tude.

Tingting, aidia na bilip bilong bipo i narakain long bilong nau.

Olsem na kain kos olsem bai helpim ol pasto long kisim nupela tingting, save na aidia long helpim pipel bilong yumi, olsem na mi givim sapot bilong mi i kam, Mista Saonu i tok. Moa long 70 pasto i kam long olgeta hap bilong ELC-PNG Ukata distrik long stap insait long dispela kos.

Botha go bek long Australia

WANPELA waitman husat i bin kisim taim tupela yia mekim-save, i go bek long Australia long las wik.

Mista Bruce Botha bilong Australia husat plis i bin sasim em long 1997, long spak brus. Plis long Lae i bin lokim Mista Botha long sel taim em i feil

long kisim kot oda long stopim dipatmen bilong Foren Afeas long noken salim em i go bek long Australia.

Plis long Lae i bin tok olsem Mista Botha i bin kisim balus long Lae i go long Pot Mosbi, na bihain i go long Cairns long Australia.

Mista Botha i bin kisim kot oda long stopim Minista bilong Foren Afeas Mr Roy Yaki long noken salim em i go bek long Australia hariap.

Dispela em long wanem Mista Botha i laik putim wapela kot apil long dispela 20 mun mekim save na tu long

human raits aplikesen.

Tasol nesanel kot jas Salamo Injia long las wik i bin tok olsem dispela kot oda em bai i no inap kisim, long wanem em i nogat pepa long stap insait long kantri.

Gavman i bin givim dispela pepa long las yia yet.



LAND CRUISER 4WD UTE

Em i gat nem olsem wapela strongpela kar. Land Cruiser 4WD Utiliti em i kar bilong mekim wok. Sapos yu nidim wapela hevi duti Utiliti we i no inap hambag na inap kisim yu i go na kam bek gut.

Toyota Land Cruiser 4WD Utiliti i kisim sapot bilong Ela Motors Genuan Pats na Kualiti Sevis long olgeta hap long kantri



EM6410A

KAM TUDE NA TOKTOK WANTAIM OL SELS TIM BILONG MIPELA LONG NAMBawan OFA INSAIT LONG-TAUN.

PORT MORESBY 3229400 • LAE 4722322 • KOKOPO 9829100 • RABAUL 9829188 • MADANG 8522188 • GOROKA 7321844 • MT HAGEN 5421888 • WEWAK 8562255
KAVIENG 9842132 • KIMBE 9835155 • TABUBIL 5489060 • VANIMO 8571254 • PORGERA 5479367 • KUTUBU 5496685 • BUKA 9839915 • LIHIR 9864099 • ALOTAU 6410100

Ela Motors



Agrikalsa
laik
strongim
hevi bilong
kaikai

KENNEDY EDENE
i raitim

NUPELA fud plen long helpim ol rurel asples em dipatmen ov Agrikalsa na Laivstok i wok long stretim.

Nau yet Agrikalsa na Laivstok dipatmen i wok long kamapim wanpela bikpela polisi o pepa long fud sekyuriti o hau long wokim kaikai gut.

Draf polisi pepa wok em bai pinis klostu na bai ol i givim i go long ol wanwan dipatmen olsem Helt Dipatmen, ol fud industri kampani privat sekta na ol fama husat i gat sampela komens na sampela toktok bai ol putim.

Ol sinia opisa bilong ol dipatmen na gavman na provinsel opisa bin kamap long dispela 3 de woksop long Loloata Island Resort klostu long Pot Mosbi las wik long stretim dispela draf polisi pepa.

Agrikalsa na Laivstok bos Utula Samana husat bin opim dispela woksop tok dipatmen bilong em bai askim ol arapela ejensis na ol fud industri insait long agrikalsa sekta olsem ol famas long kisim tingting bilong ol long kamapim gutpela fud sekyuriti polisi bilong kantri.

Mista Samama tok i gat planti ol toktok insait long fud industri we ol i mas glasim gut.

Em i tok astingting insait long dispela nupela fud polisi em long kirapim fud progrims em bai stap olgeta taim na bai benefitim ol rurel populesen.

Dispela nupela fud polisi bai adresim ol ki fud progrims olsem rais na grein, fres produs na diwai krops, ol kaikai bilong ples, laivstok olsem sipsip, bulumakau, meme na ol pis na oil bilong mekim kaikai wantaim.

Fud produsen nau yet em i wok long kamap long wanpela pesen long wanwan yia, we em i 1-3 pesen bihain long populesen groa.

Em i luk olsem kantri bai bungim wanpela bikpela fud saplai wari o fud sekyuriti, i no long taim.

I gat sampela wari olsem graun hevi, graun wok long lusim planti gutpela gris bilong em i nogat gutpla sevis na liklik wara na nid long givim moa sapot.

Long dispela woksop ol tok sampela bilong ol samting i bagarapim fud industri em i nogat gutpela wokbung namel long olgeta fud progrims, nogat gutpela sapot sistem na nogat daun strim proses na prisevesen long ol agrikalsa produs o kaikai.

Nupela singel bareks bilong Kiunga plisman

NUPELA plis bareks long Kiunga, Westen provins i bin op pinis na 15 singel plisman i gat haus bilong ol long slip na mekim wok.

Bikpela maining kampani, OK Tedi maining Limited i bin kamapim dispela haus aninit long Nesenel Gavman Takis kredit skim we OK Tedi i save givim.

Long taim bilong opim ol dispela singel plis bareks, Asisten Komisina Joseph Kupo i kisim ol ki bilong haus na tok amamas i go long OK Tedi maining kampani na Nesenel Gavman long luksave long hevi bilong haus we plis dipatmen i save

bungim. Dispela singel plis bareks i kos olsem K400,000. Mista Kupo i tok taim em i go bek long Mosbi, em i bai askim Sauten rijon komand long salim 10-pela nupela plisman i go long Kiunga long wok wantaim ol plisman long hap aninit long Not Flai boda komand.

Not Flai Komand i karamapim Kiunga. Nomad we i gat tupela plisman Lek Mari wantaim wanpela plisman, Aiyambak we i gat ol risev plisman tasol, Tabubil we i gat 30 plisman na meri na tu ol risev, Olsobip we i nogat plisman long en na Nigerum we i gat 6-pela plisman

tasol. Mista Kupo i tok amamas long maining kampani long helpim wok bilong plis fos long strongim wok bilong lo na oda insait long Westen provins.

Dispela projek i bin kamap bihain long Provinsal Plis Komanda Saitb Ako i raitim pas long 1996 tasol dispela wok i no kamap gut taim bikpela hevi bilong bikpela san na drai i bin kamap long kantri. Inap dispela yia, ol i statim gen dispela projek.

Dispela 15 plis bareks i gat olgeta samting we ol plisman i ken yusim long kuk, waswas, wasim kolos na

arapela samting bilong helpim ol plisman wantaim long bareks.

Dispela plis bareks em wanpela long planti arapela projek we i bin kam aninit long Takis Kredit Skim. Ol arapela projek we i bin kamap long dispela rot em long 5-pela nupela haus bilong ol tisa long Kiunga hai skul na tu haus bilong ol singel sista long Kiunga haus sik.

Ol arapela projek we i stap yet long plen em Daru Koreksenenel Sevis we i gat ol haus, ples bilong kuk na mes na tu liklik klinik bilong ol woda.

Ol wokman painim pis long Kiunga...

Sapos yu stap long Star Maunten long Westen provins bilong Papua Niugini, ples bilong painim pis i stap klostu tasol long Kiunga.


Olsem na ol wokman bilong Ok Tedi maining i save raun i go daun long Kiunga long malolo taim bilong ol long painim pis.

Olsem na dispela Samarai man, John D'Siguria husat em Ok Tedi Rekriesen Supavaisa long Tabubil i bin go daun long Kiunga las wik Trinde na baim ol dispela pis long mama ya, Komang Rona bilong ples Kawok.

Mama ya i salim pis long K8. wanwan na man bilong em Bill Woka i save helpim long wokim umben bilong kisim pis.

I no olsem pis tasol, Kamong i save pulim ol malio, kindam na arapela abus bilong solwara we em wantaim famili bilong em i save kaikai wantaim saksak, banana, taro na yam.

Foto: PATRICK LEVO



Avei askim ol opisa long wok gut

I NOGAT planti developmen bin kamap insait long Sentrel provins long wokim wok bilong rifom aninit long Ogenik Lo bilong Provinsel Gavman na Lokol Level Gavman.

Dispela toktok em Kairiku Hiri memba Moi Avei bin tok long sinia opisels woksop bilong provinsel edministresen bilong Sentrel provins long wik i go pinis.

Mista Avei husat bin siaman long dispela miting tok long ekspriens bilong em insait long 14 mun insait long Sentrel Provinsel

Edministresen, planti ol opisas soim liklik interes na ol i nogat tingting strong long ronim provinsel gavman rifoms we Nesenel Palamen bin tok oraitim long kamapim.

Yumi olgeta save long wiknes bilong yumi long kalsa we yumi save toktok tumas taim yumi save i gat sampela samting long wokim.

Yumi save i gat sampela samting long wokim. Yumi save toktok tumas westim planti taim long tokim olgeta manmeri na lus

tingting long wanem samting i tok yumi mas wokim o yumi laik wokim, Mista Avei tok.

Em i tok yumi olgeta i gat save long wok we wok yumi laik mekim long arapela divisen nogat tru askim save kamap long stretim wari em long kisim risal.

"Yumi mas nau stretim yumi yet long hau long kamapim gutpela risal we yumi laikim na noken tingting na wok olsem pasin bilong bipo olsem tumbuna taim.

"Em i wok bilong ol opisa husat i sevim provinsel edministresen long stat na sensim, Mista Avei tok.

Mista Avei tok em i no amamas husat opisa husat save wokim liklik o giaman toktok long karamap long asua bilong em long wokim wok bilong em.

Em tok, Nesenel Palamen em pasim Ogenik lo long Provinsel Gavman na Lokol Level Gavman olsem na nau senis bai kamap we bai givim ol rurel pipel o eria bai helpim ol wantaim gutpela rot.

Aroma kos opim liklik klinik

HELT Minista Ludger Mond las wik i opim wanpela ed pos long Maopa namba wan long Aroma kos insait long Sentrel Provins.

Dispela ed pos em ol pipel buildim na em i kostim ol pipel long K10,000.

Long opim dispela ed pos Mista Ludger Mond tokim ol pipel olsem em i amamas bikos ol pipel yet i go pas long stretim hap sevis ol yet, ol i no bin wet long helpim long gavman.

Em i tok, yupela i no bin wet long gavman olsem planti ol komuniti tude save wokim insait long Papua Niugini.

"Em nau soim, sapos ol pipel laikim helt senta, em bai tu ol bai gat bikpela wok long lukautim ol projek bilong ol na bai ol was long em long ol birua man i noken bagarapim na tu bai ol i gat tingting long mentenim dispela.

Mista Mond tok em i bin dairektim ol gavman long bilong gavman lon long Asien Developmen Benk we ol i kolim Helt Sekta Program long fandim.

Na moni em ol i yusim long buildim haus i bilong helt woka na sampela i go long Helt dipatmen long Konedobu eria medikol stoa long saplaim marasin i go long haus sik na sampela samting bilong wok.

Mista Mond bin givim K2,000 sek i go long siaman bilong ed pos Kapana Kalei long ol i opim akaun na yusim bilong ed pos projek.

Ed pos em ol i bin buildim pas-taim long 1996 tasol bin pas bikos long kros bilong graun na ol birua man bin bagarapim sampela samting bilong ed pos.

Na dispela yia ol pipel laikim haus sik na stretim gen.

PNG BUSINESS

May I su

I KAMAUT PINIS



Baim wanpela kopi nau!

Em i 70t taseh

WANTOK Spot Wilken

Boksing i no dai yet

WEWAK BOKSING RIPOT

BOKSING em i wanpela spot insait long Is Sepik we em i no save kisim tumas gutpela luksave na helpim insait long Is Sepik provins.

Spot ya em i liklik na i stap hait bilong wanem, wanpela as em ol man husat i save go pas long spot i no promotim o i no ranim gut. Na wok bilong painim sponsasip tu i hat tru bikos planti i no save laik givim helpim.

Narapela samting gen em i nogat husat inap givim fultaim bilong em long trenim na kosing ol yangpela boksa.

Wantok i painaut olsem Wewak Amatsa Boxing Lig i stap yet, tasol i no man long sapotim developmen bilong boksing insait long provins. Tupela man husat i save wokim dispela wok i dai pinis long stat bilong dispela yia. Na John Sopa na Patrick Waimbli i no soim pes nau long Wewak tasol ol klab i stap yet. Wantok i bin painim stori bilong boxing insait long provins i go na i bin bungim wanpela yangpela fatman bilong Wewak boxing klab na i bin stori liklik wantaim em.

Wantok i bin bungim Elvin Wafe na husat i save pait long 49kg na i painim aut olsem em i wanpela sempion boksa bilong Sepik. Elvin i gat 15 krismas nau na i bin makim Wewak boxing na i bin pait long Junia sempionship long Bulolo, em i ait tu long pablik taites, em i bin kamap sempion paitman bilong Seik taim i kisim gol medal long nesenel taitel.

Wewak nau i gat 3-pela boxing klab olsem Wewak, Yarapos na Kanauki.

Wewak i bai holim wanpela provinsel tonamen long Jun 24-25 long dispela yia. Kanauki distrik bai go pas long holim dispela tonamen.

Motorist Discount Centre sponsarim Wewak Royals

WEWAK LIG RIPOT

MOTORIST Discount Centre long Wewak i amamas long givim sponsarim Royals Ragbi Lig klap long dispela yia.

Brens Menesa long MDC long Wewak Fred Narte i tokim Wantok long Wewak olsem i tru kantri i bungim hevi log mani na planti bisnis i pret long givim sponsa i go long ol spot tasol kampani bilong em i amamas tru long sapotim klab bilong ol plisman.

Em i tek em i bilip sponsasip bilong em bai helpim planti ol yangpela husat i pilai long Royals long luksave long helpim em i givim na bai i ken spendim taim bilong ol long spot na noken painim hevi long pasin bilong raun nating.

Narte tok sponasip bilong em tu em long helpim polis long go klostu moa long komyniti long pasin bilong spotmansip. Royals klab i amamas long sponsasip bilong MDC na i givim bikipela tok tenkyu i go long Narte.

Royals em i polis klab tasol planti ol yut husat i pilai long klab bilong setlemen na planti bilong ol i no wok olsem na sponsasip bilong MDC em i bikipela samting we bai sapotim tru involmen bilong planti ol yut.

Ol papamama i no amamas

OL PAPAMAMA bilong ol pikinini long Lae husat istap long PNG Anda 17 skwat i no amamas tru long toktok bilong presiden bilong Orogen Skulbois Soka long Pot Mosbi Joe Heenan.

Las wik Heenan i autim risen watpo em i lusim wok olsem asisten kosa bikos tupela memba bilong PNG Anda 17 tim, krismas bilong ol i abrusim 17.

Heenan i tok em i lusim wok namba tu kosa long bihain tok tru (honesti) long taim bilong makim ol pilaia.

Ludwik Peka, wanpela papa husat em i gat pikinini i stap long tim i tok pasin Heenan i mekim i no gutpela tumas. Sapos Heenan i gat dispela kain hevi orait em i mas stretim long PNGFA level.

Peka tu i no amamas long bikipela brata bilong em, John na Richard Nagai husat i sapotim Joe Heenan.

John Peka i laik PNGFA i mas rausim tim long tonamen taim ol i stap long Fiji na Nagai i tokaut long olsem pilaia husat i stap long klab bilong em long Lae, krismas bilong em abrusim 17 pinis.

Ludwick na John em tupela brata, na tupela wantaim i bin makim PNG long pilai soka bipo.

Peka i tok dispela tupela pilaia we toktok i kamap long ol em i bin stap long skwat bilong em. Na sapos Heenan i gat hevi long dispela ol pilaia, em i no laik toktok wantaim em.

Heenan i bin toktok wantaim PNGFA longpela taim tru long stretim hevi bilong krismas bilong ol pilaia. Tasol ol PNGFA opisel na tu menesmen, Ellison Lapan na Moses Demas i haitim dispela hevi na larim ol pilaia i go long Fiji.

Peka i tok i tru Heenan i mekim gutpela wok long strongim soka Pot Mosbi, tasol em i mas tingim, PNG i mas kam pastaim. Heenan em i olsem visita long kantri.

Olpela nesenel kosa i tok sapos ol i gat hevi, ol i mas stretim isi tasol na dispela kain nius i no gutpela long ol sponsa. Tupela bikipela kampani olsem MRDC na Orogen i givim bikipela mani long strongim wok bilong skul na yut soka insait long kantri ya.

Golkipa Mondo sevim Telikom

LAHI SOKA RIPOT

FRANCO NEBAS i raitim

GOL kipa Luwe Mondo i sevim de bilong Telikom bihain long ol i dro wantaim Guria 0-0 long bikipela kik resis bilong Lahi Soka Asosiesen.

Mondo husat i wok hat stret long rausim ol strongpela kik i kam long straika bilong Guria.

Maski Telikom i lusim planti pilaia bilong en i go joinim arapela klab, stail na strong i stap ye wantaim ol lain i stap yet.

Kepten Gidix Nasa, midfielder Michael Yaglim, Abia Abia, Robert Titus, James Micah na brata Amos na Ambros i putim kamap gutpela gem long Sande.

Guria tu i bin kamapim gutpela pilai tasol straika bilong ol i no save painim umben. Ol i mas guria na save popaia stret taim ol i kam lukim Mondo.

Nambawan straika John Kalin na Paul Keto i bin traim hat long skoa tasol nogat sans stret.

Guria i bin gat moa sans long Telikom long namba tu lap we Zesky Wingo na Herman Apiso mekim gutpela kik long setim ol straika bilong ol tasol ol i no sutim wanpela gol.

Kosa bilong Guria Richard Nagai i tok olsem dispela em i gutpela gem stret namel long tupela tim ya. Nagai i tok, "dispela i as long longpela malolo bihain long pri-sisen resis i lukim ol pilaia i no redi gut yet.

Tasol em i tok olsem sapos tupela tim ya i putim kamap wantaim stail pilai bilong ol mekim las wiken bai lukim tupela mekim i go insait long fainels.

Em mekim tok amamas i go long gol kipa Mondo husat i putim kamap gutpela pilai long sevim planti gol.

Kepten bilong Telikom Gidix Nasa i amamas long olgeta pilaia bilong em long gutpela gem.

Em i tok ol straika i no pinisim gut ol gem plen we i nogat wanpela gol i kamap. Dispela hevi em ol bai lukluk long en long taim bilong trening.

Long arapela gem Unitech wilwilim stret Difens 7-0.



• Straika bilong St Peters Anda 10 Anui i redi long straikim bal egens long Korobosea long Orogen skul soka resis long Pot Mosbi las wiken. St Peters win 2-0.

Tigers Unda 19 kaikaim Eels

PAUL FUZO i raitim

WEWAK CAMBRIDGE Ragbi Lig Asosiesen i statim pinis sisen propa bilong em long las wiken.

Resis i bin stat long anda 17, anda 20, risev na A gret.

Wanpela gutpela pilai bilong ol juniar grets i bin stap namel long anda 19 tim bilong Eels na Tigers.

I bin gat planti ol sapota i bin kamap long sapotim dispela tupela tim. Dispela gem istat long 3.30pm stret. Insait long namba wan 10 minit bilong pilai, tupela

sait wantaim i bin putim kamap strongpela pilai long difens na attek.

Eels husat i lusim planti gutpela bals insait long takol na tu ol i dropim nating planbti bal, na dispela i bin givim Tigers sans long salim ol fowat bilong em olsem Phidie Mengs na Nilk Iri long painim spes insait long difens bilong Eels na meknaisim.

Tigers husat i bin luk strong tru, i bin wokim planti ol gutpela strongpela ran long fotwat lain. Dispela i bin mekim difens bilong Eels i bin seksek.

Insait long 15 minit Tigers i salim fowat Nilk Iri i go pun-

daun long trai lain bilong Eels. Kik bilong fulbek Peter i bin gutpela na i apim skoa bilong Tigers i go antap 6-0.

Pilai i bin i go strong tru. Eels i putim bikipela presa isnait long ol hit aps runs long ol fowat bilong em olsem Desmond Gawi na Larry Baramun i bin surikim difens bilong Tiger i go klostu long tri lain bilong ol 15 minit bipo long hap taim.

Gutpela tingting bilong hapbek bilong Eels Joshua Sasindu husat i bin kisim bal gut long skram na i lukim liklik spes na go pundaun stret long

trai lain. Konvesen kik i gutpela na skoa i stap 6-6.

Long seken hap bilong pilai, Eels i bin luk gutpela sait tru wantaim ol strongpela ran long fowat na ol gutpela bal long beklain.

Planti gutpela ran i bin kamap long David Jalliau long wing tasol difens bilong Tigers i bin strong na i no bin givim sans long em long painim spes.

Liklik asua i bin kamap long Eels na fulbek bilong Tiger Peter Karo i kikim wanpela penalti kik long apim skoa bilong Tiger i go antap long 8 poin na Eels six poin.

Vipers nekim Bulls

SP KAP RIPOT

HENRY MORABANG i raitim

CAMBRIDGE Vipers i holim namba tu ples long poin lata bihain long em i wilwilim NBOPL Kimbe Bulls 30-18 long SP Kap inta siti kompetisen las Sande.

Dispela gem i bin kamap long Llyod Robson oval long Pot Mosbi.

Na long ol arapela inta siti gem, Rabaul Guria autim Waghi Tumble 9-8. Dispela em i namba wan lus bilong ol boi Westen Hailens.

Mt Hagen Cambridge Eagles nekim LBC Bombers 20-12 na Cambridge Lahanis nekim Toyota Enga Mioks 18-

14. Vipers i hatim bun stret long las minit na winim dispela gem. Tupela pilaia Mark Mom na Leonard Tarum i go pas long dispela gutpela win bilong ol boi long Mosbi.

Tarum i winim Man of the Match awot bikos em i mekim gutpela pilaia stret. Em i go pas long lidim tim na difens bilong em i gutpela stret.

Vipers i mas stretim em yet long sait bilong holim bal gut insait long takol. Ol i lusim bal planti taim tru na dispela samting, kosa Joe Katsir i mas tingting long dispela.

Fowat na beklain bilong Vipers i save pretim tru Bulls taim ol i holim bal ya. Ol lain olsem Fred Leo, Kera Ngaffin, Michael Marum, Nick Andy na Robert Volu na Simon Rumet i pilai strong ya.

Kimbe Bulls tu i kamapim gutpela gem. Ol fowat na beklain i mekim wok tasol hapbek Alfred Gorea i no save tromoi bal i go long beklain long skoa.

Samting olsem 15 minit i stap, Bulls i go pas long skoa 18-16. Tasol ol i no difen gut na Vipers i kam skorim tupela las trai long win.

Ol lain i pilai gut tru long Bulls em riserv fowat Henry Hairoy, John Pawa, Paia Pakio, Webster Pomba, Sylvester Poogau, Paul "maliao" Nelson na Francis Paul.

Kimbe Bulls i opim skoa buk. Paul Nelson i kikim wanpela penalti na ol i go pas long skoa 2-0.

Tasol Bulls i no was gut na Vipers skorim tripela trai Colin Geno, Jacob Kenosi na

Leonard Tarum. Kepten Mark Mom i kikim tupela konvesen na ol Vipers i go pas long skoa 16-2.

Tasol riserv fowat bilong Bulls Webster Pomba i putim wanpela trai na skoa i sanap 16-6 long haptaim.

Na long namba tu hap, Bulls i skorim tupela trai. Namba wan trai i kam long Alfred Gorea na Joseph Kavon. Orait Gorea i kikim konvesen na ol i go pas long skoa nau 18-16.

Orait Vipers i no wari. Ol i pilai i go na Simon Rumet i skorim wanpela trai na bihain liklik Nick Andy i putim arapela na las trai em stail mangi, Robert Volu i tanim tanim olsem maliao na go putim wanpela trai long sent stret we Mom i kikim konvesen long win 30-18.



• NBOPL Kimbe Bulls tim i kisim poto bipo long ol i salensim Pot Mosbi Vipers long Sp kap resis long las wiken. Vipers i win 30-18.

Royals daunim kambang bilong United

RABAU LIG RIPOT

ROYALS i wok long mekim nais yet long Rabaul ragbi lig kompetisen. Na las wik Sande tasol ol i nekim stret Kokopo United long asples bilong ol yet 12-4.

Tupela tim wantaim i pilai strong tru. Fowat bilong Royals Robert Arapa i putim namba wan trai na skoa i sanap 4-0. Konvesen kik bilong Paul Peni i no go insait.

Kokopo United tu i namba ya. Ol i no wari long kain pilai bilong Royals. Ol i pilai i go na Thomas Willie i kikim wanpela penalti na skoa nau i sanap olsem 4-2.

Tupela tim wantaim i pilai i go na Emmanuel Kilala i putim namba tu trai na skoa i go long 8-4.

Orait Arapa i putim las trai na skoa long fultaim i sanap olsem 12-4.

Skoa bilong ol arapela gem i sanap olsem Vudal Cowboys i winim Waragoi Storms 12-4, Kokopo Muruks wilwilim stret Bitapaka Souths 32-6 na Balanatanan i bai.

Eddie helpim Defence long win

PRL RIPOT

SENTA bilong Defence Peter Eddie i skorim 4-pela trai long helpim tim bilong em long winim Hanubada Hawks 36-34 long bikpela gem bilong Pot Mosbi long Sarere.

Dispela win nau i putim Defence long namba tri ples bihain long Gulf-Wests na Souths.

Bikpela nius bilong mekim ol lain guria em Brothers i winim Gulf-Wests 36-34. Planti sapota bilong ragbi lig i ting Wests bai win tasol Robin Kafie wantaim ol Brothers i no save wari.

Kafie i tok em i amamas tru long dispela win bikos dispela bai helpim ol tim bilong em long pilai strong.

Royals i autim Gerehu United 21-20, Paga i winim Dobo Warriors 34-24 na Souths autim Kone Tigers 20-14, Waliya nekim Post Puma 20-10 na Tarangau winim Magani 11-10.

Gem namel long Defence na Hawks i wanpela paia lait gem stret ya. Namba wan trai i kamap insait long 5 minit we Peter Eddie yet i putim.

Faiv-et bilong Defence Luke Waldiat i statim dispela muv we Ronald Vue, Clement Marisa na Garu Kuri i setim Eddie long putim trai. John Kondi i kikim konvesen na skoa i sanap 6-0.

Waldiat i putim namba tu trai na Eddie i kikim konvesen na dispela i hapim skoa bilong Defence 12-0.

Ol fowat bilong Defence Warren Teno, David Mombam, Vue na Marisa i wok long pilai strong tru long winim bikpela graun.

Fulbek bilong Defence Nande Desmond husat i save joinim beklain long wokim ekstra man i setim Eddie long putim namba tu trai bilong em. Dispela i surikim skoa i go long 16-0 tasol riserv fowat bilong Hawks Lohia Ben Moide i putim wanpela trai na Noel John i kikim konvesen na skoa i sanap 16-6. Ol i pilai i go na klostu long haptaim, Noel John bilong Hawks i kikim wanpela penalti na skoa i sanap 16-8.

Insait long namba tu hap, ol fowat bilong Hawks olsem Evera Mai, Ted Mea, Oliver Frank na kepten Poki Kohu i kamapim strongpela pilai strong tru. Hatwok bilong ol i karim kaikai taim Rei Lega i putim wanpela trai aninit long golpos stret na John i kikim konvesen isi tru na skoa nau i sanap 16-14.

Taim referi i salim Demond i go long sinbin, faiv-et bilong Hawks Noel John i skorim wanpela isi trai stret. Em i kikim konvesen na skoa i go long 20-16.

Orait Eddie levelim skoa tasol Moses Kairi bilong Hawks i putim arapela gen na surikim skoa bilong ol i go long 24-20.

Defence i no save wari. Ol i pilai strong winger Wesley Lavilu i setim Stanley Gimbol long level skoa gen 24-24. Hawks i gat sans long winim dispela tasol Lohia Ben Moide i no kikim gut penalti.

Orait referi i penalaisim wanpela Hawks pilaia long holim daun Defence pilaia na Kondi i mekim kwik tep na go putim trai na kikim konvesen long surikim skoa i go long 30-24.

Klostu long pinis bilong pilai nau, Eddie yet i kam putim las na namba foa trai bilong em long surikim skoa i go long 34-24.

Bulldogs paia long Minj

MINJ RAGBI LIG RIPOT

WANPELA nupela klab, Bum Bulldogs i wok long paia stret long Minj Ragbi Lig long Westen Hailens

Man i statim dispela klab Jonathan Teko i tok klab ya i wok long kamapim ol gutpela gem na tu i wok long givim strongpela salens long ol arapela tim.

Bopo ol boi save pilai wantaim West Klab ol lukim planti boi tumas olsem na ol fomim nupela klab Bulldogs.

Klab nau i kikim sapot sponsa kam long kaunsil presiden Peter Aih na ol pilaia i amamas tru.

Minj i gat tupela klab olsem Bulldogs na Isten Cowboys. I gat 7-pela klab olgeta i pilaia long kompetisen bilong dispela yia West, Country Bros, Haiwe Raiders, Spiders, Kumbo United, Eastern Cowboys, na Bum Bulldogs.

Ol opisel bilong klab em Jacob Mani present, sekretari em Jonathan Teko na Tresera Rosaline Malom.

Buka statim sisen

BUKA LIG RIPOT

BUKA Ragbi Lig Asosiasen i statim pinis kompetisen bilong em las wik long Hako na Hutjena.

Dispela em i namba wan gem bihain long kainkain senis na toktok i kamap olsem bai nogat gem.

Presiden Cherry Napto i tok ol i no statim sisen bikos planti klab i no baim afiliesen

na registresen bilong ol pilaia. Na tu asosiasen i laik save gut olsem bai i gat namba bilong statim sisen o nogat.

Long las wik Trinde, BRL i tokaut olsem em bai statim kompetisen long wiken we siksipela klab Newtown Royals, Tsitalato Warriors, Hago Eagles, Elto Sharks, Haku Hawks na Tarangau Brothers bai resis.

Madang stapim kompetisen

MADANG LIG RIPOT

SAPE METTA i raitim

MADANG lokel ragbi lig asosiasen i gat bikpela hevi nau na i stapim kompetisen bilong em. Ol opisel i stapim kompetisen bikos planti klab na ol pilaia i no rejista long dispela yia. Presiden bilong Madang Max Lindapau wantaim ol eksekutiv i pasim tok na wanbel long stapim olgeta kompetisen gem.

Lindapau i tok astinting bilong stapim olgeta pilai long pinis bilong raun wan, em olsem wanpela mekim save long ol klab na pilaia. Mipela laik ol i mas luksave olsem mipela ino hap sindaun bek isi na larim ol i go het long pilaim ol raun tu kompetisen."

Em i tok dispela hevi bilong stapim kompetisen i no nap kamap sapos olgeta klab stat long sinia gret igo daun long ol junia divisen i bin kamap na baim registresen fi bilong ol.

Presiden i tok "Taim pri-sisen i bin stat long mun Februari na ol opisel i bin askim long baim dispela ol fi, tasol nogat wanpela gutpela bekim i bin kamap. Mipela i givim

ol planti taim na sans long regista, tasol planti long ol i no kamap wantaim ol gutpela bekim em mipela i apil na askim ol long en."

Em i tok, sapos ol i laik bikhet, mipela tu ino nap sindaun tasol na westim taim long wetim ol. Mipela tu bai tekim na risal bilong dispela em mipela i stapim olgeta pilai inap olgeta klab na pilaia i kamap wantaim ol registresen bilong ol."

Mista Lindapau i tok nau yet em wantaim ol eksekutiv bilong em givim olgeta klab inap long pinis bilong dispela wik baim dispela ol fi. Sapos nogat, Madang lig bai i no nap go het.

Presiden Lindapau i givim las sans nau na i apil wanpela moa traun long ol klab na pilaia long ol i mas hariap na kam fowat na stretim ol yet long rejista. Dispela pasin bilong sakim tok na i no baim registresen fi em i wanpela bikpela hevi stret Madang.

Mista Lindapau i tok Madang lig gat bikpela laik long salim primia tim bilong 1999 i go insait long Cambridge Kap kompetisen. Tasol dispela hevi bilong ol klab na pilaia husat ino nap long harim tok baim registresen fi, dispela sans bai i ken popaia i tok save istap long ol klap nau.

Eagles daunim bom bilong Lae

ROBERT BOMA i raitim

CAMBRIDGE Eagles i soim ol sapota olsem ol i gat tingting yet long holim taitel bilong SP inta siti Kap taim ol i autim wanpela strongpela tim, Lae Bombers 20-12 las wik Sande.

Skoa i sanap 12-12 long namel bilong namba tu hap bilong pilai tasol Eagles i brukim kiau taim ol i putim tupela trai.

Tupela tim wantaim i kamapim strongpela pilai stret. Ol i wok

SP KAP RIPOT

long skelim difens bilong tupela na dispela i mekim ol sapota i amamas na bikmaus wantaim taim ol i holim bal na ran.

Eagles nau i painim gutpela gem plen nau. Olsem ol i wok long stapim ol Bombers long putim trai. Maski Bombers i salim ol biknem pilaia olsem Simon Kundi, Andrew Norman, Tony Dai, Wilson Komra na Darby Joseph tasol Eagles i banisim ol gut tru ya.

Ol dispela pilaia i wok long kamapim ol kainkain trik long putim trai tasol ol pilaia bilong Eagles i save pinis na was gut ya.

Max Tiri, David Gomia na Robert Benny i pasim tok na i no givim wanpela spes liklik long ol Bombers.

Tupela wik i go pinis, Eagles i go nekim Angras long Dickson Oval long Kundiawa, na dispela i soim tru olsem ol i gat tingting yet long holim SP Kap ya.

Sirinumu winim namba wan gem

KENNEDY EDENE i raitim

SIRINUMU Owls brukim kiau bilong las wiken wantaim gutpela win 12-4 egens long Sapphire Bears long Koiari Ragbi Lig kompetisen.

Kos Aisa Aisa em i amamas long ol boi bilong em long winim dispela gem. Em i tok "em namba wan win bilong mipela na mipela lukluk long rekotim narapela win gen long dispela wiken egens IBS Pukpuks.

"Mi bai nekim Pukpuks. Ol boi i bin kaikai tit na mi tokim ol boi olsem Crystal Mon, Wilson Koivi na Kak Nilkare long noken holim bal tumas.

Owls putim 4-pela trai na turangu Bear skorim wanpela tasol.

Trai bilong Owls em Jack Karimu, Crish Mon na Wilson Koivi bin putim na long Bears em Robert Kiroki putim.

Na long ol arapela pilai, Sogeri Choice autim nupela tim East Kongos 18-12, IBS Pukpuks wipim Ice Panthers 14-6, Tigers, Lakers nogat taim na

KOIARI LIG RIPOT

tupela i kisim wanpela poin.

Poin lata i sanap olsem IBS Pukpuks 8, Sogeri Choice 7, Ice Panthers 6, Crystal Lakers 5, Hooks Tigers 4, Sapphire Bears, Sirinumu Owls na Trek Warriors tu poin na East Kongos nogat yet.

Insait long arapela stori, olgeta klab insait long Koiari Ragbi Lig kompetisen i gat pinis bilong mun Julai long baim olgeta rejistresen bilong ol.

Rejistresen fi bilong klab em K300 na K150 i go long Koiari ragbi lig kaunsil na K150 i go long Sogeri lig.

Ol pilaia em K8, K4 i go long KRLC na K4 i go long Sogeri lig na ol teknikal opisel bai baim K15.

Long kompetisen bilong ol junia lig bos bilong KRLC Kennedy Edene tok junia lig bai stat long tupela wik samting.

Na bai i gat wanpela raun tasol. Olgeta 4-pela klab bai ol i pilaia na ekul na gems. Bai ol i kisim wan raun tasol bikos junia lig em stat bihain long neks yia bai ol mekim nomol tu raun.



• Pilaia bilong Vipers i takolim pilaia bilong Kimbe Bulls long SP Kap inta siti salens las wiken long Pot Mosbi. Vipers win 30-18.

Difens autim Royals

PAUL FUSO i raitim

WEWAK Cambridge Ragbi Lig Asosiesen i statim pinis sisen propa bilong em las wiken.

Olpele huka bilong PNG Kumuls Roy Heni husat i go pas nau long ranim Wewak lig i givim bikpela tok welkam i go long Difens klab soim pes gen kompetisen bihain long ol i lusim bikos long hevi long Bogenvil.

Wewak Lig i bilip Difens klab i putim kamap gutpela salens long ol narapela klab long kamapim gutpela kompatisen.

Nambawan bikpela pilai bilong openim A gret resis i bin stap namel long difens na Royals.

Bikpela pilai ya i bin stat long 3 kilok apinun long Sande. Pora Oval i bin pulap long kainkain kala we ol i kamap long lukim na singaut long namba wan tim bilong ol.

Royals husat i bin krungutim fil wantaim nupela jesi bilong ol i bin kisim gutpela sapot tru i kam long saillain bilong ol. Tupela sait wantaim i luk strong tru taim ol i kisim fil long statim pilai.

Royals i bin kik op na Difens i bin kisim nambawan bal long atek. Long saillain, planti sapota i painim hat long sindaun taim ol i lukim ol bikpela fowat bilong Difens i ran i go kam long brik wal bilong Royals.

Lapun bilong Royals

WEWAK LIG RIPOT

Thomas Tikele i bin lidim gut tru ol yangpela bilong em long fowat lain wantaim planti strongpela takol na tu planti ol strongpela ran long brukim banis bilong Difens.

Difens tu i no bin pilai kaskas long Royals, Gideon Akike na Pege Henio husat i go pas long Difens long fowat lain i wokim bikpela wok tru long sanapim strong banis na bekim ol hevi pela ran em Royals Nelson Edes i painim spes na pundaun long sait trailain bilong Difens. Kik i bin nogut na Royals i bin go pas long 4 poin.

Pilai i bin ran strong tru tasol. Difens i no was gut na Nelson Edes i painim ken trailain bilong Difens long putim namba tu tri bilong em. Kik gen i no gutpela na skoa

bilong Royals i bin surik i go antap long 8 na Difens 0.

Difens i bin salim Milton Tauka long brukim kiau. Tupela sait wantaim i soim trongpla tru tasol Difens i putim gen 3-pela moa trai na i bin i go pas long 18 poin na Roays 14 poin long hap taim.

Long namba tu hap bilong pilai Royals i bin putim bikpela presa tru wantaim planti gutpela hit ap ron long ol. Fowat olsem Bingo Waim na Jimmy Bayak tasol bikos Difens i pes ong beklain, Royals i painim hat long stopim ol.

Gutpela wok bung namel long beklain bilong Difens olsem Bravo Vaieke, August Tiuna, Milton Taura na George Yange i bin helpim difence long winim dispeal pilai. Fultaim skoa Difens 30 na Royals 24. Long arapela gem, Tigers i winim Wewak Eels.

MINJ LIG RIPOT

Haiwe Raiders givim gem nating

PETER MAIME i raitim

RAGBI lig sisen long Minj i stat pinis tasol Haiwe Raiders klab i no bin peim rejistresen fi bilong ol pilaia olsem na ol i no pilai long lokol kompetisen.

Tripela gem i go pinis na dispela wik em namba foa raun. Taim ol narapela tim i stap long dro long pilai wantaim Haiwe Raiders ol i save fofeit na kisim tu poin nating.

Sekreteri bilong lig, Martin Kepi i tokim Wiken Spot olsem planti pilaia bilong dispela klab nau i stap nating. Ol liklik lain tasol i bin joinim ol narapela tim.

Haiwe Raiders em wanpela stail tim bilong bipo husat i save kamapim strongpela pilai. Tupela pilaia Tobias Wakil na Max Par husat i save pilai long dispela klab bipo nau i stap insait long Waghi Tumbé.

Ol narapela klab husat i stretim olgeta samting pinis na pilai em West, Kubor United, Eastern Cowboys, Spiders, Bulldogs na Brothers.

Dro bilong dispela wik, West bai pilai egensim Haiwe Raiders, Bulldogs bai brukim bun wantaim Spiders na Brothers bai skelim strong bilong Kubor United.

Eastern Cowboys stap bai long dispela wiken.

MADANG LIG RIPOT

North Raiders i makim nupela presiden

PAULUS TALI i raitim

ASPLES tim bilong Madang stret long ples Riwo, North Raiders, i makim nupela president bilong klab.

Nem bilong presiden ya em Kaupa Aiwa.

Raiders em sempion tim bilong Madang Ragbi Lig kompetisen las yia. Na em i bin stap insait long

namba wan raun bilong Cambridge Kap resis egens long Ramu.

Dispela North Raiders klab i gat ol pilaia i kam long ples Riwo yet na tu ol studen bilong Madang Tisas Koles.

Aiwa tokim Wantok olsem em bilip em bai lukautim gut klab wantim ol nupela opisels bilong em.

Aiwa i tokaut olsem em i kisim wok presiden long taim klab i nogat mani tru. Tasol gutpela wok bilong

ol sapota na membas olsem Tom Gande na Sunic Kikiki tasol i wok long holim wok bilong dispela klab.

Bikpela tingting nupela presiden em long bringim Raiders i go bek olsem wanpela strongpela spoting klab long Not Kos Rot.

Raiders klab i nogat gutpela kosa tasol ol sinia pilaia olsem Lawrence Gandhi, Kelly Apaso Miol na Sigfred Gandhi bai sapotim klab wantaim eksperiens bilong ol olsem sinia


pilaia.

Presiden givim bikpela tok amamas long Madang Developmen Koporesen las yia tru long Kembris Kap Raun app, Mista Aiwa singaut go long Madang Gavana na bisnis haus long sapotim tim bilong Madang stret. Yu ken salim spona sapot bilong yu kam long dispela adress: The Presiden, North Raiders, P.O. Box 1155, Madang na telepon em 852 1353.

Eksen na tim poto bilong las wiken



• Ela United U13 B tim husat save resis long Orogen skul soka resis long Pot Mosbi.




• ANTAP: Oi pilaia bilong Momase na Telikom i resis long hetim bal long Pot Mosbi soka resis. Momase i win long 2-0.

• ANINIT: Boi ros sempion boksa bilong Wewak i soim medal na stail bilong em.



• Reserv huka bilong Royals i laik traim ronim winga bilong Brothers. Brothers win 28-8.



• MDC Royals tim bilong Wewak Ragbi lig resis long Is Sepik.

Skelim gut wanem ol samting bodi i mas gat

Ol yangpela pikinini bai laikim planti gutpela samting long kamap bikpela. Traim mekim ol samting inap long ol i helpim yu. Ekse-sais na pilai inap long skel bilong bodi. Traim long kisim malolo pastaim na yu ekse-sais.

Bihainim ol dispela samting long helpim yu.

- Kisim planti kaikai olsem rais, kon na bret, mit, pis, ol prut na kumu olgeta de long strongim yu taim yu pilai na ekse-sais. Yu mas kaikai gut tripela taim long wan-wan de. Malolo gut taim yu pilai na ekse-sais pinis.

- Yu mas slip gut long kisim inap stong long neks de. Bodi bilong yu bai stap gutpela na yu inap mekim planti samting olsem pilai na ekse-sais.




Ekse-sais na pilai gut long helpim bodi bilong yu.

Wasim bodi bilong yu gut long olgeta de.

Bodi bilong yu i mas stap klin long olgeta de. Taim bodi i no stap klin, sampela kain makmak i save kamap long skin. Ol pren bilong yu bai amamas long toktok wantaim yu sapos bodi bilong yu i stap klin. Na tu, ol binatang bilong givim sik i no inap stap klostu long yu.

Long lukautim gut gras long het bilong yu, yu mas traime logn yusim sampela spesel sampu o sop long wasim gut gras sapos laus i stap pinis long het bilong yu. Yu ken yusim kokonas wel miks wantaim pauda long rausim laus. Yu wasim gras pinis, wasim gut wantaim planti wara. Yusim kom bilong yu yet long komim gras bilong yu.

Long mekim bodi na skin bilong yu i stap klin smat na sain olgeta, yu mas wasim olgeta hap bodi bilong yu wantaim sop na wara. Wasim pes na klinim gut tu. Noken



• ALL PIKSA I SOIM PASIN BILONG PIKININI LONG ABRUSIM OL SIK LONG BODI BILONG OL.

sikirapim pimpel nogut ol makmak bai kamap long pes bihain Yu waswas pinis, yusim tawel bilong yu yet long klinim bodi bilong yu.

Long mekim finga nil bilong yu i stap klin, yu mas brosim finga bilong yu long sopwara na rinsim gut. Katim finga nil bilong yu i go sot tru. Ol binatang nogut bai inap hait insait long finga nil bilong yu na givim yu sik.

Traim na helpim yu yet long mekim ol gutpela samting long yu stap longpela taim. Lukautim gut bodi bilong yu na amamas laip.

Ol yangpela i mas noken tingting long marit hariap.

Pasin bilong marit i bikpela samting tru na i save kamap namel long man na meri. Tupela mas luk-save long tupela yet.

Tru tumas pasin bilong marit i bikpela samting tasol i gat ol asua bilong em na ol man na meri i mas skelim gut pastaim.

Tingim gut sapos yu laik slip wantaim narapela. Sapos yu meri, yu bai kisim bel klostu. Taim yangpela meri i kisim bel, dispela i no

save helpim em long wanpela samting.

Bodi bilong ol i no redi long karim pikinini. Ol yangpela man i no redi tumas long lukautim na sapotim wanpela famili bilong ol yet. Ol yangpela man na meri i mas noken tingting long marit hariap. Tingting na save i stap long yu yet.

- Toktok wantaim papa na mama long givim gutpela toktok long yu.

- Tingting gut taim yu laik slip wantaim narapela. Noken mekim

pren nating wantaim wanpela man o meri na tu, hariap tru long slip wanaim em. Ol gutpela pren bai no nap mekim dispela kain pasin long yu.

- Yu bai inap long kisim ol sik nogut olsem sik AIDS, gonoria, sipilis na arapela moa sapos yu no yusim kondom na slip wantaim meri.

Meri tu bai kisim ol dispela sik na em tu bai kisim bel taim yu slip nating na i no yusim kondom.

Tingting gut olsem i gat bikpela taim i stap yet long yu marit na staim wanpela famili bilong yu.

Abrusim sik pekpek wara

Bilong wanem ol manmeri i mas yusim toilet?

Sapos olgeta manmeri long ples i yusim toilet, ol snek long pekpeke bai i no inap go insait long wara bilong dring na antap long kaikai. Dispela bai stapim sik pekpek wara long i no ken kamapim hevi long ples.

Bihain long olgeta manmeri i yusim toilet pinis, ol i mas mekim wanem?

Ol i mas wasim han bilong ol gut wantaim wara long rausim snek na ol jems i kam long toilet.

Taim ol liklik pikinini i pekpek, ol mama i mas mekim wanem? Taim ol liklik pikinini i pekpek long graun, ol i mas rausim na digim graun na planim. Nogut snek i stap na givim sik i go long ol arapela pikinini.

Yu save yusim toilet insait long haus o ausait long haus?

Long ol taun na siti, i gat toilet insait long haus na sampela em long ausait. Olsem na bikpela samting em long wasim na klinim gut ol dispela

toilet long stapim ol smel na jems long i noken kam insait long haus we i ken givim sik long ol pikinini na bikpela manmeri wantaim.

Mama i mas mekim wanem long redim kaikai?

Taim mama i laik redim kaikai bilong kukim o skelim, em i mas wasim han na wasim gut ol samting em i laik skelim kaikai long en o yusim long redim kaikai.

Ol snek na jems nogut bai i go antap long ol kaikai olsem wanem?

Mama i gat doti han na snek bai go antap long ol kaikait aim em i holim ol kaikai.

Lang tu i save karim ol snek nogu tlong lek bilog ol taim ol wokabout antap log ol pipia na pekpek long graun. Na taim lang putim lek long kaikai, ol snek bai i go insait long kaikai.

Sapos snek nogut i go antap long kaikai, wanem samting bai kamap long famili bilong mama?

Sapos snek nogut i go

antpa long kaikai, bai ol pikinini na ol bikpela manmeri i kisim na painim sik pekpek wara.

Yumi mas lukautim tu wara long ples we i mas stap klin long yumi ken kisim na yusim long olgeta taim. Noken kisim wara bilong dring long hap we ol manmeri na pikinini i save waswas long en.

Na tu long hap we ol enimol olsem pik na dok i save go waswas na pekpek long en. Long ples, ol manmeri i mas banisim hap we wara i ken stap stret bilong kisim long kuk na dring na waswas long en.

Yu save wanem samting i save kamapim pekpek wara?

Sampela manmeri i gat liklik snek nogut i stap long pekpek bilong ol. Dispela ol snek i go long ol wara sapos ol manmeri i pekpek i go long wara o klostu long wara. Sapos ol manmeri no boilim dispela wara na dring nating, em bai ol i daunim tu dispela snek na kisim sik pekpek wara.

Gutpela amamas na sindaun long famili

I gat 7-pela bikpela rot bilong helpim long mekim famili i amamas na stap gut egen-sim ol sik.

- Gutpela klinpela ples wantaim klin toilet we ol manmeri i save wasim gut han bihian long ol i yusim toilet.

- Gutpela klin wara saplai na ol manmeri i save waswas gut olgeta de wantaim sop.

- Yusim taunam we i gat marasin bilong kilim natnat na ol binatang.

- Sekim klinik olgeta taim long ol sik na hevi long bodi na kisim sut bilong imunaisesen long sevim ol liklik bebi na mama.

- Givim gut kaikai long ol bebi na kisim ol gutpela na strongpela kaikai bilong ol mama i kisim na kisim strong.

- Save long ol rot bilong stapim kus na pekpek wara long haus pastaim long yu ken kisim pikinini wantaim ol dispela sik i go long haus sik.

- Yusim gut famili plening long spesim gut ol pikinini bilong yu.

Ol papamama bilong gutpela amamas famili i save yusim ol rot bilong famili plening. Olsem na bilong wanem em i gutpela long spesim ol pikinini long famili em gutpela?.

- Bai igat inap kaikai na ol samting bilong ol pikinini na famil i ken kisim gut na serim gut long ol yet.

- Mama i ken kamap strong bikos em inap kisim malolo na kisim bek strong bilong em bihain long em i karim pikinini.

- Ol spes long haus na rum i ken i gat inap spes long ol pikinini na famili i slip gut na kisim gut win.

Long wanem hap moa yu ken kisim ol skul na save long lainim gutpela famili plening na tu traime ol sampela rot bilong famili plening?.

- Long ol klinik
- Long ol helt senta
- Long ol eid post.

I no olgeta famili long ol viles i save stap gut na amamas. Olsem na wanem ol as we ol famili no save amamas na bungim ol sik?.

- Bikos i gat planti pikinini i kamap klostu klostu long narapela narapela


- I nogat inap kaikai long ol bikpela famili olsem na ol i hangre, sik, kamap bun nating na lusim skin.

- Ol papamama i no save yusim rot bilong famili plening.

Yu save long sampela rot ol papamama i ken yusim o bihainim long ol i no ken kamapim pikinini klostu klostu?.

- Yusim pils (tablet) lup (rop), sut na arapela rot moa we dokta na nes i ken toksave long en.


LAIPSTAIL




• Sir Michael Somare.




• Sir Julius Chan.



• Paias Wingti.



• Sir Rabbie Namaliu.



• Praim Minista Bill Skate.

PETER MAIME i raitim

MASKI "ges paia", yu save husat tru bai kamap Praim Minista taim palamen i bung long Julai.

Sapos yu gat sampela lain pinis long het, noken ting dispela memba bai kamap Praim Minista.

Long politiks bilong PNG, las minit senis i save kamap. Yu i no inap save husat bai fomim gavman o kism sia bilong Praim Minista, inap ol kuskus bilong palamen i kaunim vot na givim risals i go long ol memba long floa bilong palamen.

Planti toktok nau i raun long kantri olsem wanpela vot i nogat long gavman bilong Praim Minista Bill Skate bai kamap, taim palamen i sindaun long mun Julai. I gat wanpela mun tasol i stap bipo palamen i bung.

Spika bilong Palamen, John Pundari i bin tokaut long las wik olsem em i gat wanpela grup pinis long fomim nupela politikel pati. Ripot i tok olsem planti bilong ol dispela memba i kam long sait bilong gavman. Mista Pundari bai bilong nem long pati bilong em bihain long tupela wik.

Bihain long 1997 nesanel ileksen, gavman bilong Mista Skate i votim Mista Pundari olsem Spika bilong Nesanel Palamen.

Lida bilong Oposisen, Bernard Narakobi tu i bin tok aut pinis olsem em bai i no inap kamap Praim Minista sapos i gat vot i

Husat bai nupela Praim Minista bilong PNG?

nogat bilip na palamen i rausim gavman bilong Mista Skate.

Em i tokim ol nius manmeri long las wik olsem hevi bilong kantri i bikpela tumas na em i no laik kism dispela wok.

Tasol em tingting bilong em yet na i no long olgeta memba long oposisen. Sapos ol memba long oposisen i laikim em long kamap Praim Minista, Mista Narakobi i ken sensim tingting bilong em.

Ol politikel pati husat i stap long oposisen nau em Pangu Pati, Pipels Progres Pati, Melanesian Alaiens na Nesanel Aliens bilong Sir Michael Somare.

Tupela bikpela politikel pati i stap nau long gavman em PNG Fes bilong Mista Skate na Pipels Demokratik Pati. PDM i stap long lukaut bilong Deputi Praim Minista

Pangu, PPP na PDM. Melanesian Alaiens i nogat rekot long putim wanpela Praim Minista tasol em i save stap namel long kamapim ol gavman.

Nau yet, i nogat wanpela memba i tok aut olsem em bai kism ples bilong Mista Skate. Olgeta memba i pasim maus na weit tasol i stap.

Tupela olpela Praim Minista, Sir Michael Somare na Sir Rabbie Namaliu i nau stap yet olsem memba bilong palamen. Sir Julius Chan na Paias Wingti i bin lus long 1997 nesanel ileksen. Mista Skate em namba faiv man long kamap olsem Praim Minista bilong PNG.

Sapos wanpela nupela memba i kamap Praim Minista long Julai dispela bai mekim olsem namba 6 lida long kamap Praim Minista bihain long PNG i bin kism independens long 1975.

Sir Somare i bin kamap namba wan Praim Minista taim PNG i tokaut olsem em i wanpela independen kantri long 1975.

Long 1977, palamen gen i makim Sir Somare olsem Praim Minista bilong kantri bihain long em i bin winim sia bilong Is Sepik rijional. Long Mas 1980, em i kamap lida bilong Oposisen bikos em i lusim sia bilong em long wanpela vot i nogat bilip.

Bihain long 1982 nesanel ileksen, em i bin kamap Praim Minista gen. Long Novemba 1985, em i lusim sia bilong em olsem Praim Minista bikos em i lus gen long wanpela vot i nogat bilip.

Em i bin traim gen long kamap Praim Minista long 1997 tasol Mista Skate i winim em.

Sir Julius Chan i bin kamap Praim Minista namba wan taim long 1980. Em i bin autim Sir Somare long vot i nogat bilip. Em i bin stap Praim Minista long 1980 inap long 1982.

Sir J i bin kam bek gen long

1982 ileksen tasol em i kamap Deputi Praim Minista aninim long Mista Wingti.

Long Ogas 1994, em i bin kamap Praim Minista gen taim Mista Wingti i lusim sia bilong em long Suprim Kot.

Stat long 1968, Sir J i bin oltaim winim sia bilong Namatanai long Nu Ailan tasol em i lus long 1997 ileksen.

Mista Wingti i bin statim politikel laip bilong em long 1977 taim em i winim sia bilong Hagen. Em i bin holim dispela sia long 10 pela yia.

Long Novemba 1985, em i bin kamap namba tri man long kamap Praim Minista long PNG. Long 1987 ileksen, em i bin sanap na winim Westen Hailans rijional sia na bihain palamen i makim em gen olsem Praim Minista.


Long Julai 1988, em i bin kamap opisisen lida taim ol i sensim gavman bilong em. Em i bin winim gen rijional sia long 1992 na kamap Praim Minista wanpela taim moa.

Long Septemba 1993, Mista Wingti i bin risain na palamen i votim em gen olsem Praim Minista tasol oposisen i kism em i go long Suprim Kot long dispela pasin em i bin mekim na em i lusim sia bilong em.

Bihain em i bin kamap Gavana bilong Westen Hailans tasol em i lus long Pater Lak long 1997 ileksen.

Sir Rabbie Namaliu i bin kamap namba foa man long kamap Praim Minista long Julai 1988 taim palamen i putim wanpela vot i nogat bilip long gavman bilong Mista Wingti. Sir Rabbie i bin stap Praim Minista i go inap long 1992 ileksen. Em i traim gen long kamap Praim Minista bihain long ileksen tasol em i bin lus long Mista Wingti.

Sir Rabbie i bin holim sia bilong Kokopo long Is Nu Briten long



1982 i kam inap nau. Em i Minista bilong Petroleum na Ges long gavman bilong Mista Skate.

Mista Skate i makim sia bilong Nesanel Kapitel Distrik long Nesanel Palamen. Em i bin kamap memba long 1992. Em i bin stap Spika bilong Palamen taim Mista Wingti i stap Praim Minista dispela taim.

Long Septemba 1994, Mista Skate i bin kamap Deputi Oposisen Lida taim Wingti i lusim gavman bilong em long kot. Taim nupela rifom lo bilong Provinsal na Lokol Levol Gavman i bin kamap, em i risain long wok bilong oposisen na kamap Gavana bilong NCD.

Long 1997, Mista Skate i bin winim sia bilong NCD na taim palamen i bin bung, ol i makim em olsem namba faiv man long kism sia bilong Praim Minista.

Ol tok tok nau i raun olsem bai i gat vot i nogat bilip i kamap long gavman bilong Mista Skate. Mista Skate i no surik long dispela samt-ing na tok em bai win yet.

Sapos palamen i laik sensim Mista Skate long Julai, yu ting husat bai kism dispela posisen bilong Praim Minista.

Em bai Sir Somare, Sir Rabbie, Mista Skate o husat nupela memba i kism wok olsem Praim Minista.

Ating yu yet i ken skelim, "ges paia" na putim kendidet bilong yu. Sapos kendidet bilong yu i mekim, gut lak. Sapos em i no mekim, traim gen.

Politiks bilong PNG em yu no inap long save inap long las minit.

FRI BAIBEL KOS LONG PAS

I kam long wanpela pren long America sapos yu laikim fri kos salim nem na adres igo long:

**WOL BAIBEL SKUL
WBS - PNG 12, P.O. Box 9346,
Austin, TX 78766 USA.**

Kempen bilong senisim Gavman i kamap

...Ol memba bai i go olsem wanem?



• Iairo Lasaro (PDM).

• Michael Nali (PPP).

• Chris Haiveta (Pangu).

• Roy Yaki (Hailans Risos grup).

MASTA WAI i raitim

PLANTI toktok i kamap pinis long gavman i mas senis long mun Julai, neks mun tasol. Olsem na ol lain bilong Oposisen i mekim planti bikpela kempen na wok raun long tokim ol pipel bilong Papua Niugini olsem planti samting long kantri i wok long bagarap bikos dispela Gavman bilong Bill Skate i no ronim gut kantri.

Oposisen i bin mekim wanpela raun i go long Madang na Goroka we ol i toktok long planti manmeri bilong pablik na tu long ol skul studen long kisim tingting long wanem samting Oposisen i laik tokaut na tu ol pipel i ken tokaut long tingting bilong ol. Long las wik tasol Oposisen i pinisim wanpela raun long Lae siti we em i toktok wantaim planti manmeri moa long kisim tingting bilong ol long dispela Gavman.

Oposisen lida Bernard Narokobi i tok insait long olgeta dispela raun na bung bilong ol, planti manmeri i autim tingting olsem Gavman bilong Prais Minista Bill Skate i mas go.

Dispela kain tingting bilong ol manmeri i no kamap nating. Ating ol i pilim tu ol hevi olsem prais bilong ol kaikai na ol samting bilong stua i go antap. Na tu ol i lukim planti senis tumas long gavman na ol wokman bilong Gavman we i wok long senis klostu klostu. Ol i luksave tu olsem strong bilong mani (Kina) insait long kantri i go daun tu egensim mani bilong Australia na Amerika, ol i pret bai hevi bilong mani insait long kantri i daunim laip na sindaun bilong ol.

Planti i tingim tu ol hevi dispela Gavman i kamap we ol i gat ripot long kamap long kot bikos plis i wok long sekim ol asua na krangki pasin bilong ol.

Taim Oposisen i wok long mekim dispela raun insait long kantri long skulim ol manmeri long ol hevi bilong Gavman na kantri, Gavman tu i wok long mekim wankain. Tasol bai yu ken skelim long pasin Prais Minista Bill Skate i mekim we em i go insait tu long grasrut long asples tru long kisim sapot bilong ol.

Prais Minista Bill Skate i bin go raun long Kavieng, Kimbe, Hagen na las wik tasol em i go raun long Oro provins. Insait long ol dispela raun, Prais Minista i bungim ol lidaman bilong ples na ol pipel na tokim ol long wanem samting Gavman bilong em i wok long mekim long helpin na sapotim ol.

Dispela em wanpela rot Prais Minista i wok long mekim tu long soim ol lida na memba bilong palamen olsem em i wanpela grasrut Prais Minista we em i

ken go daun tru na toktok wantaim ol pipel bilong ples. Taim Prais Minista i tokim ol ples manmeri olsem em i laik wokim rot o bris o kamapim sevis long ol, ol pipel i pilim bikpela amamas olsem bikpela samting bilong kisim sevis na developmen i kam em long taim Prais Minista i tokaut long maus olsem em bai bringim sevis na developmen long ol. Dispela rot i save mekim ol lida bilong palamen i tingting planti bikos Prais Minista i kolim nem bilong sevis o developmen em bai kamapim long ol pipel. Olsem na ol lida o memba bilong ol dispela ples i save tingting planti long stap klostu wantaim Gavman long mekim Gavman i kamapim ol dispela samting em i promis long mekim.

Tasol sanap bilong Oposisen em long senisim Gavman long vot i nogat bilip we inap kamap long mun Julai long dispela yia. Oposisen i autim olgeta tingting bilong ol pinis long wanem kain hevi dispela Gavman i kamapim olsem na em i mas senisim Gavman long stretim ol dispela hevi we i wok long kamap.

Tasol bikpela samting mipela i mas skelim nau em, Gavman i wok long go het long holim sapot bilong ol manmeri wantaim mani na wok we em i mekim na sampela em i promis long kamapim bihain sapos dispela Gavman i winim birua bilong vot i nogat bilip na stap yet long pawa. Olsem na dispela i mekim Gavman i yusim ol plen bilong em long holim strong namba bilong ol memba wantaim bai dispela Gavman i mas stap yet na go het long kamapim ol samting em i promis long mekim.

Long sait bilong Oposisen tu, em i mekim bikpela wokim tokim ol manmeri olsem kantri i wok long bungim hevi bikos long ol disisen na lidasip bilong Skate Gavman. Tasol em i no tokaut klia yet long wanem samting em bai mekim long sevim dispela kantri sapos em i senisim Gavman. Olsem na long tupela sait wantaim, lain bilong Skate i soim mani na mekim promis long mekim samting i kamap. Long sait bilong Oposisen, ol i tokaut long hevi i kamap tasol ol i no tokaut long ol bai mekim wanem long stretim dispela hevi.

Dispela pasin bilong Gavman na Oposisen wantaim i putim ol manmeri long tupela tingting. Wanpela em long sapotim Gavman o sapotim Oposisen.

Sapos yumi lukluk i go bek long ol palamen long bipo i kam, i bin gat vot i nogat bilip bipo pinis we ol Oposisen i bin senisim Gavman. Taim Oposisen i senisim Gavman, i nogat wanpela

bikpela bagarap o hevi i kamap long kantri. Ol Oposisen i senisim Gavman tasol olgeta wok na samting bilong kantri i go het tasol olsem nogat samting i bagarapim na daunim ol.

Olsem na Oposisen i tok vot i nogat bilip long senisim Gavman i no nupela samting. Bikos em i save kamap olgeta taim long bipo yet i kam nau. Gavman bilong Sir Michael Somare i bin lus long vot i nogat bilip na Sir Julius Chan na ol lain bilong em i tekova long Gavman. Gavman bilong Sir Julius Chan i bin lus long na Paias Wingti i tekova. Gavman bilong Paias Wingti i bin lus long vot i nogat bilip na Sir Julius Chan i kamap Prais Minista gen. Olsem na vot i nogat bilip i no nupela samting bikos dispela pasin i save kamap olgeta taim we bihain long nesenele ileksen na taim palamen i bung i go inap long 18 mun i pinis, orait dispela vot i save kamap long testim strong bilong Gavman.

Sapos yumi skelim tu ol memba insait long Gavman na Oposisen tude, bai yumi ken skelim tu wanem kain lida na politikel pati yumi ting i mas sanap wantaim long fomim nupela gavman o go het long strongim gavman i go.

Long Gavman, pati bilong Prais Minista em PNG First Pati. Na dispela em nupela pati tasol we i bin kamap long taim bilong 1997 nesenele ileksen.

Insait long ol dispela marit bilong ol pati long kamapim Gavman, ol pati olsem Pipels Demokretik Muvmen (PDM) i stap, Hailans blok o ol lida bilong hailans i sanap wantaim na arapela memba husat i lusim Pangu na PPP na i go joinim Gavman.

Ol pati husat i stap long narapela sait, Oposisen em, Pangu, PPP na ol Nesenele Alaiens grup. Nau yumi harim olsem nupela pati i laik kamap we Spika bilong palamen John Pundari bai kamapim. Olsem na yumi i no save bai lain bilong John Pundari i go olsem wanem. Sapos lain bilong Pundari i joinim Oposisen, ol i ken senisim gavman. Na sapos ol i joinim Gavman, ol i ken strongim Gavman i stap olsem nau yet.

I nogat taim moa, tasol taim bilong dispela senis bai kamap long mun Julai. Olsem na yumi ol manmeri ken sindaun gut na glasim gut olgeta eksen na wanem kain pasin ol lida bai mekim tude. Ating i gupela long yumi glasim wanem kain eksen na pasin wanwan memba bilong yumi long ilektoret i mekim nau. Ol i wok long kalap i go i kam o ol i stap long wanem hap kona.



Rong Bilong Pasindia Sip MAY, 1999

For Passenger Bookings or Information
Contact Titus or Ita Ph: 472 2066 Fax: 472 5806, P. O. Box 1459, Lae, Morobe Province.

Vessel	Voy No.	Sailing from Lae for:	Day	Date	Time
Please Note					
*Gejamsao >>>>>> Offers Daily Passenger & Parcel between Lae and Buki					
*Gejamsao >>>>>> Departs Lae @ 0900am and Arrives Buki at 11.30am					
*Gejamsao >>>>>> Departs Buki @ 12.30pm and Arrives at Lae at 3.00pm					
*Mamose Exp.	607 D	Oro Bay	Sat	01-05-99	8pm
*Mamose Exp.	608 N	Fin/Wasu/Madang/Wewak	Mon	03-05-99	9am
*Rita	470 N	Kimbe/Rabaul/Kimbe/Lae	Mon	03-05-99	4pm
Umboi	565 N	Finsch/Wasu (Mad)	Tue	04-05-99	4pm
Nagada	428 A	Fin/Lab/Lae	Wed	05-05-99	4pm
Manebe	508 N	Lorengau (Lae)	Wed	05-05-99	4pm
Nagada	428 N	Fin/Sio/Wasu/GAL/Bil/Madang	Fri	07-05-99	12NN
*Rita	470 B	Fin/Lab/Fin/Lae	Fri	07-05-99	9am
*Rita	470 D	Oro Bay/Lae	Sat	08-05-99	8pm
*Rita	471 N	Fin/Wasu/Madang/Wewak	Mon	10-05-99	9am
*Mamose Exp.	609 N	Kimbe/Rabaul/Kimbe/Lae	Mon	10-05-99	4pm
Nagada	429 A	Fin/Wasu/Lae	Tue	11-05-99	4pm
Manebe	509 N	Lorengau (Madang)	Tue	11-05-99	4pm
*Mamose Exp.	609 B	Fin/Lab/Fin/Lae	Fri	14-05-99	5pm
*Mamose Exp.	609 D	Oro Bay	Sat	15-05-99	8pm
*Mamose Exp.	610 N	Fin/Wasu/Madang/Wewak	Mon	17-05-99	9am
*Rita	472 N	Kimbe/Rabaul/Kimbe/Lae	Mon	17-05-99	4pm
Nagada	430 A	Fin/Lab/Lae	Mon	17-05-99	4pm
Nagada	430 N	Fin/Sio/Wasu/GAL/Bil/Madang	Wed	19-05-99	12NN
Umboi	567 N	Lorengau (Lae)	Wed	19-05-99	4pm
*Rita	472 B	Fin/Lab/Fin/Lae	Fri	21-05-99	5pm
*Rita	472 D	Oro Bay/Lae	Sat	22-05-99	8pm
*Rita	473 N	Fin/Wasu/Madang	Mon	24-05-99	9am
*Mamose Exp.	611 N	Kimbe/Rabaul/Kimbe/Lae	Mon	24-05-99	4pm
Umboi	568 N	Finsch/Wasu (Mad)	Tue	25-05-99	4pm
*Mamose Exp.	911 B	Fin/Lab/Fin/Lae	Fri	28-05-99	5pm
*Mamose Exp.	611 D	Oro Bay	Sat	29-05-99	8pm
*Mamose Exp.	612 N	Kimbe/Rabaul/Kimbe/Lae	Mon	31-05-99	9am


Ron Bilong Kago Sip APRIL 1999

For Cargo Bookings Information:
Contact Philip or Yadi Ph: 472 2066 Fax: 472 5806, P.O. Box 1459, Lae, Morobe Province.

Vessel	Voy No.	Sailing from Lae for:-	Day	Date	Time
MAIN PORTS:					
Kuder	219 A	Madang	Tue	04-05-99	6pm
Manebe	508 N	Lorengau (Lae)	Wed	05-05-99	4pm
Kuder	219 N	Madang/Wewak/Vanimo	Fri	07-05-99	10pm
Manebe	509 N	Lorengau (Madang)	Tue	11-05-99	4pm
Wewak	350 A	Madang	Tue	11-05-99	6pm
Wewak	350 N	Madang/Wewak/Vanimo	Fri	14-05-99	10pm
Kuder	220 A	Madang	Tue	18-05-99	6pm
Umboi	567 N	Lorengau (Lae)	Wed	19-05-99	4pm
Kuder	220 N	Madang/Wewak/Vanimo	Fri	21-05-99	10pm
Wewak	351 A	Madang	Tue	25-05-99	6pm
Manebe	510 N	Lorengau (W/Coast, Lae) Dangerous	Wed	28-05-99	4pm
Wewak	351 N	Madang/Wewak/Vanimo	Fri	28-05-99	10pm

SMALL PORTS:

Umboi	565 N	Finsch/Wasu/(Mag)	Tue	04-05-99	4pm
Nagada	428 A	Lab Lab	Wed	05-05-99	4pm
Nagada	428 N	Sio/Wasu/Gal/Bil	Fri	07-05-99	12NN
Umboi	566 N	Finsch/Wasu/(Mag)	Tue	20-05-99	4pm
Nagada	429 A	Fin/Wasu/Lae	Tue	11-05-99	4pm
Nagada	429 N	Lab/Fin/Was/Dangerous	Thu	13-05-99	4pm
Nagada	430 A	Fin/Lab/Lae	Mon	17-05-99	4pm
Nagada	430 N	Fin/Sio/Wasu/GAL/Bil	Wed	19-05-99	12NN
Umboi	563 N	Finsch/Wasu/(Mag)	Tue	25-05-99	4pm



Mama na pikinini kamap pis

bungim kain kain hevi olsem sik i ken bungim ol, birua i ken kisim ol, kaikai bilong gaden i no inap karim gut kaikai na planti arapela hevi bai bungim ol. Olsem na meri ya i ting ol dispela kain hevi na em i wanbel long maritim dispela man ol bikman i makim long em.

Tupela i marit na bungim ol tripela pikinini wantaim na ol i save stap wantaim i go. Olgeta taim bai tupela i mekim gaden na ol wok bilong ples long sevim pikinini bilong tupela.

Ol i stap wantaim longpela taim i go na ol tripela pikinini ya i kamap yangpela manmeri.

Wanpela taim narapela brata na susa ya i wok long kamapim jeles tingting long yangpela boi ya, pikinini tru bilong meri ya (lukaut mama bilong ol). Olsem na ol i plen long ol i mas kamapim sampela kain trabel o hevi bai papa bilong ol i mas kros long yangpela boi ya.

Olsem na wanpela taim ol i go long gaden, tupela brata susa ya i giaman hait long bus na i go bek long ples na bagarapim olgeta kaikai insait long haus. Na bihain tupela i go bek long gaden na tokim papa bilong ol olsem sampela lain i bagarapim ol kaikai na ol samting long haus.

Taim papa bilong ol i go long apinun na painim aut, em i kros nogut tru na i askim husat tru i mekim dispela. Tasol tupela

brata susa i tok ol i no save na sutim tok long yangpela boi ya.

Wanpela taim, meri ya i mekim wanpela trik long mekim papa i kros nogut long yangpela boi ya. Olsem na wanpela taim, em i giaman long go waswas long wara na em i tokim boi ya kisim ol mambu i go long pulapim wara. Tasol boi ya i no save long meri ya bai i go tu long wara olsem na em i bungim ol mambu na karim i go daun long wara.

Taim em i kamap long wara, em i kirap nogut long lukim dispela susa bilong em i waswas long wara na i laik sem na i laik hait na go bek tasol meri ya i lukim em pinis na bikmaus. Em i bikmaus na singaut papa na brata bilong em na ol i kam. Em nau meri ya i mekim dispela giaman stori bilong em olsem boi ya i kam hait na luk stil long em i waswas long wara i stap.

Turangu boi ya i laik tokaut olsem em i no ting olsem meri bai i stap long wara tasol papa na brata bilong meri i kros nogut tru na paitim em. Tupela i bung na paitim em nogut tru na blut i kam daun bagarapim ol skin bilong em. Mama bilong em i lukim na i wari na sori nogut tru na krai long pikinini bilong em tasol yu save, man i het bilong famili na em i bos bilong ol olsem na em i daunim bel wari bilong em na krai isi long em yet.

Long dispela taim i go, papa i

no save wanbel long yangpela boi ya na em i stat long givim hat wok na salim em long ol longwe hap long mekim ol wok. Sampela taim bai ol i kaikai na i no inap skelim liklik kaikai bilong em na em i save hangre na slip nating.

Wanpela taim, mama bilong boi ya i lukim dispela pasin na i no gutpela long em olsem na em i mekim plen long tupela i mas ronawe. Long biknait, tru em i kirap kukim ol kaikai na redim i stap.

Taim man bilong em wantaim tupela lukaut pikinini i no harim, isi tasol em i go kirapim boi bilong em na tupela isi tasol kam ausait long haus na wokabaut i go.

Tupela wokabaut i go i go long painim wanpela gutpela hap bilong i stap.

Olsem na tupela i wokabaut i go i go na tupela i tait nogut tru na pundaun i go daun arere long wanpela wara na tanim kamap pis bilong wara na stap olgeta insait long wara.

Olsem na tude bai yu ken lukim olsem mama pis i save pulim ol pikinini bilong em na ol i save raun wantaim bikos ol i wok long raun wantaim long painim kaikai na hap bilong stap gut long en.

Em tasol stori tumbuna bilong mi.

**Mandem Malaka
Lae**



Nem: Daeen Robert

Krismas: 20 (meri)

Adres: C/- Konda Pty Ltd, P.O. Box 6222, Mt Hagen, WHP.

Save laikim: Lukim TV, tok stori na tok pilai, lap, raitim pas long ol poro, senisim ol poto na raun.

Nem: Beniey Mathias

Krismas: 19 (man)

Adres: P.O. Box 411, Wewak, East Sepik Province.

Save laikim: Raitim ol pas long ol pen-pren, ritim ol buk na niuspepa.

Nem: Benedict Huinpiaya

Krismas: 19 (man)

Adres: P.O. Box 411, Wewak, East Sepik Province.

Save laikim: Harim ol pop musik, ritim ol pas, raitim pas long ol pen-pren, go waswas long solwara, ritim National, Post Courier na Wantok Niuspepa.

Nem: Timothy Manda

Krismas: 18 (man)

Adres: Skul Bilong Stuakipa (SBS), P.O. Box 330, Wewak, ESP.

Save laikim: Go danis, pilai volibal, tok pilai na raitim pas i go i kam long ol pren.

Nem: Ken Miuage

Krismas: 24 (man)

Adres: P.O. Box 423, Kimbe, Oil Palm Province.

Save laikim: Raun long narapela provins, lukim EMTV, mi laikim manmeri krismas bilong 23 na 24 rait long mi, tingting planti long wanem samting bai kamap long Yia 2000.

Nem: Anderson Mikeo

Krismas: 21 (man)

Adres: P.O. Box 231, Kimbe, West New Britain Province.

Save laikim: Tok stori, was long muvi, senisim presen olsem ol poto.

Nem: Henry Jays

Krismas: 28 (man)

Adres: Business Financial Freedom P/L, P.O. Box 497, Madang, Madang Province.

Save laikim: Raitim pas long ol pen-pren, serim bisnis aidia, lukim TV na harim musik, ritim buk na niuspepa, swim long solwara.

Nem: Bede Aava

Krismas: 19 (man)

Adres: East Pac P/L, P.O. Box 1439, Lae Morobe Province.

Save laikim: Harim musik, tok pilai, tenkim God papa long olgeta samting, pre long Jisas long kisim was long TV.

Nem: Mark Tine Charles

Krismas: 20 (man)

Adres: Catholic Mission, P.O. Box 4, Kundiawa, Simbu Province.

Save laikim: Pilai basketbal, mekim fani, harim musik, tingting long ples tru bilong mi, Nt Solomon provins.

BIPO bipo tru i gat wanpela mama na pikinini i stap. Man bilong meri ya i dai pinis na meri ya i save lukautim pikinini man bilong em yet. Olgeta de em i save wok hat long gaden na painim abus bilong lukautim pikinini bilong em gut wantaim kaikai.

Em i save mekim olsem i go na ol manmeri long ples i lukim na sori long em. Olsem na i makim wanpela man long ples long maritim meri ya. Dispela man tu em meri bilong em i dai pinis na em tu i lukautim tupela liklik pikinini bilong em i stap.

Wanpela taim ol bikman i stetim gut toktok long miting long tupela i mas marit na stap wantaim na lukautim olgeta pikinini bilong tupela.

Meri i wanbel tasol bikos em disisen bilong ol bikman long ples na taim ol bikman i pasim tok, ol meri i mas harim na bihainim. Bikos sapos ol i no bihainim o sakim tok bilong ol bikman bilong ples, ol i ken



Mi no klia long husat bai mi maritim

bikpela moa long mi i gat laik long mi tasol mi les. Em i gat gutpela wok na em i gat wankain skul olsem long mi. Em i laik givim ol samting long mi na helpim mi tu long wok bilong mi tasol mi wok long no laik. Mi les long kisim ol presen na ol arapela samting long man we mi no gat laik long en.

Mi paul nau ya na mi no klia husat long maritim, boipren bilong mi o narapela man.

Tumult Within

Dia Pren,

Long tude, yumi lukim planti yangpela manki na meri i marit hariap taim krismas bilong ol i stap liklik yet. Taim yu glasim Wanpela samting em, bai yu painim olsem taim ol wan wan krismas i go na i kam, ol senis bai i kamap long pasin na kain lukluk bilong yu long laip.

Na man we yu maritim long nau bai i no wankain long dispela we yu inap maritim taim yu gat 20 krismas o abrusim dispela mak.

Tru, planti man na meri husat i marit taim ol i yangpela yet em marit bilong ol i wok. Tasol marit laip i gat bikpela wok, moa yet long sait bilong lukautim ol pikinini. Sapos yu marit taim yu yangpela yet, yu mas glasim, skelim na redim gut yu yet long ol hatwok we yu bai bungim.

I luk olsem yu gat bikpela laik long dispela manki-wantaim gutpela pasin bilong em. Yu wokim rait disisen long givim bikpela tingting long ol samting olsem gutpela pasin na stretpela tingting long narapela man we yu prenim.

Ol dispela kain gutpela pasin na luksave long wanpela arapela bai i helpim yu long kamapim gutpela marit we bai i gro strong

na i no inap long bruk.

Tasol yu tok yu na ol papamama bilong yu i wari olsem boipren ya i nogat gutpela skul bilong em. Sapos dispela samting i mekim yu wari, em inap kamapim hevi. Tasol i no min olsem man ya bai no kamap olsem wanpela gutpela man na papa, nogat.

Sapos yu lukim boipren bilong yu olsem em i stap aninit long yu na yu gat moa skul na save, bai hevi i kamap na sindaun bilong yutupela i no inap gutpela. I luk olsem yu laikim dispela boipren bilong yu i mas kisim narapela wok bikos dispela we em i gat i no gutpela tumas long lukluk, tingting na laik bilong yu. Mipela i luksave long dispela wari bilong yu tasol, lukaut.

Sapos yu no laik givim em long luksave olsem em yet na wok em i gat na traim long senisim em long inapim laik bilong yu, bai yu painimaut olsem dispela i no rot long kamapim wanpela gutpela marit laip.

Long narapela stori we narapela man i bikpela moa long yu na yu tok olsem yu no gat laik long en, yu wokim rait muv long no kisim ol presen we em i laik givim long yu. Tru em i gat wankain skul olsem yu tasol dispela i no gutpela as long yu maritim em.

Mipela i luksave olsem ating yu no redi gut yet long marit. I gutpela long yu long givim moa taim long strongim ol gutpela pasin bilong yu. Givim yu yet moa taim long bungim moa pipel na taim bilong yu long marit i kamap, yu bai redi long mekim gutpela disisen.

Moa yet, noken hariap na wokim disisen we bai yu no inap amamas long en long bihain taim bikos yu yangpela na yu gat bikpela taim yet i stap.

Laiplain



Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!

Pait long Kosovo, Yugoslavia

Pait long Kosovo wɛ NATO grup na ol poroman sapota kantri i karimaut egensim Presiden Slobodan Milosevic, ami na gavman bilong em i stap nau long wik 7.

NATO wantaim ol strongpela poroman kantri olsem Amerika bai i no inap long givap long dispela pait inap Presiden Milosevic na gavman bilong em i harim singaut bilong NATO long noken bagarapim ol Albania pipel na givim independends i go long Kosovo na ol Albania pipel bilong dispela provins.

Planti tausen Albania pipel i ronawe lusim Kosovo. Sampela i stap nau long ol refuji kem long neiba kantri Macedonia. Sampela em ol NATO kantri. Amerika, Australia, Nu Silan a na Greece i kisim ol na ol bai i stap long ol dispela kantri inap long hevi i pinis long Kosovo na ples i orait. Namba wan grup bilong ol Albania refuji i kamap pinis long las wiken long Sidni na ol bai putim ol long ol kem long ami bareks we ol i redim pinis. Balus Quantas Ealain i bin karim 410 refuji i go long Sidni long las wiken. Planti bilong ol i gat miks tingting, wanpela bilong amamas long ronawe lusim ol hevi we ol Serbia plis, ami na gavman i kamapim long ol na long nara-




• Dispela lapun Albania man i go pas long 3,000 Kosovo Albania pipel i go long refuji kem long Blace long Macedonia. Ol bas bai i kisim ol i go long Cegrane.

pela sait, sampela i pret liklik bikos ol i kam long nupela ples.

Long las wik, Serbia gavman bilong Presiden Milosevic i bin lusim tripela soldia bilong Amerika i go fri, bihainim ol toktok na bung we wanpela sios grup bilong Amerika i karimaut wantaim ol. Reveren Jessie Jackson i bin go pas long dispela grup. Nau, Rasia i kamap olsem namel kantri long traim kamapim ol gutpela toktok namel long gavman bilong Yugoslavia na NATO na ol poroman kantri husat i stap insait long pait long Kosovo. Ol NATO balus i wok long bomim na tromoi ol krus misait long ol piul na komyu-

nikesen taget olsem ol bris na ol arapela samting. Ol i makim tu bilding we Sosialis Pati bilong Presiden Milosevic i save operet long en wantaim tu sampela telivisen stesen long kantri. Pait long Kosovo em i bikipela hevi we Yurop i bungim bihain long Wol Wo 2, moa long 50 krismas i go pinis na tu, klostu long pinis bilong dispela senseri. Tenpela krismas i go pinis ol pipel long Yurop i no ting olsem bai i gat hevi long rijen. Bihainim pinis bilong Komunis Rasia na Berlin wol long Gemeni i pondaun, Yurop i bin ting olsem em nau, bai nogat moa politikel na ol arapela moa hevi i kamap long rijen



• Plis long Jakarta i was gut tru long trabel na Sekyuriti em i wanpela bikipela hevi we Is Timor i lukluk long en long taim bilong vot long referendum long Ogas 8 i kamap klostu. I gat ol ripot olsem ol ami bilong Indonesia i wok long kamapim ol hevi long ol lain husat i sapotim Is Timor i laik bruk lusim Indonesia na kamap olsem wanpela independen kantri. Planti pipel long Is Timor i stap wantaim pret na i gat ripot olsem ami bilong Indonesia na liklik lain sapota bilong ol long Is Timor i wok long kilim dai na kamapim hevi long laip na sindaun bilong ol pipel long Is Timor.

trukai RICE

That's right



OL RIPOT BILONG VAT

Ol Kimbe grasrut wari long VAT

VERONICA HATUTASI i raitim

I GAT PRET olsem ol grasruts pipel long ol ples longwe long taun bai kisim moa hevi taim gavman i kamapim Velu Eded Takis (VAT) sistem long Julai 1, 1999. Dispela em bihain long wanpela mun i kam tasol.

Prais long ol samting long stua insait long ol ruel eria longwe long taun i go antap tru, winim ol dispela long taun. Laip na sindaun i hat moa nau bikos ol grasrut pipel i painim hat tru long rot bilong kisim mani na baim ol samting ol i laikim long lukautim laip na sindaun bilong ol. Olsem na taim pablik i harim olsem gavman i laik kamapim nupela sistem long pulim takis mani long ol guds (ol samting long stoa) na sevis, planti i wari tru. Ol grup olsem ol Tred Yunien, ol Sios na ol NGO i wari tru long hevi we VAT bai kamapim long ol grasrut pipel na long ol mun i go pinis, ol i wok long mekim ol strongpela toktok egensim VAT.

VAT em 10 pesen takis we gavman bai sasim long ol guds na sevis we pablik i kisim.

Nau yet, i gat ol kain takis we gavman i karimaut long pulim mani long en. Wanpela em long tri pesen (3%) Provinsal Seils Takis (PST) we ol provins i sasim putim long ol samting bilong stoa, ol piul na ol arapela samting moa. Ol ripot i tok sapos VAT i kamap, ol bai rausim PST sistem na bihainim (VAT) em tasol. Ol provins yet i makim mak bilong PST insait long wan wan hap bilong ol.

Gavman i laik putim kamap VAT long traim kamapim ikwal benefit long olgeta provins, aninit long wanpela takis sistem.

VAT em wanpela rot we Nesanel

Gavman bai i pulim mani, moa yet nau taim kantri i gat hevi long mani na strong bilong Kina i wok long pondaun. Em i wanpela rot tu we Gavman bai i pulim mani long kamapim ol wok go het (developmen) long ol rot, bris na ol bikpela sevis projek insait long kantri. Na tu long sait bilong kamapim na go hetim strong iekonomik developmen.

Long dispela taim, ol gavman opisa husat i wok long Intenel Revenyu Komisn (IRC) i wok long raun karimaut ol edukesen aweanes insait long sampela hap long kantri.

Long dispela wik, wanpela grup bilong ol IRC opisa i stap long Kimbe, Wes Nu Briten provins long karimaut aweanes long ol bisnis haus na ol memba bilong pablik.

Ripot i kam long Kimbe i tok ol grasrut i no klia gut yet long dispela nupela takis we gavman bai kamapim long mun Julai. Tasol ol i bilip strong olsem takis ya bai i givim taim tru long ol grasrut na i no ol kampani, ol bisnis haus na ol stua.

Long kwesten taim, pablik i bin putim ol askim i go long ol VAT opisa na planti i autim wari bilong ol olsem gavman i mas gat ol hait plen bilong em yet long dispela samting we i no wok long tokaut klia tumas long VAT. Tingting bilong pablik long dispela samting i wankain olsem dispela bilong Morobe Gavan Luther Weng we em bin autim long las wik.

Ol bisnis haus bai i kisim rifan (kisim bek mani) long dispela 15 pesen PST taim ol i pulumapim fom long pinis bilong yia, tasol ol konsuma bai nogat.

Olsem na ol grasrut long Kimbe husat i bin stap insait long bung i bin autim wari olsem dispela takis bai bringim moa hevi long ol.

VAT edukesen aweanes mas kamap

WANPELA indipenden stadi grup i bin karimaut ripot long kikbek we VAT bai kamapim long PNG taim ol i statim long Julai 1.

Siaman bilong indipenden ripot long kikbek we VAT i ken kamapim, Mike Manning i tok i mas gat edukesen aweanes long pablik na ol grasrut i go daun long viles level long redim ol pipel long taim samting ya i stat long wok.

Mista manning i wokim dispela toktok bihainim ol askim we planti pipel i gat olsem sapos VAT bai i wok tru tru o nogat.

Toktok bilong em i wankain olsem dispela bilong stadi grup husat i gat strongpela tingting olsem gutpela rot long daunim ol hevi we i sut long VAT em long skulim ol man meri long olgeta seksen bilong komyuniti em long luksave olsem bai i gat hevi taim VAT i kamap na ol ken redi gut long en.

Grup ripot i tok tu olsem Palamern bai i no inap long pasim Konsuma Afeas Lejislesen Ekt (Fea Tred Entaprais) bipo long ol i tok oraitim VAT sistem na i gutpela

sapos gavman sapatim Konsuma Afeas kaunsil (CAC) na Intenel Revenyu Komisn (IRC) long karimaut ol aweanes kempein we i sut long dispela samting. Grup i tok tu olsem i moabeta long CAC long mekim klia long ol provinsal edministreta olsem ol i mas sekim ol lokol bisnis haus i noken apim prais nating prais bilong ol samting we bai i givim hatpela taim long ol grasrut.

Grup i bilip olsem tingting we gavman i gat long kamapim ol provinsal koleksen opis na long wankain taim peim ol edministretiv kos bilong sistem, bai helpim rausim pret we ol provinsal gavman i gat.

Grup i tok i moabeta long CAC na IRC i skruim wok long karimaut edukesen aweanes nau na taim VAT i stat, lukim olsem prais bilong ol samting long stoa i no go antap nating.

Gavman i luksave olsem rais em i wanpela kaikai we ol grasrut i save baim olgeta taim, ol i wokim wanpela spesel arenjmen long noken sasim VAT takis long en. Gavman bai peim bikpela

hap mani long kos bilong rais na VAT we ol konsuma bai i peim em i hap mani long peim kos bilong rais.

VAT bai i rausim dispela Provinsal Seils Takis na kamapim wanpela mak bilong katim takis insait long kantri we bai nesanel na provinsal gavman bai serim mani (revenyu) long en.

VAT takis sistem bai i gat kikbek long tripela grup bilong ol sevis na dispela em long :

- Kos bai i noken go antap long ol (eksem) sevis olsem dispela we ol dokta, skul na ol PMV i save givim.

- Ol arapela sevis na ol samting bilong stoa we nau pablik i save peim takis long en em bai i kam aninit long VAT na peim 6-7 pesen takis.

- Pe bilong ol sevis olsem ol balus fe (tiket), pawa na lait na telipon bai i go antap, long laik bilong prais kontrola.

VAT bai i no inap long karamapim ol gaden kaikai we ol pipel i save salim long maket, tasol ol dispela we ol i kisim long ovasis na ol i salim.

Wok didiman i mas go het

WOK didiman o agrikalsa em wanpela rot tasol long kamapim gutpela ikonomi insait long kantri we em bai ron strong na tu resis wantaim ol narapela samting long ikonomi, Gavana Luther Wenge i mekim dispela toktok long las wik Trinde hia long Lae.

Em i tok ol minerol na ges risos em bai i no inap stap longpela taim long dispela graun tasol wok didiman em i namba wan na bai stap longpela taim long graun.

"Tru tru bisnis o samting bilong ol Papua Niugini long naturel risos i save stap wantaim ol lain long ples.

Sapos ol i tingting long yusim dispela orait ol i mas kisim wok didiman i mas go na kisim ples bilong en," Mista Wenge i tok.

Em i mekim dispela toktok bihain long opim tupela-de Open De we i bin kamap long Bubia we Nesanel Agrikalsa Rises Institut (NARI) i bin putim kamap long amamasim namba tu bon de bilong en.

Em i tok tu olsem planti bilong ol dispela pipel i save stap long ples na ol i save kaikai long wok didiman bilong ol. Olsem na ol gutpela kaikai, nutrisen, skul na ol narapela samting bai i go antap tru.



• Ol pipel bilong Makam, Watarais i soim sapat bilong ol wantaim Morobe Gavan Luther Wenge na Sentrel Gavana Ted Diro egensim VAT takis bilong gavman.

Kempen kamap long salensim VAT takis

YAKAM KELO i raitim

GAVANA bilong Sentrel provins Ted Diro wantaim Morobe Gavana Luther Wenge bai tokim ol manmeri bilong Mosbi long dispela Sande long egensim dispela nupela takis lo bilong Velu Eded Takis (VAT).

Dispela kempen bilong egensim nupela takis lo i bin kamap long Lae na Watarais long Morobe provins we Morobe Gavana Luther Wenge i go pas long en.

Dispela kempen egensim VAT bai kamap long olgeta hap bilong Papua Niugini we Gavana Wenge na ol arapela lida bai raun tokim ol manmeri long i no ken sapatim.

Wanpela bikpela wok bai i kamap long dispela kempen long askim ol manmeri long soim sapat bilong ol wantaim mani long ol lida i ken bungim na kotim nesanel gavman long stapim dispela lo bilong VAT long i no ken kamap long mun Julai.

Long dispela taim tu, opis bilong Takis, Intenel Revenyu Komisn

(IRC) i statim pinis kempen bilong em insait long olgeta hap bilong PNG long mekim klia ol wok na wanem samting bai VAT i mekim na kamapim long ol manmeri na long kantri.

Long dispela wiken bai dispela bung wantaim ol manmeri long Mosbi bai kamap long Sir John Guise stadium we ol manmeri i ken go harim na autim tingting bilong ol long dispela bung.

Morobe Gavana i laik bungim ol mani bilong baim ol loya bilong salensim dispela lo long i noken

kamap. Ol i lukluk long mak olsem K1 milien long kisim ol loya i kam long ovasis we kantri bilong ol gat dispela lo bilong VAT takis. Bai ol i ken tokaut long kot wanem kain hevi o gutpela em VAT takis i bin kamapim long kantri bilong ol.

Palamen i pasim lo bilong VAT takis pinis long Novemba las yia na dispela lo bai kamap long mun Julai. Olgeta samting long stua na kago na ol sevis bai baim 10 pesen (%) takis.

Tasol Gavman i tok sampela bikpela samting olsem kaikai

bilong stua na arapela bai i nogat dispela 10% VAT takis long ol.

Planti lida bilong palamen na bisnisan i bin toktok egensim dispela VAT takis lo bikos ol i ting nau i no taim yet long kamapim dispela takis. Hevi bilong mani i bikpela yet long kantri na ol bisnis insait long kantri i no sanap strong yet.

Ol i laikim bai VAT takis lo i mas stap i go sampela taim bihain we wok bisnis i kirap na mani bilong kantri i kamap gut gen, orait dispela lo bilong takis i ken kamap.

KANAGE



AIYOO, PIKININI! YU BAIM TIKET BILONG MI I KAM LONG GOROKA, TASOL HUSAT BAIM TIKET BILONG OL KAUKAU YAH NA OL I KAM LONG HIA! MI LAIKIM RAS, INO KAUKAU!

NOGIAT YAH! MI MEKIM GADEN ARERE LONG HAUS NA PLANIM OL DISPELA KAUKAU, YAH!



Kanage save aigris tru long wanpela yangpela meri Goroka. Olsem na wanpela taim em i go long maket na giaman raun long wetim meri ya bai i kam. Em i raun raun i go na klostu apinun na meri ya i kam. Taim meri ya i kamap, Kanage kisim hai filings na i go klostu long meri ya na tokim em, rait meri, aste nait mi bin slip na mi driman long yu ya. Taim meri ya i harim olsem em bekim gen, mi tu bin driman na mi lukim wanpela kain man olsem yu ya. Man ya i em wanpela so op man tru na kus i no isi long nus bilong em. Kanage harim na tok, a mi save, em mas namba tu bilong mi ya.

Patrick Bos Kimbe

Wanpela taim Kanage wantaim waitman bos bilong em i go painim pik long bus. Tupela raun long bus i go na waitman i lukim wanpela wel pik na em givim sotgan long Kanage long go kilim dispela pik wantaim sotgan. Kanage holim gan tasol na wokabaut i go klostu long pik na em tokim sotgan, kilim em, kilim em. Tasol nogat wanpela samting i kamap olsem na Kanage i ting sotgan i mas hangre ya. Em rausim wanpela mau banana na subim long maus bilong sotgan. Tasol nogat wanpela samting i kamap. Em nau pik i ronawe taim waitman i kamap. Taim Kanage lukim waitman ya em tokim em olsem, em askim sotgan long kilim pik tasol em i no harim tok. Olsem na em ting gan i mas hangre na em givim em mau banana tasol nogat samting i kamap. Taim waitman i lukim olsem em belhat nogut tru na tokim Kanage, yu blari wel pik, go and hide. Waitman tromoi but antap long Kanage na em karim pen na tekov i kam bek long haus.

John Baum Madang.

Kanage bilong Karkar long Madang na wanpela taim em i go baim buai long Madang maket na mekimsave long spetim i stap. I no longtaim wanpela Bogia i kam na askim Kanage, pikinini, yu baim buai long we?. Kanage i les tru long man i distebim em olsem na em tokim lapun olsem, long beksait bilong yu. Taim lapun i harim em sem nogut na i go. Wanpela taim Kanage i ron long ka wantaim meri bilong em i kam long maket gen taim lapun Bogia i sanap na lukim Kanage i kam. Harim tru lapun i kirap na tokim Kanage, hey, yu kisim gelpren bilong mi i go we?. Taim Kanage harim na luksave olsem em sem lapun bipo em bin bagarapim em long toktok, Kanage skoa bilong Kanage i daun olgeta na em tekov.

Kanage pren Madang

Kanage bilong Simbu na wanpela taim ol meri long blok i givim em nem bilong wanpela meri long tupela i mas penpren. Taim Kanage i raitim pas na meri ya i save bekim, Kanage i save dai na kirap. Amamas bilong em i save moa yet tru olsem em i gat wanpela yangpela pren meri. Wanpela de meri ya i raitim pas long Kanage long tupela bai bung long Suave maket. Olsem na Kanage i dres ap gut tru na i go sindaun i stap na wetim meri ya. I no longtaim meri ya i raun i kam na Kanage lukim na ron i go holim han bilong em. Tasol meri ya i kirap nogut tru na tokim

Kanage olsem em i ting Kanage em wanpela yangpela boi. Tasol Kanage strong na tok, em mi tasol ya Mista Kanax. Meri ya harim na belhat nogut tru na tokim Kanage, yu no sais bilong mi, yu harim ah, yu lapun kela pinis wantaim planti tumbuna. Kanage harim na sem nogut tru na em kilim meri ya hap indai long maket long haitim sem bilong em. Ol manmeri i lukim na askim na Kanage tok, nogat pikinini meri i bikhet olsem na mi skulim em liklik.

Cathy Miamori Mosbi

Kanage em miks blut bilong Hailans na Papua na em marit long meri Wes Irian. Wanpela taim Kanage kisim bikipela sik malaria tru na tupela i go long haus sik. Kanage pilim nogut na tokim meri bilong em, daling i luk olsem mi bai dai nau tete. Taim misis i harim em tokim Kanage, taim yu dai, olgeta pipel long Papua Niugini bai krau nogut tru long yu bikos pohet bilong yu i olsem Sepik, hap ia bilong yu i olsem Madang, nus bilong yu i olsem Finsafen. Tupela hul long nus bilong yu i olsem Makam na Busu wara. Maus bilong yu i olsem wara Waria, mausgras bilong yu i olsem Samarai stret na lewa bilong yu i olsem aligr stret na gras long het bilong yu i olsem as gras bilong ol lain bilong mi long Wes Irian stret. Taim Kanage harim olsem, em belhat na bikmaus long meri bilong em olsem, yu wel bis bilong Ela Bis. Ol manmeri i harim na lap indai stret long tupela.

Gideon Fomi Goroka

Kanage em wanpela hap man bilong pilai soka na planti manmeri i save ful sapat tru long em. Taim yu kisim bai i kam klostu long em, bai Kanage i lep rait long yu na yu bai kisim bikipela hevi tru. Kik bilong em tu i save hat wan olgeta golkipa i save pret long em. Wanpela taim tim bilong Kanage i go long gren fainel wantaim ol boi bilong Siassi solwara bruk. Ol kik i go na nogat skoa i kamap yet inap long klostu ful taim na wanpela boi Siassi i pulim bai i go klostu long golmak bilong lain bilong Kanage na em i wok long trik trik na abrusim planti lain bilong Kanage. Paps Kanage i sanap long namel na lukim dispela na bel bilong em i bagarap nogut tru na em lokim spit

long hap yet na ron i go. Em i kamap long beksait bilong boi Siassi an i laik straikim em wantaim bal tasol manki Siassi i save na kalap. Olgeta strong bilong Kanage i pinis stret long bal na bai i go brukim han bilong golkipa bilong Kanage ol yet na i go insait long gol mak. Kanage i skorim gol i go insait long mak bilong em yet. Turangu Kanage i sem nogut tru bikos tim bilong em i lus long gren fainel na ol boi Siassi solwara bruk i winim gren fainel.

Junia Nickson Siassi

Kanage bilong Buang long Morobe provins. Wanpela taim meri bilong em i gat bel olsem na tupela i go long haus sik long Lae. Ol dokta i kisim misis Kanage igo insait na Kanage i stap ausait. I no longtaim, misis Kanage i kam ausait na Kanage askim, bebi we?. Na misis Kanage tok, sori paps, ol dokta i tok win i pulap long bel bilong mi olsem na ol i slekim win pinis. Taim Kanage harim olsem em i go insait na askim ol dokta, olsem wanem na misis bilong mi gat win tasol long bel bilong em?. Yupela ting mi karim pam bilong baisikol ah?.

Boncoy Mossie Bulolo

Kanage wantaim poro bilong em Tobias i go stil long wanpela gaden. Kanage i go stilim ol painapol na Tobias i go stilim tomato. I no longtaim papa bilong gaden i kamap na holim Tobias na kilim em nogut tru. Orait papa bilong gaden kirap na tokim Tobias, yu kisim ol dispela tomato na subim long as bilong yu nau tasol na mi bai lukluk. Tobias kisim ol tomato na subim long as bilong em pinis na em stat long lap. Taim papa bilong gaden i lukim Tobias i lap em askim, yu lap long wanem, tomato i swit long as bilong yu ah?. Tasol Tobias kirap na bekim, nogat, mi lap bikos mi sori long Kanage ya, em stilim painapol long hap sait i stap.

John Baum Madang

Papa Kanage i save stap long Goroka asples na les pinis long kaikai kaukau. Olsem na em i go long Mosbi long stap wantaim

pikinini meri na famili. Taim em i kam daun long Mosbi, em i amamas tru long bungim pikinini meri na ol bubu bilong em. Taim ol i go kamap long haus, pikinini meri tokim ol pikinini long stori wantaim bubu Kanage na em bai kukim kaikai. Orait taim kaikai i redi pinis, olgeta pikinini i sindaun na kisim plet kaikai bilong ol. Kanage i lukim bikipela plet tru pikinini meri i givim em na em ting rais na em amamas nogut tru. Taim em i opim ai bilong plet na lukim ol kaukau i pulap long dis, em kirap nogut na askim pikinini meri, yupela salim tok long mi kam long Mosbi ya, na husat baim tiket bilong ol lain ya long kam?. Pikinini meri i paul tru long kwesten bilong papa Kanage. Yu save papa Kanage i lusim ples long kaukau tasol na ting bai em kaikai rais long Mosbi.

Awa Tim Lae

Kanage stap long ples i go nogat na em i go raun long Mosbi. Wanpela wiken em i go raun long Boroko na bungim wanpela Sepik poroman bilong em long bipo. Orait tupela pasim tok long baim 6 peks na go dring. Tupela dring pinis na kalap long wanpela taxi. Taxi i karim tupela raun raun na bil bilong taxi i go antap long K50. Taim taxi draiva i askim tupela, tupela nogat K50 long baim. Mekim na draiva bilong taxi holim wanpela bikipela tamiok na soim tupela na pretim tupela nogut tru. Draiva i tokim tupela, sapos nogat mani, yutupela bai kaikai hendel bilong mi o nogat bai yutupela i kaikai tamiok. Tupela i sotwin nogut tru na Kanage kirap na tokim Sepik poro bilong em, laip bilong mitupela i stap long maus bilong yu, yu kaikai na mitupela i go nating.

Awa Tim Lae

Kanage em wanpela hapman bilong go karim lek wantaim ol yangpela meri Simbu. Wanpela taim em i bin go karim lek na bungim wanpela naispela meri bilong Sinasina. Taim tupela karim lek i go, Kanage kisim bikipela filings tru winim olgeta manmeri. Olsem na em tok win tasol long meri Sinasina, larim lek mekim wok na larim han bilong yu flai kam daun hetkota bilong mi. Orait long narapela de meri Sinasina i mekim plen pinis na haitim wanpela lip

sarak na karim i go. Kanage i ting em i autim tiket bilong meri Sinasina pinis olsem na em stailim gut tru long bilas na i go. Taim tupela statim wok bilong karim lek gen, Kanage isi tasol tokim meri Sinasina, yu na mi em rait olgeta, rait patna ya. Larim lek i mekim long laik na han tu i mekim wok bilong em. Isi tasol meri Sinasina rausim lip sarak na holim long han. Taim em subim han i go na holim hetkota bilong Kanage, em karamapim lip sarak raunim olgeta hetkota bilong Kanage na Kanage bikmaus, yes rait, no no, hot wan, hot wan. Em bikmaus olsem na kirap kalap lusim ples bilong karim lek na kalap kalap i go long haus na i no kam bek moa. Olgeta manmeri insait long haus karim lek i paul nogut tru na ting Kanage i mas kisim sik longlong long meri Sinasina.

Pita Marasin Hagen.

Kanage hangre wantaim na i go long lotu. Long lotu, pasto i givim komunjon long ol manmeri na Kanage hangre tu olsem na em igo kaikai tasol. Em i kaikai komunjon pinis na em i go sindaun. Tasol hangre i stap yet olsem em na em joinim lain gen na i go kaikai. Taim pasto lukim Kanage i kam bek namba tu taim, isi tasol pasto tokim em, yu kaikai pinis ya, bilong wanem na yu kam bek gen long sotim skel bilong ol arapela lain?. Kanage harim na bekim, pasto, em orait ya, mi winim longpela lain pinis na kamap long alta ya, noken tok bikipela bai olgeta manmeri i harim. Nogut ol manmeri bai ting yumi wantok sistem ya.

Elipek Mosbi

Kanage bilong Minz na em i go long Hagen taun na raun long ol stua. Em i raun i go na go insait long Steamship Hardware stua. Em i lukim wanpela naispela tamiok tru na em i go baim. Em i baim pinis na karim i go sindaun long bus stop long go bek long ples. Em i sindaun i stap na wanpela bikman bilong Tari i kam na askim Kanage, pren, yu baim tamiok bilong yu we?. Kanage kirap na tokim man Tari, mi baim long Singsip Andawe. Ol manmeri i sindaun arere i harim na lap indai nogut tru.

Mek Du Banz

KANAGE

"Em nau, narapela wik bilong mi ken"



Kanage i bilong ples Yamap na em i maritim meri wantok yet. Wanpela taim, meri i gat bel na tupela i go long Wau haus sik. Taim meri bilong Kanage i karim pikinini pinis, Kanage i go insait long lukim. Taim em i lukim pikinini, em tanim het na tokim ol meri nes, olsem wanem, Yamap tu Yamap na Buka kamap?. Ol meri nes i paul olgeta na Kanage lus nating long haus sik.

Topias Yateng
Wau

Lapun Kanage wantaim pikinini meri i laik go salim kawiwi long Kimbe maket. Wanpela pmv ka i kam na tupela stopim na tromoi ol bek kawiwi igo antap. Tupela i isis tumas na boskru bikmaus long Kanage na pikinini meri olsem, yutupela goap hariap, noken west-im taim. Taim Kanage harim olsem, em kisim rong tingting na rausim olgeta bek kawiwi i kam daun.

Wawen Robasil
Kimbe

Kanage i bilong Goroka na em i go salim ol kabis long Lae maket. Em i salim i stap na lukim wanpela meri Hagen i werim tait trausis na i kam. Ai bilong Kanage i lok stret long meri ya na han bilong em guria na tasim as bilong meri ya. Taim meri Hagen i pilim olsem em tanim na tokim Kanage, isi long tasim tasol em bai hat long wok on it. Taim Kanage harim olsem em bekim, em orait, its for tats filings tasol.

Atex Tais
Goroka.

Kanage wantaim poro bilong em i pasim tok na i go stiiim pinat long gaden bilong wanpela man long nait. Tupela i stiiim ol pinat pinis na Kanage i go sindaun bilong em yet na poro bilong em i go sindaun long narapela sait na tupela mekim save long kaikai pinat i stap. Kanage tu igat bikpela kela long het bilong em tasol em i save haitim long hat. Long dispela nait em i rausim hat na pulapim ol pinat long em na kaikai i stap. I no long-taim papa bilong gaden i kam na poro bilong Kanage i lukim na ron-awe. Taim em i ron i go, em i lukim kela bilong Kanage i lait long mun lait na em i ting wanpela hap ston. Olsem na em i ron tasol i go holim het bilong Kanage na putim kamaut na i laik tromoi long papa bilong gaden. Turangu Kanage i flai kam ausait na hap i dai bikos nek bilong em i lus na em i go slip tupela mun long haus sik. Ol dokta long haus sik i putim bikpela simen raunim nek bilong Kanage na em karim raun.

Beutus Aukzy
Vanjimo

Poro bilong Kanage i dai olsem na Kanage wantaim misis bilong em i go long lukim. Tupela igo kamap long haus kra i na Kanage i go sindaun arere long paia wantaim ol arapela manmeri na kra i nogut tru istap. Kanage i kra i go na opim lek bilong em na sem taim, winis bilong em i hangamap i kam daun. Taim meri bilong Kanage i laik tanim na lukim winis bilong masta bilong em i hangamap i kam daun ples klia, em bikmaus, aiyo, masalai bilong ol Sepik tu i kam stap wantaim yumi ya. Taim Kanage harim olsem em bekim, masalai i wari long poro bilong em na i kam tu long soim



wari bilong em ya. Olgeta manmeri long haus kra i harim na stopim kra i na kilim skin long lap stret.

Reks Yanga
Wewak

Kanage i kisim holide long wok na kisim famili bilong em na ol i go long ples. Long ples olgeta manmeri i no save bung gut na mekim gut wok bilong ples. Wanpela taim bikpela miting i kamap na ol bikman i hatim ol manmeri long ples nogut tru long bikhet pasin ol i save mekim. Em nau Kanage i skelim olgeta toktok i go pinis na em i laik autim tingting bilong em tu long ol pipel bilong ples. Olsem na Kanage i sanap na bikmaus. Yupela olgeta pasim glu glang maus bilong yupela. Yupela i laik so op na apim nem bilong yupela long wanem samting?. Yupela i winim amaspela pait, edukesen, bisnis, drigri, ovasis na waitman pinis?. Bai yupela i stap kanaka olsem yet na go bek hait insait long as target bilong tumbuna bilong yupela. Sapos yupela ol man i karim, bai yupela i yusim het na tenis. Tasol ating ol mungi i mas karim yupela olsem na pes bilong yupela olgeta i olsem king kong. Taim ol manmeri i harim, ol i lap indai nogut tru.

Rocky Ricky
Wabeg

Kanage wantaim ol poroman bilong em i raun i go long gaden na em i lukim graun i bruk nabaut long olgeta hap na bagarapim gaden. Kanage i sanap skelim i go na em tokim olgeta pren bilong em, hei yupela kam na lukim. Ol bikpela buldosa bilong Woks i kam na brukim graun na i go pinis. Taim ol poroman i harim olsem ol i ting tru na ron i go long lukim. Taim ol i luk-save olse em ol pik i brukim graun nabaut, ol i lap indai bikos ol i klia olsem Kanage i tok pilai long ol.

Misis R Smaliya
Sandaun

Kanage i bilong ples Samanai long Sandaun provins. Wanpela de em i go lukim kandre bilong em long ples Usari. Kandre i lukim Kanage na amamas askim em long tupela i go raun painim abus. Olsem na tupela i go painim abus long bus na Kanage i go long wanpela gaden na lukim mak bilong pik i brukim gaden na kaikai ol tapiok na go pinis. Hariap tasol Kanage singautim kandre bilong em na tokim em, kam hariap na lukim, tapiok i kaikai pik pinis na i go.

Kandre i paul na askim gen, yu tok wanem?. Na Kanage i tok, tapiok i kaikai pik pinis na i go. Kanage bilong em i kamap lukim na les nogut tru na kisim Kanage i go bek long ples.

Richard Smaliya
Sandaun

Kanage i go long stua long baim Ox & Pam tin mit na wanpela paket noodles. Taim em i kamap long stua, em i tokim stua kipa, mi laik baim wanpela Oksen pan na snek snek. Stua kipa i go kisim tin mit na givim em tasol em i paul long snek snek olsem na em askim Kanage i laikim wanem. Tasol Kanage i strong yet na tok snek snek. Stua kipa i paul na soim olgeta samting long stua tasol Kanage i tok nogat. Taim stua kipa i soim paket maggie noodles, em nau Kanage i bikmaus, thats the one, my kai. Stua kipa i lap nogut tru long Kanage na Kanage karim ol kaikai bilong em na lus long stua.

Emmelda na Bernadette
Smaliya
Sandaun

Kanage i bilong Arowe stret na wanpela taim em i raun long Kimbe taun long wiken. Em i raun raun i go na apinun tru na i laik go bek long ples. Ples i klostu olsem na Kanage wokabaut isi long rot i go na harim kra i bilong wanpela ka i kam. Kwiktaim Kanage karim wanpela traipela hap diwai na tromoi i go blokim rot na em i go hait. Taim ka ya i kam na lukim diwai, ka i putim ful brek na kwiktaim Kanage kalap long bus i kam ausait. Draiva i lukim na ting raskol i laik hensapim ol. Tasol Kanage i smail na tok, nogat mi laik kalap long ka i go long ples ya. Draiva i belhat wantaim na tokim em, yu rausim diwai rot na kalap. Orait Kanage i rausim diwai pinis na kalap long beksait na ol i go. Draiva i belhat na i laik bekim olsem na em givim 60 stret na kamap long ples bilong Kanage. Tasol draiva i no stop. Em spit moa yet na abrusim ples bilong Kanage na Kanage bikmaus tasol draiva i no harim tok bilong em. Draiva i karim Kanage i go longwe tru na stopim ka tokim Kanage long go daun na wokabaut i go bek long ples bilong em. Bikpela ren tu na Kanage kisim bagarap long rot na wokabaut i go bek.

James Mu
Kimbe

Kanage i bin giamanem meri pikinini bilong em olsem em bai i go lukim pilai. Tasol samting tru em i go long klap na mekim save long dring i stap. Taim em i dring i go, olgeta mani i pinis na em i spak wantaim na wokabaut i go bek long haus. Taim meri pikinini lukim em spak na i kam, ol i hatim em nogut tru long giaman pasin em i mekim long-ol. Orait famili belhat na i no kukim kaikai bilong Kanage na em slip hangre. Long nait Kanage hangre kilim em stret na em i go sekim ol plet na sospen tasol nogat wanpela hap kaikai i stap. Kanage belhat tasol rausim nupela sospen meri i baim na karim i go salim long K10 na go baim bisket na tin mit na kaikai. Long moning meri painim sospen nogat na askim Kanage na em haitim tok. Tasol wanpela wik bihain, meri i painimaut olsem Paps Kanage i salim sospen long K10. em holim hot wara bilong tipot na tromoi antap long turangu Kanage na pes bilong em i tenis i go wait.

Kanage Neba
Mosbi

Krismas taim na Kanage i laik wokim liklik hom bru bilong em long dring na spak liklik long krismas taim. Olsem na бага i go baim ol mau banana i kam na wokim hom bru i stap. Taim em i redim gut hom bru bilong em long wanpela botol i stap, em i hatim long kona bilong kabot. Tasol em ino haitim gut na misis bilong em painimaut na belhat nogut tru. Isi tasol Misis Kanage igo bungim ol lombo na kam brukim na tromoi wara bilong lombo i go insait miks wantaim hom bru bilong Kanage. Taim krismas stret na ol manmeri amamas i stap, Kanage i karim hom bru botol bilong em i go sindaun wantaim ol bikman na ol i sindaun. Taim Kanage opim botol na apim wan maus na daunim, sore, ol lombo i laik kik bek, bel bilong Kanage i paia lait stret na maus bilong em i kuk wantaim na em kalap kalap long dispela hap na ol manmeri i ting Kanage i spak na amamas i stap.

Junia Max
Popondeta

Kanage em man bilong bikmaus nating ol manmeri i save kam arere long haus bilong em na mekim planti nois. Em i save bikmaus na tok nogut tu long ol manmeri na ol i pret long harim ol tok nogut bilong em. Olsem na man o meri i wokabaut long sait bilong haus bilong

Kanage, ol i save wokabaut isi tasol nogat nois. Wanpela taim ol polis patrol i raun long strit na i kam long banis bilong Kanage ol i lap na mekim planti nois antap long ka. Taim Kanage i harim olsem em bikmaus i go bek long ol olsem, yupela man o dram. Maus bilong yupela op olsem maus bilong 44 galen dram, yupela sarap na pis op, blari musmus. Taim ol polisman i harim olsem, ol i kam insait long haus na askim Kanage, bikman yu tok wanem?. Taim Kanage lukim blu yunion na maus bilong sotgan, em kwiktaim tokim ol, sori ol bos, mi no tok long yupela, mi tok long ol boi bilong mipela yet ya. Ol polisman i save olsem Kanage i giaman olsem na ol i kisim rop na pasim tupela han bilong Kanage i kam lokim maus bilong em na ol tekov na Kanage i lok insait long haus i stap.

Jim Braun
Mosbi

Kanage i kisim balus long Mosbi na i laik go long Lae. Long Nadzab ples balus, lapun mama bilong Kanage i kam wet i stap na lukim Kanage i kam ausait long dua bilong balus na em bikmaus long teminoli, i yaga boi bolong mi ya, wanpis lewa ya i kam. Kaumboi hat na hangisip long nek wantaim longpela ami trausis olsem ami bilong gavman ya. Ai galas tu i olsem ninga ya. Ol manmeri i harim na i no isi long lap indai long ples balus.

Kanage spai
Lae

Kanage i lusim Lae na i go long Wewak long painim wok. Em raun long Wewak taun long maket na lukim ol flawa bilong Sepik na bel bilong em i seksek tru na em i laik stap olgeta long hap. Kanage i go long telefon na ringim poro bilong em long Lae na tokim em, kande, Wewak em tru paradais ya. Ol pisin ya flai flai nabaut nabaut long rot na hat long sutim long katapel ya. Yu kilim, bai narapela i mekim win long ia bilong yu, i no sot, pulap moa. Poro bilong Kanage harim na bekim, yu mas kisim planti ston na i go, nogut ston i sot na ol pisin bai tanim bek na pinisim yu. Kanage bekim, no waris, bun bilong Sio em mi karim i kam ya. Poro bilong Kanage i harim na lap nogut tru na tokim em, kisim blok na bihain tok-save na bai mi kam tu long Wewak. Yu save, Kanage i ai op long ol meri Sepik na em lus ting long go bek long Lae.

Wewak taun i nogat senis

MIPELA long Is Sepik i no senis yet long sampela samting. Angoram long bipo i luk nais tru tasol nau bus i karamapim. Provinsel Kapitel, Wewak bipo i orait. Tasol nau ol rot long taun yet i bagarap olgeta i go inap long ol ples insait long ol bikipela maunten, kunai na wara.

Planti ol pipel long Is Sepik i save tok Wewak em i 'full grown' taun o i nogat

wanpela gutpela senis i kamap. Olgeta sevis bilong bipo i stap yet na i wok long bagarap.

Taim yumi komplek long Wantok Niuspepa, ol bikipela saveman i no inap long lukim bikos ol i no inap westim taim long tok pisin niuspepa.

Wantok Niuspepa em pepa bilong yumi ol grasrut. Yumi olgeta mas traim na

painim sampela we gen long bringim ol hevi i go long ol bikipela man na meri long Papua Niugini.

Mi yet, mi i no save husat i asua, ol provinsel politisen o ol nesenel politisen.

LUIZIPHER KOY
Bung Ailan, ESP

Pipel i gat pawa long votim rait lida

Mi laik egensim pas bilong tupela wantok hia, Nogin Sally. Pas bilong em i bin kamap long Wantok Niuspepa 1290 Mas 18, 1999 na Gideon Maie long Februari 4, 1999, we i tok: Finsafen pipel i longlong pinis.

Tupela brata mi laik tokim yutupela olsem, Philip Taku, Gavena bilong Nesenel Kapitel Distrik i no yusim mani bilong em (EDF) na givim i go long Is Sepik, nogat tru, o Toni Ila bipo i no salim mani i go long Kerema.

Toktok yutupela i toktok long memba bilong Finsafen i soim olsem yutupela i jeles tasol long memba. Tupela brata, harim gut, sapos wanpela memba i no wok gut orait pawa i stap long han bilong olgeta pipel long pinisim em long narapela ileksen.

I gat ol man i no bilong ilektoret i resis na taim ol i winim sia long Palamen, ol i mekim gutpela wok tru maski i no ples bilong ol o ol wanpinis bilong em i no

stap.

Taim yutupela komplek long pablik, yutupela i mas i gat sampela save olsem memba bilong Finsafen i no helpim ol Simbu.

Olgeta man na meri long Finsafen i gat bilip olsem boi Simbu inap makim maus bilong olgeta manmeri na pikinini long Finsafen olsem na ol i votim em i kamap memba.

Yutupela i olsem ol emti dram i save mekim nois tumas. Harim tupela brata. Noken komplek tumas. Man long asples Finsafen yet bai wokim planti wantok sistem ya.

Yutupela save, mi wanpela mangi Sepik i egensim yutupela, na noken ting olsem ol Finsafen i longlong, em yutupela ya. Mi bai amamas long harim yutupela i bekim pas bilong mi.

LISZIPHER KOY
BUNA AILAN, ESP

Nem 'Sisano lagun' i no inap senis

Mi laik bekim pas bilong brata Gabriel Antei i bin kamap long Wantok niuspepa long 18 Mas. Brata yu bin tok long rausim ren 'Sisano lagun', tasol em bai hat.

Dispela nem i bikipela long kantri na long provins. Mi mangi Sisano na mi laik askim yu long painim olpela mep bilong bipo na yu lukim em Warapu lagun o Sissano lagun?

Yu skelim tokples stat long Malol, Arop, Sisano na Sera. Tokples bilong yu i wankain long mipela?

Mi laik save bilong wanem na ol Warapu i bin toktok strong long kisim bek dispela hap graun we Vanimo taun i sin-

daun long en?

Brata, yu bin kirap long Vanimo na yu painim pis i go na go insait long Sisano Lagun. Sisano i bin helpim yu long wanpela grille meri na nau yu gat bikipela populesen na nau yu stap. Kiap bilong bipo i bin stopim mipela na nau yu stap. Sapos nogat, yu no inap long sindaun olsem. Yu pasim maus na stap isi wantaim mi. Maski long painim toktok. Em tasol na husat i laik sapotim mi o agensim mi, mi amamas tasol. Tenkyu.

MOSES MOTI
AITAPE, WES KOS

Goilala tanim bel na yu?

OL brata susa bilong Goilala i karim kruse i kam insait long Mosbi siti bilong yumi. Yumi lukim planti samting i kamap. Planti manmeri i givim laip i go long God na tanim bel. I no ol Katolik tasol. Nogat. Olgeta arapela kristen na tu dispela i strongim bilip bilong yumi. Na planti brata bilong yumi i lusim pasin nogut na ol samting bilong pait tu.

Yumi tenkim bikipela long dispela wok marimari bilong ol lain Goilala. God i ken blesim ol na lukautim ol inap ol i putim kruse bilong ol long malolo long Yule ailan. Ol i bin mekim bikipela penens tru na yumi olgeta kristen i mas prea long ol.

Yumi tingim dispela taim bilong Ista Jisas i dai long diwai kros long sin bilong yumi.

Olsem tasol dispela diwai kros 105 i kam namel long yumi em i makim sin na

hevi bilong yumi wan wan.

Em i no bilong Katolik Sios tasol o wanpela grup. Em samting bilong yumi wan wan kristian yu husat i ting yu gat sampela asua long God long laip bilong yu, yu mas tingim bikipela wok penes ol brata susa i mekim.

Long 1960's i kam long 1980's ol Simbu save kisim nem nogut olgeta taim. Ol nambis i save kolim ol hailens 'Simbu' tasol olsem na olgeta hevi bilong ol hailens em ol Simbu i save karim.

Tude long Mosbi i gat kainkain manmeri long olgeta hap bilong kantri i kam wok na stap. Taim hevi kamap yumi sutim tok long Goilala.

Dispela nem i no save abrus long maus na tingting bilong olgeta manmeri na ol pikinini tu. Tingim Simbu bipo i save karim nem nogut bilong hailens. Tasol planti ol

Simbu na Goilala em ol i gutpela ol pipel.

Tude ol pipel bilong Goilala i tok sori long rong bilong ol long God. Yumi mas tok sori long ol brata susa bilong Goilala long pasin bilong yumi.

Yumi save lukim ol olsem ol lain nogut tru. Dispela tingting em wanpela bikipela hevi bilong yumi. Yumi mas sem long God na tok sori long dispela.

Yu husat narapela bikhet manmeri long Mosbi o long wanem hap kona bilong PNG i no klia yupela tu mas lusim samting bilong pait na tanim bel.

Laikim God na laikim narapela manmeri olsem yu save laikim yu yet. Dispela lo Jisas i save laikim tumas.

CIS Het Opis
L.A Teine

Sapos yu laik slaim ol pas bilong yu i kam long dispela niuspepa. Salim i kam long dispela adres:

THE EDITOR
WANTOK NEWSPAPER
PO BOX 1982, BOROKO,
National Capital District.

Hantu Malahang rot em i no tri we rot

Mi wanpela boi husat i save stap long Lae hia long Hanta na mi laik putim komplek bilong mi i go long ol pablik husat i save ronim ka long Hanta Malahang rot.


Mi bin lukim pinis planti ka i save abrusim arapela ka, maski narapela ka long hapsait bilong em i kam.

Mi no save ating pablik trenspot bod i mas putim nupela kain lo long ron bilong ol ka long Hanta Malahang rot tasol ya! Na tu mi laik komplek i go long ol dispela kontrakta husat i bin kisim kontrak long stretim rot aninit long AusAID mani olsem, olsem wanem-mani i pinis o?

Wanpela las wok yupela i no mekim em wait lain. Dispela tasol em yupela i no mekim olsem na ol draiva i save yusim rot olsem tri we spid we. Plis ol draiva, em i no tri we sistem rot bilong yupela, em tu we rot tasol. Mi putim dispela komplek bikos mi bin draiv i kam daun long Hanta na tupela PMV bas tu i bin ron resis long hapsait i kam olsem long China taun na klostu mipela olgeta i bin bam long hap.

Olsem na mi laik tok olsem; yupela husat papa blong ol kontrakta i stretim rot i mas pinisim wok bilong yupela olgeta. Em bikos mi i lukim pinis planti hevi i kamap long dispela nupela rot.

BASUE KIBAN
HANTA, LAE



PNG HIT

Parade
1999

SPONSOR - TRADEWINDS

W/B	LW	T/W	SONG	ARTIST
5	1	1	Oh Tingting	Demas Saul
14	5	2	Wok Masin	Kanai Pineri
4	2	3	Kopex Lewa	Kamezz Band
10	7	4	Aunty Jane	Honai Rhythm
9	8	5	Namaliau	Tamadogs
2	6	6	Sit mi Bogia	Kulsun Taritos
0	17	7	Brendy	Blue Mates
3	3	8	Sweet Darling	Maruia
1	4	9	Mango Uposi	Kulsun Taritos
6	9	10	Kayama	Maruia
0	0	11	16x 4	Connections Band
7	10	12	Biguine a Gogo	Rod Dannys
8	11	13	Tahiti Summer	Maruia
0	0	14	Suspect	Connections Band
12	13	15	Te rupe rupe ote natura	Rod Dannys
11	12	16	I Roto I To'u ora ra'a	New Generation
16	16	17	Name Soda	Steve Lahui
17	18	18	Ua ro'o hia to'u tino	New Generation
19	19	19	Madang	Demas Saul
13	14	20	Daiguai	Lia Osborne

IN: 16 x 4 Connections Band
Suspect Connections Band

OUT: Meri Ailan Demas Saul
Swit Teine Blong Moro XB1

PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995



TOK SAVE

Dispela toksave i go long ol lain husat i ronim PMV bas 16 sevis long Nesenel Kapitel Distrik olsem Nesenel Trensport Bod long nambawan miting bilong 1999, i tok orait long tupela (2) PMV sevis husat i stap pinis long go long McGregor Plis Bareks.

Dispela tupela PMV sevis bai ron olsem namba 16A.

PMV bas 16 bai stat long 3 mail haus sik na pinis long Bomana Plis na CIS Bareks. Em bai i ron long 4 Mail, 5 Mail, Courts, Gordons, Erima, 8 Mail, 9 Mail i go long Bomana Plis na CIS Bareks.

PMV bas 16A bai stat long 3 mail haus sik, ron long 4 Mail, 5 Mail, Courts, Gordons, Erima, 8 Mail i go olsem long 9 Mail Kuwari, Bomana Plis na CIS Bareks na kam bek bihainim wankain rot.

Nesenel Trensport Bod i askim ol lain husat i ronim PMV bas sevis na laik ron long rot bilong 16A long givim nem bilong ol long **Eksekyutiv Opisa, Pasinda Trensport long Len Trensport Divisen, Opis ov Trensport Hohola.**

VAGI TAUMAKU
Ekting Dairekta
Opis ov Trensport



TOK SAVE

Dispela toksave i go long ol lain husat i ronim PMV bas 18 long Mosbi olsem Nesenel Len Trensport Bod i tok orait long suriki ron bilong ol PMV sevis i go long ami bareks long ATS.

PMV bas 18 bai stat long McGregor Plis Bareks na pinis long Hanuabada. Em bai ron olsem i go long 8 Mail, Erima, Gordons, Courts, 5 Mail, 4 Mail, 3 Mail haus sik, Kilakila, Koki, Daun taun na Konedobu.

Nesenel Trensport Bod i askim ol lain husat i gat PMV bas sevis na laik ronim PMV i go olsem long ami bareks long ATS long ringim **Eksekyutiv Opisa, Pasindia Trensport long telepon 325 4277 o Fax 325 4091.**

VAGI TAUMAKU
Ekting Dairekta
Opis ov Trensport

WANTOK NIUSPEPA REACHES THE PEOPLE WHO WANT GOOD VALUE!

Some advertisers tend to underestimate the buying power of the average Wantok Niuspepa reader without appreciating the dynamic attributes of Wantok's audience.

Wantok Niuspepa is reaching 150,000 readers per week. Consider this is more than twice the readership of any other PNG newspaper.

Most read the Wantok word for word. Every advertisement is considered. Your advertisement gets the attention it deserves.

Wantok Niuspepa readers are loyal in their product preferences. Price is a concern but familiarity and perceived value guides their buying behaviour.

Advertising in Wantok Niuspepa can influence their buying patterns and create loyal customers of your product and service range.

Wantok Niuspepa is reaching the readers who really matters and it will be to your advantage to educate your target market more thoroughly.

Wantok Niuspepa can be your alternative point of sale venue in merchandising your products and services. After all, consumer conversion can only come through approaching your target market directly.

ADVERTISING SPACE COST

.... PRICES QUOTED EXCLUDES 4% NCD SALES TAX

Advert Size Mono One spot colour Two spot colours Full Colour

Full Page - 38cm x 7cols	K731.50	K931.50	K1,131.50	K1,531.50
Half Page - 28cm x 5cols	K385.00	K585.00	K785.00	K1,185.00
Half Page - 19cm x 7 cols	K365.75	K565.75	K765.75	K1,165.75
Quarter Page - 12cm x 7cols	K231.00	K431.00	K631.00	K1,031.00
Quarter Page - 19cm x 4 cols	K209.00	K409.00	K609.00	K1,009.00

Compare Wantok's cost per column cm!
K2.75 per c/cm against the Dailies K6.15 for the same size!!

Contact our Advertising team for your advertising requirements on Phone: 325 2500 Fax: 325 2579 now!



• Yangpela Armstrong Peka bilong Lae i rausim bal long pilaia bilong Pot Mosbi insait long namba wan gem long Stet ov Origin long Pot Mosbi.

Kompetisen i go strong tru

PMSA RIPOT

KIK RESIS long primia divisen long Pot Mosbi soka kompetisen i wok long go strong tru.

Oi liklik tim olsem Kurti Andra, IBS United na Babaka i wok long winim ol biknem tim.

Kurti Andra i givim skul long Cosmos long we bilong pilai primia futbol wantaim 2-1, United i dro wantaim biknem tim ICF Yunivesiti 2-2 na Babaka nekim Adu 2-1.

Cosmos i mas traिम strongpela pilai long midfil na fowat. Oi i gat ol pilaia i ken skorim gol tasol ol i no save skoa.

John Pips, Roy Karang, Jason Sigamata na Paul Songo jnr bai go pas long Cosmos.

Kosa Joe Turia i mas stretim kwik midfil eria. Karang wanpela tasol i save wok hat tru long dispela eria, na em i mas kisim gutpela sapot i kam arapela pilaia.

Cosmos i winim wanpela gem tasol na em i lus long tupela. Dispela em wanpela bikpela samting tru we ol sapota bilong klap i wok long tingting planti tru.

Dispela wik Cosmos i bai bungim Telikom. Telikom i winim tupela gem na lus long wanpela. Olsem na Telikom i gat gutpela rekot olsem ol bai winim Cosmos long Sande.

Kepten Raymond Nasa i bai tingting planti tru long painim gut rot long winim Cosmos. Oi boi Telikom i no save wari, ol i save givim tasol i go inap wisel i trai.

Na long Bisini Wan, Momase bai skelim strong bilong Defence. Oi boi long Murray Bareks i kirapim paia stret bihain long ol i kisim gutpela straika Hans Gewambang.

Boi Markham ya em wanpela top straika insait long Pot Mosbi soka kompetisen.

Momase i mas win sapos nogat sampela ol sapota olsem Simon Koima bai i no inap kaikai ya.

Blue Kumul bai winim Kurti Andra, Uni bai autim tiket bilong Tarangau.

Na long Sarere, tupela wantok tim, Guria i IBS United bai skelim strong bilong ol yet. Olsem pasin, yu man, mi man, larim lek bai stretim long soka fil.

Rapatona bai wilwilim yet Adu, maski ol i kisim sponsa i kam long Patterson Lawyers.

Foapela kantri tasol bai resis

PRESIDEN bilong PNG Netbal Federation Janet Sape i tokaut em i no rausim tupela sinia pilaia long skwat bilong SP Games long Guam.

Tupela pilaia em Margaret Opina na Gima Rupa. Dispela tupela pilaia em non-treveling riserv.

Opina bai go yet long Guam olsem wanpela teknikel opisel we em bai amapaia long gem long kisim Osenia setifiket bilong em. Na Gima Rupa em asisten kosa bilong Anda 21 tim.

Sape i tok Lua Mavara na Ianna Karona-Clunn i kisim ples bilong tupela meri ya. Mavara i save pilai long midkot na Karona em wanpela biknem gol-suta bipo.

Las taim Karona i makim PNG em long 1991 Saut Pasifik Gems na to Wol Kap long Sydney, Australia na em wanpela strongpela pilaia bilong Telstars netbal tim long Pot Mosbi.

Skwat bilong PNG em Marion Genia, Mona Lisa-Leka, Caroline Lahari, Ravu Raula, Mimi Ori, Renagi Dringo, Ianna Karona-Clunn, Kilala Owen, Vavine Iamo, Winnie Mavara, Lua Mavara na Gewa Raula.

Sape i tok foapela kantri tasol bai stap insait long dispela resis; PNG, Fiji, Norfolk Island na Vanuatu.

Sempion tim Cook Island i no salim tim bikos em i laik redim em yet long Wol sempionsip long pinis bilong dispela ya.

Yut kosa mas senisim stail

HENRY MORABANG i raitim

OLPELA nesanel yut kosa Ludwick Peka i laik ol yut kosa i mas senisim stail bilong kosim ol yut tim.

Bikpela samting tru, olsem Anda 17 soka tim, em ol yangpela skul mangi we tingting bilong ol em long sindaun na harim toktok (theory) na bihain ol i ken go praktis (practical).

Peka husat i gat nem long kosim Anda 20 tim bilong PNG i go long semi finals long 1994 Osenia Anda 20 Wol Kap kwalifaia long Fiji. Dispela em i wanpela rekot we wanpela tim bilong PNG i stap long semi fainels bilong Wol Kap resis.

Peka i tok em yet i no amamas tumas long we nupela kosa Ellison Lapan i trenim ol anda 17 pilaia long Lae.

"Wanpela samting Lapan i ting lus, em planti ol yangpela boi ya, em ol skul mangi na ol i mas

PNGFA RIPOT

kisim skul pastaim na bihain ol i ken go wokim praktis long fil.

"Dispela em wanpela samting mi yet i no amamas olsem olupela nesanel soka kosa," Peka i tok.

Em i tok siaman bilong PNGFA Yut Soka Gabriel Pise wantaim ol komiti bilong em i mas sindaun na askim na skelim ol kain we bilong kosim ol wanwan grup olsem anda 17, anda 20, anda 23 na sinia man na meri.

Peka i tok nau yet ol yut kosa i mas senisim kain kosing stail ol taktik (tactics).

Olpela kosa ya i gat wanpela pikinini bilong em tu i stap insait long Anda 17 tim husat i kik long Fiji na kambek gen. Nem bilong yangpela pilaia em Armstrong Peka, na em i save pilai midfil.

Em i tok ol pilaia i no sindaun long grup olsem ol fulbek, midfil na straika/winga na paitim toktok long we ol bai ran na mekim ol kain trik olsem.

Na mi yet olsem wanpela papa bilong pikinini i stap long tim, mi yet i no amamas tumas long harim olsem PNG i lus 8-0 long Australia, 10-1 long Fiji na 5-3 long Vanuatu.

"Mipela i gat ol gutpela pilaia, tasol we mipela i redim ol long go pilai i no gutpela. Dispela em wanpela samting ol yut kosa na PNGFA i mas sindaun na skelim."

Peka i tok mi yet i kros tru long harim kain skoa olsem.

Siaman bilong PNGFA Teknikel na Kosing komiti, Kisakui Posman na komiti bilong em i mas skelim kwik dispela hevi.

PNG i bin salim planti ol yut tim i go ovasis. Na toktok bilong kisim eksperiens i no gut. Dispela i soim olsem kosa i nogat wanpela gutpela kosing plen long stap insait long dispela kain resis.

Ol yut kosa na kosing kaunsil i mas kamapim wanpela kain luk-luk bek long skelim soka.

PRL RIPOT

Brothers bai paia long PRL

BROTHERS i redi tasol long nekim Magani long bikpela gem bilong Port Mosbi ragbi lig long Sande.

Las wik, Brothers i mekim planti ol lain i guria taim ol i winim Wests 36-34.

Kepten bilong Brothers Robin Kafie i tokaut olsem ol i gat bikpela tingting stret long winim dispela gem. Win egens long Wests i kirapim tru skin bilong ol pilaia.

Magani i no paia olsem bipo. Gerega Vaira wanpela gutpela pilaia nau i lusim pinis klap na joinim Waliya.

Waliya husat i winim Post Puma 20-18 las wik nau i laik redi tasol long nekim Royals.

Waliya i gat planti ol gutpela pilaia nau i joinim klab. Vaira na Dickson Sibia bilong Tarangau i go helpim ol boi Westen Provins.

Waliya i sindaun long namba faiv ples. Na em i laik holim dispela posisen olsem na gem ya bai strong stret ya.

Souths na Hawks bai kamapim gutpela. Ol boi Souths ya i redi tasol long winim ol boi Hanuabada.

Hawks i no laki tumas las wik egens Difens. Sapos Hawks i putim tingting long pilai, ating ol bai winim yet Difens tasol ol tu i laik kamap boksa long ples bilong ragbi lig ya.


Post Puma bai winim Dobo Warriors.

Na long Sarere, Wests na Gerehu United bai kamapim wanpela gutpela gem stret.

Kosa bilong Gerehu Richard Wagambie i mas tokim olgeta pilaia long putim tingting long gem. Ol i nap long winim gem sapos ol i yusim het long pilai ragbi lig.

Wests bai paia stret bihain long ol i lus long Brothers.

Defence bai nekim Paga Panthers na Kone Tigers bai brukim bun bilong ol lain Tarangau.



• Fowat bilong Royals i laik traिम pulim pilaia bilong Magani husat i holim jesi ya. Dispela em eksen poto bilong Pot Mosbi.

PNG tim kambek hait long kantri

PAPUA Niugini Anda 17 soka tim i bin kambek isi tru long kantri bihain long ol i go pilai long Osenia Anda 17 Wol Kap kwalifaia long Fiji.

Tim bilong Ellison Lapan na Moses Demas i bin kamap namba foa long pul bilong ol bihain long Australia, Fiji, na Vanuatu.

PNG i bin lus Australia 8-0, Fiji 10-1, na Vanuatu 5-3 na winim Amerika Samoa 8-0 na wilwilim stret Cook Ailan 11-0.

Olpela kosa Ludwick Peka yet i no amamas tumas long dispela ol skoa na tok olsem PNGFA na kosa Lapan inap long mekim moa gut sapos ol i mekim gut wok.

PNG yut tim i save pilai insait long planti tonamen bipo na PNGFA na Lapan i noken givim eskyus long kisim eksperiens. PNGFA i no redim gut tim long dispela tonamen.



Wiken Spot Dro

KOIARI RUGBY LEAGUE - SOGERI

Round: 1/6
Date: Sunday May 16, 1999.
Venue: Iarowari Oval (Sogeri)

B Grade

Time	Fixtures
09.00	Hooks Tigers vs Trek Warriors
10.00	Kongos vs Crystal Lakers
11.00	Sapphire Bears vs S.Choice
12.00	IBSPukpuks vs SirinumuOwls

Bye: Ice Panthers

A Grade

01.00	Hooks Tigers vs Trek Warriors
02.00	East Kongos vs C.Lakers
03.00	Sapphire Bears vs S.Choice
04.00	IBS Pukpuks vs S.Owls

Bye: Ice Panthers

Note: All clubs please be early incase of forfeits. Games will be brought forward for early finish in the afternoon.

RESULTS

Round: 1/5 - A Sunday May 9, 1999.

A Grade

Sogeri Choice	18 d	E.Kongos	12	
IBS Pukpuks	14 d	Ice Panthers	6	
Sirinumu Owls	12 d	S.Bears	4	
Hooks Tigers	10	drew	C.Lakers	10

POINTS LADDER

Club	P	W	D	L	F	A	P
IBS Pukpuks	5	4	1	73	29	8	
Sogeri Choice	5	3	1	74	44	7	
Ice Panthers	5	3	2	48	32	6	
C/Lakers	5	2	1	54	47	5	
Hooks Tigers	5	1	2	50	50	4	
S/Bears	4	1	3	14	24	2	
S/Owls	4	1	1	30	40	2	
T/Warriors	4	1	3	28	63	2	
East Kongos	4	4	12	32	-	-	

PORT MORESBY RUGBY FOOTBALL LEAGUE INC

Draws-Round (6) - Saturday 15th May, 1999

9.00	C	Kone Tigers vs Tarangau
10.30	B	Paga Panthers vs Defence
12.00	A	Kone Tigers vs Tarangau
13.30	A	Paga Panthers vs Defence
15.00	A	West vs Gerehu United

Sunday 16th May, 1999

9.00	C	Hawks vs Souths
10.30	A	Post Puma vs D.Warriors
12.00	A	Hawks vs Souths
13.30	A	Royals vs Waliya
15.00	A	Magani vs Brothers

PRL OVAL 2

Saturday 15th May, 1999

9.00	C	Paga Panthers vs Defence
10.30	B	Kone Tigers vs D/Warriors
12.00	B	Hawks vs Souths

Sunday 16th May, 1999

9.00	C	Royals vs Waliya
10.30	C	Post Puma vs D/Warriors
12.00	B	Royals vs Waliya
13.30	B	Post Puma vs D/ Warriors

PRL OVAL 3

Sunday 16th May, 1999

9.00	C	West vs Gerehu United
10.30	C	Magani vs Brothers
12.00	B	West vs Gerehu United
13.30	B	Magani vs Brothers

1999 SP CUP COMPETION

Round Five Results

Cambridge Eagles	18 d	Bombers	12
Spear Gurias	9 d	Spear Tumbes	8
Cambridge Vipers	30 d	Bulls	18
Lahans	18 d	Toyota Mioks	14

Spear Muruks 38 d Spear Angras 16

Points Table

	P	W	D	L	F	A	PTS
Tumbe	5	4	-	1	88-65	8	
Vipers	5	3	1	1	110-91	7	
Lahans	5	3	1	1	86-73	7	
Eagles	5	3	-	2	90-78	6	
Muruks	5	3	-	2	104-101	6	
Gurias	5	2	-	3	88-80	4	
Bombers	5	2	-	3	95-89	4	
Angras	5	2	-	3	88-113	4	
Mioks	5	1	-	4	66-72	2	

Bulls 5 1 - 4 84-130 2

ROUND SIX DRAW- Sunday 16th May, 1999

Spear Tumbes	C/Eagles	(Goroka)
Spear Angras	vs Bombers	(Kundiawa)
Lahans	vs Gurias	(Goroka)
Mioks	vs Vipers	(Wabag)
NBPOL	Bulls	vs S/ Muruks (Kimbe)

KEREMA RUGBY LEAGUE ASSOCIATION

Draws for "1999" season - May 14, 1999

3.00	U19	K.United	vs K. Warriors
4.30	Res	M. Kips	vs P. Kouri
May 15, 1999			
11.00	U19	C. Vals	vs P. Sharks
12.30	Res	K. United	vs K. Warriors
2.00	A	C. Vals	vs P. Sharks
3.40	A	K. United	vs K. Warriors
May 16, 1999			
1.00	U19	M. Kips	vs P. Kouri
2.30	Res	C. Vals	vs P. Sharks
4.00	A	M. Kips	vs P. Kouri
Bye MMT			
May 21, 1999			
3.00	U19	P. Sharks	vs K. United
4.30	Res	C. Vals	vs P.Kouri

May 22, 1999

11.00	U19	MMT	vs M. Kips
12.30	Res	P. Sharks	vs K. United
2.00	A	MMT	vs M. Kips
3.40	A	P. Sharks	vs K. United

May 23, 1999

1.00	U19	C. Vals	vs P. Kouri
2.30	Res	MMT	vs M. Kips
4.00	A	C. Vals	vs P. Kouri
Bye K. Warriors			

PEPSI LAHI SOCCER ASSOCIATION

Week 3 Draw - Saturday 15th May, 1999

8.00	U19/1	Bugand vs Rapatona
9.15	U19/2	Tisol vs Busu
10.30	W1	Waliya vs Ka Midnorth
11.45	W1	Defence vs Malas
13.00	W1	Lae Biscuit vs Sobou
14.15	P1	S.Unitech vs Bugand
16.00	P1	Lae Biscuit vs Dal Labu

Sunday 16th May, 1999

8.00	W2	Tisol vs Busu
9.15	D2	Murat vs Bunowa Souls
10.30	W2	Murat vs Dal Lab
11.45	P1	Defence vs Telikom
14.00	P1	Sobou vs Rapatona
16.00	P1	Guria vs Asiawe

UNITECH ROUND 1

Saturday 15th May, 1999

12.00	W2	Poasum vs Sunstriders	
13.00	P2	Defence vs Telikom	
14.00	P2	Sobou vs Rapatona	
15.00	P2	Guria vs Asiawe	
Sunday 16th May, 1999			
12.00	W2	Bugand vs Asiawe	
13.00	D2	Malabu vs Mungkas	
14.00	W1	Elcom vs Shell Unitech	
15.00	P2	Lae Biscuit vs Dal Labu	
16.00	P2	S.Unitech vs Bugand	

UNITECH ROUND 2

Saturday 15th May, 1999

12.00	D2	8 Mile Demdem vs Pobuto
13.10	D1	Malabu vs Notnas
14.45	D1	Elcom vs Momase
16.00	D1	Mungkas vs S. Blues

Sunday 16th May, 1999

12.00	D2	Arnotts vs TTC Bullets
13.10	D1	Murat vs Ka Midnorth
14.30	D1	M.BayUnitedvsPoasum
16.00	D1	E.Star vs Maaienduo

UNITECH GROUND 3

Saturday 15th May, 1999

12.00	U19/1	Elcom vs Sobou
13.00	U19/1	Poasum vs B.Souls
14.00	U19/1	Telikom vs Eastern Star

Sunday 16th May, 1999

12.00	U19/1	Defence vs S.Unitech
13.00	U19/1	TTC Bullets vs Asiawe

OROGEN SCHOOLS SOCCER ASSOCIATION - 1999

LEAGUE POINTS LADDER (After week 9)

(Under 7)

	P	W	L	D	F	A	P
Gordons Int	9	7	0	2	0	20	3 23
Korobosea	9	5	3	1	0	12	6 16
Murray A	9	3	2	4	0	10	8 13
Murray B	9	2	2	5	0	13	19 11
Ela Beach	9	3	4	2	1	11	14 11
St Josephs	9	1	4	4	1	8	12 7
Bambi Pri	9	1	4	4	0	8	17 7
POMIS	9	0	3	6	1	0	4 7 6

(Under 8)

Korobosea	9	8	0	1	0	25	5 25
Noblete	9	6	0	3	0	29	4 21
S.Heart	9	5	2	1	0	19	9 16
POMIS	9	4	3	2	0	12	14 14
Murray	9	3	6	0	0	16	17 9
St Josephs	9	2	4	3	0	7	20 9
Ela Beach	9	0	7	2	0	5	29 2
Gordons Int	9	0	6	2	0	1	3 18 2

(Under 9)

Ela Beach	9	8	0	1	0	41	3 25
Noblete	9	8	1	0	0	22	3 24
POMIS	9	4	3	2	0	15	11 14
Korobosea	9	2	4	3	0	9	16 9
Gordons Int	9	1	4	4	0	7	20 7
Murray	9	2	5	1	0	1	6 23 7
Bambi Pri	9	1	3	4	0	1	5 20 7
St Josephs	9	0	6	3	0	0	7 16 3

(Under 10)

Korobosea	9	7	0	2	0	17	3 23
Gordons Int	9	4	1	4	0	9	5 16
St Josephs	9	4	2	2	0	13	8 14
St. Peters	9	3	2	3	0	11	9 12
Murray	9	2	3	3	0	15	18 9
Ela Beach	9	2	4	2	0	1	7 12 8
POMIS	9	2	5	1	1	0	2 9 7
S.Heart	9	0	7	1	3	1	0 9 1

(Under 11A)

POMIS A	9	8	0	1	0	22	2 25
Gordons Int	9	6	2	1	0	16	4 19
St.JosephsA	9	5	2	2	0	12	13 17
Murray A	9	5	4	0	0	18	18 15
St. Peters	9	3	4	2	0	12	12 11
Dela Salle	9	1	4	4	0	3	10 7
S.Heart	9	1	6	2	0	7	13 5
Bambi Pri	9	1	6	2	0	5	20 5

(Under 11B)

Ela Beach	9	3	0	8	0	17	8 15
Korobosea	9	4	2	3	0	11	7 15
Murray B	9	4	4	1	0	19	19 13
St.JosephsB	9	4	3	1	0	8	9 13
W.Strip A	9	2	3	4	0	9	8 10
W.Strip B	9	2	4	2	2	8	12 8
Butuka	9	2	4	2	0	7	15 8
POMIS A	9	2	5	1	0	0	11 18 7

(Under 12A)

KoroboseaA	9	8	1	0	0	45	3 24
POMIS	9	7	2	0	0	22	10 21
C/ Primary	9	4	4	1	0	17	16 13
H.Rosary	9	4	3	1	0	1	8 13
Words Strip	9	4	5	0	0	6	11 12
St.Josephs	9	3	4	2	0	7	15 11
Kilakila Pri	9	0	6	3	0	4	15 3
Murray	9	4	0	2	1	0	1 2 7 1




(Under 12B)

St. Peters	9	9	0	0	0	32	4 27
Ela Beach	9	5	2	2	0	11	6 17
Gordons Int	9	5	2	1	0	1	12 6 16
Bomana	9	3	4	2	0	10	11 11
St. Francis	9	3	5	1	0	8	17 10
Gerehu CA	9	4	1	2	0	1	9 3
G.River	9	4	0	3	1	0	4 1
KorobosaB	9	0	7	0	0	2	1 16 0

(Under 13A)

POMIS	9	6	1	2	0	25	11 20
Bomana C	9	6	2	1	0	22	11 19
Korobosea	9	5	1	1	0	2	15 8 16
Ela United	9	4	3	1	0	1	19 20 13
Gordons Int	9	9	3	3	0	10	13 12
S.Heart	9	2	5	2	0	9	18 8
Ted Diro	9	1	4	2	0	2	6 14 5
St. Josephs	9	0	8	0	2	1	

WANTOK SPOT



Mipela redi tasol... • 6-pela bodibilda i lusim pinis Papua Niugini long go stap insait long Saut Pasifik sempionsip we bai kamap long Guam. Dispela sempionsip bai kamap long dispela wiken, na wanpela wik bihain, bikpela Saut Pasifik Gems bai kamap. Ol dispela PNG bodibilda bai yusim dispela sempionsip long redim ol yet long bikpela Saut Pasifik Gems. Tim menesa Peter Gutuma i tok PNG i gat nem long bodibilding na dispela bai kamapim strongpela kompetisen tru wantaim ol kantri long wan solowara. Skwat bilong PNG em: Douglas Uyassi (junior), David Mugarenang (anda 65kg), Benny Samaka (anda 70kg), John Waglep (anda 75kg), Steven Bomal (anda 80kg) and Justin George (anda 90kg).

Tumbe bai kisim strongpela salens

SP KAP RIPOT

HENRY MORABANG i raitim

WAGHI Tumbe bai kisim strongpela salens tru i kam long Cambridge Eagles long dispela wik Sande. Dispela gem bai kamap long Banz insait long Westen Hailens yet.

Tumbe em liklik susa tim bilong Eagles. Tasol ol i no save stap olsem ol wantok. Ol yet i save brukim bun ya. Tumbe i sindaun antap tru long poin lata wantaim 8 poin. Eagles i sindaun long lata wantaim 6-pela poin.

Ol boi Waghi bai pilim taim stret ya bikos ol boi long Hagen taun bai i no inap

isi long ol. Max Tiri, James Kops, David Gomia na Michael Kilsh bai go pas long ol boi Eagles. Na long sait bilong Tumbe, Gideon Kombuken husat i pilai long habek bai go pas long tim. Kombuken i gat nem. Em i save lukautim gut gem na setim ol pilaia bilong em.

Na long ol arapela gem, Guria husat i sotim win bilong Tumbe long Kokopo Graun las wik nau bai bungim Goroka Cambridge Lahanis long Sir Danny Leahy oval. Mathew Midi bai go pas long tim. Em bai kisim helpim i kam long Jeffrey Aize, Ivan Mosoka, Steven Sike na Tai Onsie.

Em i asples na Lahanis bai kisim bikpela sapot stret long sapota. Rabaul Guria i mas tingting gut. Normyle Eremas, Eremas Batki, Lucas Solbat na August Joseph bai go pas long ol yangpela boi

bilong Is Nu Briten. Lae Bombers bai salensim Simbu Antras. Bombers i no laki tumas las wik na sapos ol i no pilai gut, ol bai lus gen.

Kosa Steve Malum i gat ol gutpela pilaia stret. Tasol planti sapota i no save wanem as tru na ol i no save pilai gut.

Bombers i gat Simon Kundi na Andrew Norman long go pas long dispela tim ya.

Antras i no save kisim gutpela nius tumas. Tasol ol i save daunim het long mekim bikpela wok ya. Kimbe Bulls bai bungim Mendi Muruks long Kimbe na Pot Mosbi Cambridge Vipers bai go long Wabag long salensim ol Toyota Mioks.

Poin lata i sanap olsem; Tumbe 8, Vipers 7, Lahanis 7, Eagles 6, Muruks 6, Guria 4, Bombers 4, Antras 4, Miok 2 na Bulls 2.

PORT MORESBY ASSOCIATION DRAW

Saturday & Sunday, May 15-16, 1999.

Bisini 1

Saturday 15th

0800 U/19 K. Andra vs IBS PS United
0915 Reserve Adau vs Rapatona
1030 Women 1 ICF Uni vs Sobou
1145 First Nisco vs Sobou
0100 First WM1 Togelu vs M. Gaindu
0215 Women 1 WM1 Togelu vs Telikom
0330 Premier Adau vs Rapatona

Sunday 16th

0800 Reserve ICF Uni vs Tarangau
0915 Woman 1 B/Kumuls vs Tarangau
1030 First Cyclone vs Wanzesi
1145 First SPB vs City Kings
0100 U/19 Tarangau vs ICF Uni
0215 Premier ICF Uni vs Tarangau
0330 Premier Cosmos vs Telikom

Midweek

0430 Woman 1 W/O Wanzesi vs Normads

Bisini 2

0800 Reserve Guria vs IBS PS United
0915 Women 1 Wanzesi vs Defence
1030 First Tawala vs YM2
1145 Women 1 Normads vs Guria
0100 U/19 Adau vs Rapatona
0215 First Pom United vs B. Mocs
0330 Premier Guria vs IBS PS United

Sunday 16th

0800 Reserve B/Kumuls vs K/Andra
0915 First Nomads vs Bau Futz
1030 Woman 1 Naniu vs TST Babaka
1145 First Dobo Murika vs Bao Mita
0100 First Verave V Murat
0215 Premier B/Kumul vs K/Andra
0330 Premier Momase vs Defence

STMS 1

Saturday 15

0915 U/19 Bavaroko vs Babaka
1030 U/19 Cosmos vs Pom Unit
1145 Second Bavaroko vs SPB 2

STMS 2

0915 U/19 B/Kumul vs M. Gaindu
0915 U/19 Bao Mita vs Nisco
1030 Reserve Cosmos vs Telikom
1145 Second W/O D/Bosco vs Naniu

Uni

0800 Second E/Ranu vs R/West
0915 Second Muma vs D/Bosco
1030 Second Kutu vs Mukaso
1145 Wom 2 Bomana vs Cyclone
0100 Wom 2 Cosmos vs ICF Uni 2
0215 Wom 2 Kula vs PS United
0330 Second Kula vs Korian

Sunday 16th


STMS 1

0915 U/19 Guria vs Telikom
1030 U/19 Momase vs Defence
1145 Reserve Momase vs Defence

STMS 2



0800 Second W. Heights vs Cyclone 2
0915 Second M/Kayaks vs Naniu
1030 Wom 2 Murat vs K/Andra
1145 Wom 2 C/Kings vs W/Heigh
0100 Wom 2 P/United vs Rapatona
0215 Wom 2 M. Gaindu vs Adau
0330 Second Dolos vs City Kings 2

Byes: Babaka-Prem, Reserve, Tawala - Women 2



Catch the Action of the SP CUP

The No. 1 game

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.